


# TWÊTÙ KATWÈNA

## DÌNGUMBA BWÀ CINYÌ?

 Ndyèsè dya kwikala mwalukile cyakabidi apa mu cyambilu emu, paanyima paa, ngela meeji, ngondo mitwe ku isatu îmvwà nciyipu to. Nshindi mmipete lutatu, ne mêmè paanyi. Kaa, nasha nanku, ndiikisha, mpindyewu, nenku udi udyumvwa anu bu udi utamba kubwela cyakabidi mu mudimu. Nenku tudi bindile mpindyewu bwa kubanga lumingu ludi lulonda elu, diloolo dya mu diisâtù dilwalwa edi, bwa di—ditabuluja mwab’ewu mene mu tabernacle emu. Nenku Nzambi Yêyè mwanyishe, ndi bu ne. . . Mukalenge mmundaye mudimu wa bwambi mushiilangane ne wa mushindu mupyamupya. Nenku Yêyè musanke bwa kucyenza, ndi ne ditekemena dya kubanga mushindu mupyamupya wa mudimu awu—awu mu lumingu lulwalwa elu, muneemu mu tabernacle, bwa ntwadijilu wawu.

<sup>2</sup> Ne pashiishe, ncyêna ne masangisha madyanjila kuteeka mu ndongamu to, pa kuumusha anu Australie ne Nouvelle Zélande, bwa ngondo wa kumpala ulwalwa ewu. Ne pashiishe Mwaneetu Osborn udi ubiikila bwa kwenza disangisha dya twêtù bônso pamwe dîmvwà mumulaye mu mushindu kampanda mwaba ewu kukaadi ntanta, mu Tulsa, kadi paanyima ndambu, kadi katwena banji kwikala batwishiibwe bwa ciine aci to.

<sup>3</sup> Bivwa bîmpè bushuwa, Mwaneetu Jeffreys, bwa mêmè kupetaku mushindu wa kukulabula ku cyanza lwa paanyima apa, kabidi ne bwa kuumvwa mwaneebe wa balume wimba musambu awu, ne wêwè mwikale wimba cisanji. Ntu munange bya nanku awu mu mushindu kampanda, taatu ne mwanende. Kanwenaku peenu banange aci anyi? “Kolesha mwânà mu njila udiye ne cya kwendela.” Ncya bushuwa, Mukalenge Guenther, udi—udi mumanye ne aci ncyà bushuwa, nwênù bônso babidi. “Kolesha mwânà mu njila udiye ne cya kwendela, nenku paakolaye kacyakuumumuka to.” Bwa aci ncyà bushuwa. Bidi mwa kwenzeka misangu mikwabo ne yêyè uumuke ku cyôci aci, kadi cyôci aci kacyakuumumuka to. Nwamonu anyi? Neci—necishaale anu nende misangu yônso. Dilongesha dya ntwadijilu adi ne cyônso cyakamukoleshilabo bwa kwenzaye aci, neci—necishaale nende anu cya bushuwa. Mpindyewu, eci cidi. . .

<sup>4</sup> Ndi mutuutakeene ne Mwaneetu Jeffreys pambelu paapa, ke mêmè ne: “Mwaneetu Jeffreys. . .” Mvwa ndyambidila, nudi bamanye, ntu misangu yônso anu ne disanka dya kumona bânà beetu baa balume bônso badi balwa kutumwenekelaku

mwaba ewu aba, kadi diloolo bu nunku bwa nwaneetu mwenyi kulwaye! Edi diloolo didi anu bwa batu balwa ku tabernacle, anu kumpala kwa ditabuluja edi. Edi ndiloolo. . . Tudi baswe kwangata diloolo edi, ne maalaba mu dinda, ne maalaba diloolo, anu pa bitudi twitabuuja mu tabernacle emu, bwa—bwa kubyambulula cyakabidi. Tudi ne ndambu wa bintu bya bwalu bukole be bitudi twitabuuja, bikole be bwa kubyumvwa, kadi mu mushindu kampanda anyi kansanga tudi tubisanga mu Bible ewu. Bidi bimwekamu biikale bya bushuwa.

<sup>5</sup> Nunku mpindyewu, kwôkò kufwanyine kwikala mwaneetu wa balume anyi wa bakaji mwenyi muntu emu, mwikale mwena dingumba kampanda, anyi—anyi mwikale ubibenga, mwikale anu kacya wàsomba bwa kuteeleja byôbi ebi bwa diloolo edi, tudi baswe bwa umanye ne tudi tukwakidila anu ne mwetu mwônsò. Wamonu's, tudi tukwakidila anu ne mwetu mwônsò. Kadi mpindyewu ndi ntekemena ne. . . Nunku tudi tuvwiya bwalu ebu bwikale bûme cyoncyoncyo. Nunku padibi bimweka ne kwêna ubiitabuuja to, ee, mpindyewu, enza anu bu mûntù mêmè ngenza pândi ndya minyinyi mikalanga ne cérise. Nunku pândi ndya minyinyi mikalanga ne cérise, bu mudibi ne ke cîntù munange ngamba kufwa, misangu yônsò, pândi. . . Pândi ndya minyinyi mikalanga, padi mênù akatwa pa kaalutete, ncyêna ngimansha minyinyi mikalanga ayi to. Ndi—ndi ngimansha anu kaalutete aku kadi kutungunuka anu ne kudya minyinyi. Pa nanku, anyi bu mudi kudya kwa nzoolo. Mpindyewu, nwênù bônso nutu banange nzoolo, nwamonu's. Nunku paudi ukatwa mênù pa mufuba, kwêna ubilekela to, udi anu uya wenda ukunya ku nyungulukilu wa mufuba aku utungunuka ne kudya munyinyi wa nzoolo awu. Ee, mushindu awu ke uwenza diloolo edi, bwa bîngàmbà mwaba ewu, udi anu. . . padi mênù ebe akatwa pa cintu kampanda, amba ne: “Mpindyewu, ncyêna—ncyêna anu. . . ndi musômbè paanyi anu bwa byôbi ebi, bu Malongesha a kaekleeziya kakese, mu masangisha asatu adi alonda aa. Bôbò nyewu badi anu bambulula cyanaana mu mushindu kampanda bidibo—bidibo biitabuuja, biikale babitangilula.”

<sup>6</sup> Nunku mushindu umwepele wa wêwè kufikisha muntu pabwîpi ne kwitabuuja Cyôci aci, ngwa kupoopela musonso bikole too ne mundekeelu mu mushindu wa yêyê umanya ne Cyôci aci ke cintu cidi cya bushuwa. Mushindu awu ke umwepele ûdi mwa kucifikisha ku dikwata anu ndendende. Anu bu mulunda wanyi ewu, Mukalenge Wood ûntù nende ewu; wêwè mupoopela musonso citupa, dibaya dishaale dyônsò didilekelele, lupepele neludiponeshe panshi mu mutanci mukese. Kadi bidi bikengela uwubweje bikole, kuwukwacisha bikole. Pa nanku mpindyewu mêmè anu muvwije cintu eci kacyi bukalanga menemene mu imwe ya ku myaba eyi, ne bwenu nwênù beenyi diloolo edi badi basômbe, ncyêna—ncyêna nteeta kunupangisha

bwa kuumvwa bîmpè to. Ndi nditacisha anu bwa kupoopela ekeleeziya ewu musonso pa bitudi twêtù twitabuuja. Bònsò badi bumvwe aci bîmpè menemene mpindyewu, ambaayi ne: “Amen.” [Disangisha didi dyamba ne: “Amen.”—Muf.] Eyo. Abi—abi mbîmpè. Nenku mpindyewu ndi ngumusha aci pa byanza byanyi. Ne pashiishe—pashiishe. . . Badi munkaci mwa kubikwata pa mikaba ya mêyi, ne bikwabo, bwa paanyima, piikalabo mwa kukeba kujandula pashiishe bitudi twimanyina cya bushuwa, ne myaba itudi biimanyine, mikaba ya mêyi eyi ke yikala mwa kubyamba. Ne pashiishe tutu tucyenza ku mpuukapuuka, bwalu kutu bantu bapyabapya batu babwela ne—ne tutungunuka batangile kumpala. Nenku mpindyewu katwakukookesha kutangilula Malongesha ônsò a ekeleeziya to, kadi anu amwe a kudiwu atudi tujinga bwa—bwa kwakulapu. Nenku mpindyewu, mu diisâtù diloolo, nansha nanku, kudi kubanga. . .

<sup>7</sup> Mpindyewu, mu dimwe ne mu diibîdi, ndi ngumuka, bwa kuya kasambila, kudilongolola bwa disangisha dya dyondopa. Nenku nudi mwa kwangata telephone yenu, anyi mwaba wònsò uwajinga kwikala awu, kulwa ne muntu yònsò uwaswa kulwa nende awu, bwa ditabuluja dilwalwa edi. Nenku nùbâmbilè bwa kabàlu mu disumpakana mpindyewu to, kabayi balwa, bamba ne: “Ee, mpindyewu nêmbwelè lubilu bwa kunsambidilabo, diloolo edi. Nenku maalaba diloolo, byònsò bidi. . .” Kanwenji nanku to. Udi ubwela wanji kuteeleja ndambu, bwalu tudi baswe kwangata dîbà dyetu bwa kwadija Dîyi adi diikale ditookesha menemene mu mushindu wa dyabulu kayi upetaku kaaba nansha kakese kaa kunyungaye to. Ne pashiishe paudi ulekela diitabuuja dyebe diya too ne kundekeelu kwadi, mu mushindu wa wêwè ubanga kwitabuuja, pashiishe ulekela kandondo keebe kaa mwoyi kabanga kwenza maaluu, ke piikala diitabuuja dya Nzambi mwa kukatwa nyama ku mikolo. Pa dîbà adi neupatuke uye. Wamonu anyi?

Bwalu, diitabuuja dyebe wêwè kadyakwenza byàbûngì menemene to. Bikengela kandondo keebe kaa mwoyi katentemuke kaye kenda kalonda njila umweumwe udi diitabuuja dyebe diikale diya awu, nenku diitabuuja dya Nzambi didi dilonda paanyima bwa kushindika byònsò abi. Wamonu anyi? Kadi, cyòci ciikale diitabuuja dyebe wêwè ne: “Kaa, eyo, ndi naadi mpindyewu mene!” Nenku nansha kandondo keebe kaa mwoyi kiine, kiita bwâtù kaalukila cyaanyima mwaba ewu, kamba ne: “Ndi ndikonka ne byakumbana bwanyi mêmè?” Kabyakukumbana to, anu mwaba awu. Wamonu anyi? Pa nanku tudi baswe bwa ciikale disangisha dya bushuwa dya dyondopa. Ne kumpala kwa mêmè kubweja nî nganyi nî nganyi mu bibambalu emu, ne bikwabo, bwa dyondopa, anyi bwa masangisha mapyamapya aa, ndi muswe bwa bôbô kuumvwabo menemene cidibo babwelelamu. Nenku wavuluka anu ne,

ulwe kutusamba, nenku twètù netwikale ne disanka bwa kukwakidila.

<sup>8</sup> Mpindyewu nwavulukaayi ne, mpindyewu, mu dinda, netutungunuke ne Dilongesha dya ekeleziya. Ne diloolo dya maalaba bya mwomumwe. Mpindyewu tudi tunujingila difika dilenga bwa difika dyenu, nenku muntu yònsò udi anu mwa kulwa. Tutu misangu yònsò ne disanka dya kumona muntu kana yònsò. Kadi eci mpindyewu, diloolo edi, nciludikila anu bantu badi biikale baa tabernacle ewu, baa—baa bwena badi bakoreshiibwe mu Dilongesha edi. Bwalu, pântù mpatuka mu budimi bwa bwambi, mu budimi bwa butangadiki, tutu twangata anu Malongesha a Mifundu a butangadiki, a nshindameenu menemene. Kadi mwaba ewu ku tabernacle eku, tudi ne meeji etu twètù ne bintu byetu twètù bitudi twitabuuja, twètù bu—bu—bu ekeleziya, nenku ke cyòci aci citwikala ne cya kutangilula, diloolo edi.

<sup>9</sup> Nenku kumpala kwa twètù kubuulula Dìyì Dyende dibenesha, katwenaku mwa kwinyika anu mitu yetu cyanaana bwa mèyì makeese a disambila anyi?

<sup>10</sup> Nzambi wa Bukole bwònsò ne wa ngulu yònsò, Wèwè, kumpala mene kwa dyulu ne buloba kubangabi kunyungulukangana pa kapwishipwishi kaa kumpala, Wèwè uvwa Nzambi. Kwènàku mwanji kushintuluka nansha kakese. Ne piikalaku kakuciyi kabidi tupwishipwishi bwa kubikwata, ne piikalaku kakuciyi kabidi dyulu ne buloba bya kukwata, Wèwè newikale anu Nzambi. Wèwè udiku bwa kashidi, ne kuumukila ku kashidi. Wèwè ngudi Nzambi. Kutu mwanji kwikalaku ne ntwadijilu wa matuku, anyi ne ndekeelu wa mwoyi nansha. Newikale anuku misangu yònsò. Nenku, Taatu, Wèwè bu mùdi kuyi ne mikalu to, ne twètù biikale ne mikalu, nenku tudi tulomba luse Lwebe lwa Bunzambi, Nzambi, bu mutudi tufika ku dyumvwa ne nyuma wetu twètù ewu neikale ne cya kubwelakana mu Cyendelele, upatuka mu bintu bidi byenza bya cikondo eci, ubwela mu Cyendelele. Ke bwa cinyi, Mukalenge, tudi mwaba ewu bwa kukenketa disungidiibwa dyetu, bwa kumona ne tudi biimane mushindu kaayi kumpala kwa Dìyì Dyebe, ne kumona mutudi tusanganyiibwa mu malabula etu. Tudi ne nsòmbelu udi uKusankisha Wèwè anyi? Nyuma wetu udi ufila bujaadiki bwa Nyuma Webe anyi? Ne dilongesha dyetu didi difila bujaadiki bwa Bible ewu anyi? Nenku, Taatu, enzaku bwa tukenkete byònsò bibidi, ne ntema yònsò, munda mwa masangisha asatu adi alonda aa. Twènzèlèku nanku, Mukalenge.

<sup>11</sup> Benesha mpaasata ewu, balami, balubuludi, ne beena kwitabuuja bònsò, bantu badi balwa mu ekeleziya ewu. Kacya anu matuku ânkaadi mwenze mwaba ewu aa, Mukalenge, kudi bààbùngì, bààbùngì be bàndi nciyi nansha mumanye mènà abo to, anyi kudibo bafumina, kadi ndi mutwishiibwe ne Wèwè

udi mumanye byònsò bidi bibatangila. Nenku tudi mwaba ewu mu kiipacila kamwepele aku, diloolo edi, Mukalenge, kaa kwikala mu bwobumwe banyungulukile Dîyì difunda. Nenku utupe Nyuma Mwîmpè mu nsòmbelu yetu, bwa twamona mwa kusòmba ne ditalala, ne dicincika dya maalu, ne mu diciina dya Nzambi, ne kukenketa nsòmbelu yetu ku Dîyì Dyebe. Twènzèlèku nanku, Mukalenge.

<sup>12</sup> Nenku mu nzubu ewu, diloolo edi, Mukalenge, kudi bânà beetu baa bitupa bishiileshiilangane bya—bya ekeleeziya. Nenku, Mukalenge, ndi ne kusakidila kwâbûngì bwa mudibo balwe mwaba ewu bwa kwikala mu bwobumwe. Pàmwápa tudi bafwanyine kubenga kupetangana pa tuuméyitu kesee twa Malongesha. Kadi mu dîyì dikulu dimwepele dinene dya kumutu kwa ônsò adi, tudi biimane bu bânà baa muntu badisange ku mwalu wa mvita. Aci, Eyi Nzambi, enzaku bwa cikoleshe mishindu yetu—yetu ya bwobumwe, ne yetu...ne myonji ya ngàsà ne dinanga bya Nzambi biikale pa twêtù ne bubanji bwabi. Mpindyewu, patudi tufika ku dyumvwa, Mukalenge, ne ewu mudimu mmupite bûngì bwa muntu kwenzaye, bwalu mwaba ewu tudi tutangila, diloolo edi, mwaba udi misuuka idi Cyendelele ciswike iya. Nenku tudi tulomba ne Nyuma Mwîmpè abwele mu Dîyì, ne àDyädijè ne àDyûmvwijè mu mushindu Wende Yèyè, utuumvwija twêtù, bintu bidiYe muswe bwa twêtù kumanya. Twènzèlèku nanku, Mukalenge. Ne piikala misangu isatu...isatu ya disangisha ayi piikalayi mijike, enzaku bwa twêtù kuumuka kuya bu ekeleeziya mukoleshiibwe, mudisange pamwe, bwa kuteeka myoyi yetu ne twipacila twetu twònsò pamwe, ne beena mwabo neetu baa Bukalenge bwa Nzambi, bwa twêtù kuya kumpala bipite bya kwònsò eku.

<sup>13</sup> Ndi muswe kuKusakidila, Mukalenge, apa padi ekeleeziya mutwilangane apa ne—ne bantu badi apa aba, bwa mùdì Wèwè mumpe mbingu mulongolongo ya diikisha dilenga. Ndi ndyumvwa bilenga be diloolo edi bwa Bwikadi Bwebe ne dibenesha Dyebe. Eyi Nzambi wa yààyà, nyewu tusambila bwa mwaneetu wa balume ewu, mwaneetu udi uya dyamwamwa dya mbù ewu, ukabwela mu matunga adi kâyi bukènkè, a mîdimà ne manyaanu awu, mwikala mwoyi wende mwine mwa kushaala bu cya diludikila mikete. Eyi Mukalenge, benesha Mwaneetu Jeffreys payaayaye apu, ne mwanende wa balume, ne mukajende, umupe ditanta dinene. Enzaku bwa yèyè kutubula masoso mu mîdimà amu mu mushindu wa ne Bukènkè bwa Evanjeeliyo buteeme too ne kule ne butangalake. Ûtûmvwèku, Taatu, bwalu tudi tulomba dilomba edi mu Dînà dya Mukalenge Yesu Kilisto, Mwaneebe. Amen.

<sup>14</sup> Mpindyewu, diloolo edi, ndi mbala mu Bible wanyi mukese wa Scofield. Ndi mfuma ku dipicisha bidimu makumi abidi ne bitaanu, matuku abidi aa. Nenku ncidi anu mwa kumubala, kadi udi wenda ushaala mubwucidile bikole be. Pa nanku ndi mupete

binete bya kubala naabi bwa pândi ndonga, nenku nêmmone mudibi byenza diloolo edi, bwa musangu wanyi wa kumpala.

Mpindyewu ndi ne byena bwalu, bu mudi ebi, ne: “Ekeleeziya udi ne cya . . .” Kaa, bintu byàbùngì, bu twètù mwa kufika ku byòbì. Cimwe cya ku byòbì: “Tudi tubikidiibwa Ekeleeziya bwa cinyi? Twètù katwena dingumba bwa cinyi? Twètù tudi twitabuuja mu dikubiibwa dya Cyendelele dya musuuka wa mwena kwitabuuja bwa cinyi—bwa cinyi? Tudi tupiisha bayiishi bakaji bwa cinyi? Tudi tubatiiza mu kwinyijangana kwa mu mâyi bwa cinyi? Ne Ekeleeziya neapicile mu Dikenga dinene anyi?” Ne byàbùngì bya ku byena bwalu abi mwaba ewu, ngela meeji ne ndi naabi dikumi ne bitaanu anyi dikumi ne mwandamukulu, bwa diloolo ne diloolo dya ndambu wa matuku adi alonda aa.

<sup>15</sup> Pa nanku ndi ngela meeji, diloolo edi, cya kubanga naaci, cya kutwadija naaci, mbimweneke bu ne Mukalenge udi uteeka pa mwoyi wanyi anu cyena bwalu eci cya ne, ka- . . . *Twètù Katwèna Dìngumba Bwà Cinyi?* Kabingila kadi kenza ne . . . Mpindyewu, katwena cilumbu ne bantu bakwabo badi biikale dingumba to. Katwena naabo cilumbu nansha cimwe to, kadi ndi njinga kuumwija bwa cinyi twètù katutuku baswikakane ne dingumba nî ndya bishi nî ndya bishi to. Mêmè ewu batu banjidile mu kaekeleeziya kakese kaa ba-Baptistes, bu munudi bamanye. Ne ba-Baptistes kabeena dingumba to, kabavwa’s we, too ne matuku abidi mashaale aa, nenku mpindyewu bakaadi benda bashaala bikole dingumba anu mudi makwabo ônsò awu. Kadi, kabingila kadi kenza ne twètù katutuku bashaale dingumba . . .

<sup>16</sup> Mpindyewu, twètù tudi bulongolodi. Tudi bulongolodi, badifundishe mwaba ewu ku—ku tubadi, bu bulongolodi, cisumbu cya bantu badilongolole pamwe bwa kukuukwila Kilisto, kadi katuyi mu dingumba kampanda to. Muntu nansha umwe kaakwikala ne bukookeshi kumutu kwetu to, nwamonu’s. Kî ndingumba to. Cidi—cidi anu bulongolodi cyanaana, bwobumwe munkaci mwa beena kwitabuuja beena Kilisto. Bantu batu balwa mwaba ewu mu ekeleeziya. Nenku eci cidi cishaala ekeleeziya udi bu ne ke kwabo kumbelu padibo bajinge kwikala kulwamu, pacidibo anu ne mwoyi.

<sup>17</sup> Nenku badi mwa kulwa apa ne kubenga kupetangana ne byònsò bitudi tuyiisha. Bidi anu bîmpè menemene. Udi anu, bu mùdì anu mwena Kilisto, udi ne bwobumwe, ne cyanza cikwolwela anu mushindu umweumwe ne bakwabo bònsò. Wamonu anyi? Bu mêmè mwa kwamba ne ndi ngitabuuja mu dibatiiza dya kwinyijangana mu mâyi, kadi wêwè mwikale witabuuja mu dimyaminangana dya mâyi, mushaale anu kacya wîmanyinapù, netutungunuke ne kushaala anu mushindu wetu umweumwe awu byenze anu bu ne tudi bapetangane twètù bònsò babidi. Tudi bafwanyine kwikala katuyi ne mmwenenu wa mwomumwe menemene to, bifwanangane. Kadi bu mudibi

anu ne udi mwaneetu mwena Kilisto mulume anyi mukaji, tudi tukwakidila anu bilenga menemene, wamonu's, bantu bônso.

<sup>18</sup> Pa nanku twêtù katwenaku ne dingumba to, bwalu ndi ngela meeji ne dingumba didi dikosolola bwânà bwetu. Bamwe baa kudibo nebâmbè ne: “Ee, katwena ne cya dyenza mu ditabuluja adi to. Adi nditabuluja dya ba-Méthodistes.” “Ee, adi ndya ba-Baptistes. Katwena ne . . . Twêtù tudi ba-Méthodistes. Katwena bwalu naadi to.” Mwaneetu, piikala Kilisto mwikalemu, twêtù bônso's tudi—tudi naadi bwalu. Bidi bikengela tuteeke . . . Mubidi wa Kilisto's ke—ke udi—udi usaama. Ne ndi mmona aci bikole mu matunga leelu ewu, mushindu utudi ne . . . Mpindyewu, Kilisto kacya, musangu nansha umwe, katuku mulongolole ekeleeziya kampanda wa dingumba to. Mpindyewu, itabaayi bwa nwikale batwishiibwe bîmpè pa bwalu abu.

<sup>19</sup> Mpindyewu, mpindyewu, nênnùkonkè maalaba diloolo, bwa kumanya ne bintu binudi nujinga kumanya ebi, bu mudi maalul malonda makwabo ândi nteela aa, anyi cintu kampanda cikwabo. Ncyêna ne dîbâ menemene dya ku kubyamba kubimana to, ncyakupita ku cikwabo cyena bwalu to, bwalu mbifwanyine bya muntu kwenza mbingu ne mbingu anu pa cyena bwalu cimwecimwe aci. Kadi paudi muswe kumanya ne mmwaba kaayi, nî ncinyi nî ncinyi, ungele anu lukonko, uluteeke anu pa—pa cyambilu apa, nenku nênkwândâmùnè ku lwôlò.

<sup>20</sup> Mpindyewu, dingumba dya kale ku ônsò, ne ekeleeziya wa dingumba wa kumpala utukaadiku bapete, ng'ekeleeziya wa Katolike. Baakamwija bulongolodi bidimu nkama isatu ne bya mu njila paanyima paa lufu lwa mupostolo wa ndekeelu. Bwa aci ncyâ bushuwa. Udi ucipeta mu Baataatu baa Nicée baa kumpala, ne udi ucipeta mu mifundu ya Josèphe, ne, kaa, yâbûngì ya—ya bafundi banene baa maalul malonda. Nwamonu anyi? Nenku pa bidi bitangila mu ba—ba . . . cyônsò cya ku bikondo bya ekeleeziya, kuya too ne ku lufu lwa mupostolo wa ndekeelu, ne bidimu nkama isatu luseke lukwabo lwa kuneeku kwa bapostolo, kakuvwa ekeleeziya ya cyena mangumba to. Anu Katolike ke uvwa dingumba dya kumpala dya ekeleeziya.

<sup>21</sup> Ne ekeleeziya ya Mishònyì mmangumba adi mapatukile mu dingumba. Dilongolola dya kumpala dyâkalwâ, divwa Luther; paanyima paa Luther kwakalwa Zwingli, paanyima paa Zwingli kwakalwa Calvin, byenda biya anu nanku. Nenku too ne ku Ditabuluja dya cyena Wesley, too ne ku Alexandre Campbell, John Smith, ne bakwabo, nwamonu's, anu nanku. Ne nkwa ya ndekeelu itudi naayi too ne mpindyewu ke bitupa bishiileshiilangane bya cikondo cya Mpenta ebi.

<sup>22</sup> Nenku ndi ngitabuja ne Nzambi mmukwate mudimu mu cikondo ne cikondo cyônsò. Kadi nukaadiku bamone ne, musangu wônso udi ekeleeziya upangila, ne padibo anu

badyenza bulongolodi badi bashaala bakaadi benda bapangila benda bapangila pa dîbà adi anyi? Ne musangu wònsò udibo anu bapangila, Nzambi kèna ujuululula ekeleeziya awu cyakabidi to. Udi upangila bukole. Mpindyewu nudi anu...Panudi baswe kumanya maalu malonda pa bwalu abu, tudi—tudi mwa kunupa byôbi abi, bwa ne—bwa ne ekeleeziya nansha umwe, nansha mene mu maalu malonda a maeeleeziya, kacya kakutu dingumba nansha dimwe didishinde dikaadi dijuuke cyakabidi to. Ba-Baptistes, ba-Méthodistes, ba-Presbytériens, ba-Luthériens, nansha biikale cinyi, pavwabo anu badishinda, kwabo kuvwa kujike. Mpindyewu, aci ncyá bushuwa. Mpindyewu, eci, ndi—ndi munwâmbile mpindyewu, vwalaayi nkooci, bwalu netupopele cyôci eci bikole. Nwamonu anyi? Kacya kaditu dyanji kwikalaku to, musangu nansha umwe. Pavwa muntu upatuka bu muntu nkaaya kadi ulongolola ekeleeziya, divwa dibanga.

<sup>23</sup> Nzambi udi ukwata mudimu ne bantu nkaaya, kî nne dingumba to. Kacya Nzambi mu cikondo nansha cimwe katu mukwateku mudimu ne dingumba to. Ukaadi mukwate mudimu misangu yònsò anu ne muntu nkaaya. Mu Dipungila Dikulukulu, Yèyè uvwa ukwata mudimu ne muntu nkaaya. Mu Dipungila Dipyadipya, Yèyè mmukwate mudimu ne muntu nkaaya. Mu cikondo kana cyònsò, Yèyè uvwa ukwata mudimu misangu yònsò anu ne bantu nkaaya, kî nne mangumba to. Nenku, ke bwa cinyi, piikala Nzambi kayi mu dingumba to, nebinkwacishe ku cinyi bwa mèmè kwikala bwalu ne cintu bu ne ndingumba? Mpindyewu, bândi ngamba kî mbantu badi mu diine dingumba adi to, ndi ngamba dingumba dyôdi diine, bwalu bantu baa Nzambi badi mu mangumba ônsò awu.

<sup>24</sup> Mpindyewu, Nzambi katu ulekelaku cintu cyenzeka kayi Yèyè ufila didimwija pa bwalu abu to. Ncyèna ngitabuuja ne kudiku cintu kampanda cidi. . .

<sup>25</sup> Mpindyewu, mbyenze bu mutudi ne nkonko idi ijuuka, mu maeeleeziya, bu lwa bwena lutuvwa bapete matuku abidi aa pa bidi bitangila mashi ne maanyi, ne bikwabo. Nenku nudi bamanye mukanda mumfundila ne “Mwaneetu Branham Munanga,” ne bikwabo. Kadi kabingila kavwa kenza ne mèmè mbengangana ne cyôci aci, mbwalu kacyena mu Dîyi to. Ne ke bwa cinyi ndi mbengangana ne dingumba, mbwalu kadyena mu Dîyi to. Nenku bikengela kwikale cintu kampanda citudi mwa kwikala naaci bwa kushindamijilapu diitabuuja dyetu. Nenku patwikala katuyi mwa kudishindamijila pa dingumba kampanda, bikengela twêtù kudishindamijila pa Dîyi dya Nzambi. Bwalu Dyôdi ke cishimikidi cimwepele, n’Dîyi dya Nzambi.

<sup>26</sup> Nenku padi Dîyi dya Nzambi kadiyi dyakula bwa dingumba, kadi diikale dyakula dibengangana ne dingumba, pa dîbà adi’s tudi ne cya kwakula bilondeshile Dîyi. Katuyi tucyuka



bidi mwepiskopo, anyi nî ncredi nganyi wamba, nî ncredi nganyi wela meeji, cidi muntu mwîmpè wamba, padici kacyi cikumbanangane ne Dîyì dya Nzambi, nanku ncyà mafi. Nudi numona anyi? Cidi ne cya kwikala, Dîyì didi ne cya kwikala cintu cya ndekeelu. Dîyì dya Nzambi ndidi ne cya kwikala amen wa ndekeelu.

<sup>27</sup> Mpindyewu nwavulukaayi ne, ncyèna nyenga muntu bwena Kilisto bwende (nwikale bumvwe aci) mu mangumba to. Kudi binunu makumi bya misuuka ya mushinga mukole mu miine mangumba awu, badi bânà baa Nzambi. Kadi kubakosolola ne kubasunguluja, ke cîndi mêmè mbenga. Ne Dîyì dya Nzambi didi dicibenga.

<sup>28</sup> Ne ndi ngela meeji ne kakwena kasumbu nansha kamwe kakaadiku mu ditunga emu leelu ewu, kakwena kasumbu nansha kamwe kakaadiku mu ditunga emu, katu kakayi kadyànjlila kwamba ne nekalwe to, kudi Dîyì dya Nzambi. Ndi ngitabuuja ne Dîyì dya Nzambi ndidi ditupetela byònsò bitudi naabi dijinga, mu Dîyì emu mene. Kuumukila ku... wetu ntwadijilu too ne ndekeelu, bidi bisanganyibwa anu mu Dîyì dya Nzambi. Nenku pashiishe ndi—ndi ngitabuuja ne byòbì biikale mu Dîyì dya Nzambi, nenku's tuvwa ne cya... Dyòdi didi didyànjlila kwamba. Ne Dîyì dya Nzambi ndidimwija.

<sup>29</sup> Mpindyewu, kwèna ubala Dîyì dya Nzambi byenze anu bu udi ubala cibejibeji to. Udi ubala Dîyì dya Nzambi ku Nyuma Mwîmpè, wamonu's, bwalu Nyuma Mwîmpè Yèyè mwine ngudi wakwila kudi Kilisto. Kilisto mwikale usakidila Nzambi bwalu Yèyè wakasokoka bintu ebi ku mèsù kwa beena lungenyi ne beena meeji, ne neabisokolwele bânà bu aba badi baswe kuyiila. Pa nanku, nudi numona's, kakwena mushindu wa ne wikale mulonge tulaasa to, kakwena mushindu wa ne wikale mwenze dingumba to. Kudi mushindu anu umwepele wa kwikala mululame, ngwa ne, kwikala mulombodiibwe kudi Nyuma wa Nzambi. Nenku dilabula dyûdi mupete adi didi ne cya kukumbanangana ne Dîyì edi. Nwamonu anyi? Dîbà adi kaayi udi mucipete. Nwamonu anyi?

<sup>30</sup> Anu mutwafika pa mwine mwaba ewu mu tusunsa tukese emu mpindyewu, tudi bwalu ne bantu badi—badi... Bamwe baa kudibo mba-Calvinistes buumishi baa maalu, bakwabo baa kudibo mba-Arminiens buumishi baa maalu ne—ne baa mishindu mishiileshiilangane. Mpindyewu, kutu anu misangu yònsò, nansha wèwè mutukosolole tushaale tukese twa bishi, kadi anu nseke ibidi. Aci ncyà bushuwa menemene. Ne bònsò babidi badi ne tuumaalu tudibo bakokelangana. Kadi, bwalu budi ne, Bulelela pa bwalu abu budi penyi? Ke kutuyaaya aku, kutudi twela meeji, ku ngàsà wa Nzambi, bwa kunuleeja Bulelela pa bwalu abu. Mpindyewu twangataayi anu... nenku mwómò emu ke mûndi mufunde amwe a ku malongesha a ekeleeziya aa.

<sup>31</sup> Tubuululaayi mu Bibles yenu ayi, bwa ndambu wa tusunsa cyanaana, nwênù bônò mpindyewu. Nenku tuyaayi mu Bwakabuulwibwa, mu nshapita 1; anyi mu Bwakabuulwibwa, nshapita wa 17, bwa kubanga nende. Nenku tubangaayi anu kubala bwa tujandule mpindyewu kudi ekeleeziya eyi mibangile, ne cya—cyakayibanga ciine. Mpindyewu, Bible utu udyanjila kudimwija bwa cintu cyônò. Udi udimwija bwa matuku atudi—atudi twêtù ne mwoyi aa. Nenku mpindyewu, Bwakabuulwibwa, nshapita wa 17, nwênù baswe. Mwva mwambe wa 13, kî ngûmvwà muswe kwamba to, aci mpa...Netwangate awu paanyima paa katanci, yêyê pende, aci mmu ciprofeta cididitangila États-Unis. Kadi teejeayi ne ntema menemene mpindyewu.

*Ne kwakalwa kûndi umwe wa ku banjelo  
mwandamutekete bavwa ne mpanza mwandamutekete,  
ke yêyê kwakula naanyi, wamba...Lwâ apa; nenku  
nênkuleejê...dikosa dya cilumbu cya ndumba munene  
udi musômbe pa mâyi âbûngi awu:*

<sup>32</sup> Mpindyewu vulukaayi ne, eci cididimweka bu cididimweka kacyi cyumvika to. Mpindyewu mukaji wa luumu lubi ewu, mpindyewu, piikalabi ne netulongeshe cyôci eci, bikengela nujandule dyambedi ne bimfwanyi ebi bidi byumvwija cinyi. Mpindyewu, mukaji, mu Bible, udi uleeja “ekeleeziya.” Mbanganyi badi bamanye nanku, ne twêtù tudi Mukaji Musela? Ekeleeziya m’Mukaji Musela.

<sup>33</sup> “Lwâ apa nenku nënkuleejê dikosa dya cilumbu.” Mpindyewu, nekwikale dikosa dya cilumbu cya ndumba munene awu, mukaji wa bukooya udi musômbe pa mâyi âbûngi awu. Mpindyewu, mukaji mwikale cimfwanyi cya “ekeleeziya,” ne mâyi ncimfwanyi cya “bantu.” Mpindyewu, panwikala baswe kumona bwalu abu, kabidi, tangilaayi, mvensa wa 15 panucidi mwine mwaba awu apu, mvensa wa 15, mu nshapita umweumwe awu.

*Ke kungambilaye ne: Mâyi audi umona awu, padi  
ndumba awu musômbe apu, mbisamba, ... misumba, ...  
matunga, ne mwakulu. (Nwamonu anyi?)*

<sup>34</sup> Mpindyewu, ekeleeziya munene ewu, mukaji munene ewu, mpindyewu vulukaayi ne mmukaji wa luumu lubi. Nenku piikalabi mukaji uleeja ekeleeziya, (ne Ekeleeziya wa Kilisto pende m’Mukaji Musela, Mukaji Musela wa cijila), nenku mukaji udi kayi wa cijila ke yêyê ewu. Nenku civwa ne cya kwikala mukaji musela, udi kayi wa cijila to, udyamba yêyê mwine. Nwamonu anyi? Mpindyewu, nenku cididimweka wenza ncinyi? “Mmusômbe pa,” anyi kwikala pamutu pa, mbwena kwamba ne, “kwikala ne bukookeshi pamutu paa mâyi âbûngi.” Mu ngakwilu mukwabo, udi ne bukookeshi mu matunga ônsò ne myakulu yônò ne bantu bônò. Yêyê mmuntu munene, mukaji mwine ewu.

Mpindyewu, *udi bamfumu baa pa buloba bende nende masandi, . . .*

35 “Bwalu bamfumu baa pa buloba mbende masandi,” babanji, bantu banene. Mmunyi mùdi mufwanyine kwenda, mmunyi mudi mfumu wa ditunga mufwanyine kwenda, kwenda masandi ne ekeleeziya? Mmasandi a mu nyuma. A mu nyuma! Masandi ncinyi? Mmumwe ne, ee, mbyenze bu mudi mukaji ne nsòmbelu kayi wa lulamatu kudi bayende to. Udi wenda ne mulume mukwabo kadi pende mwikale ne bayende. Nenku ekeleeziya ewu, nenku, udi—udi udyamba mudiye Mukaji Musela wa Kilisto, piine apu mwikale wenda masandi ne bamfumu baa pa buloba, ne nsòmbelu wende wa bukooya awu, dijikula dyende dya bukooya adi. Kaa, Aci’s ncyà ndondo ne Cidi cibanjike. Ndi munangapu Dìyi’s we. Mpindyewu monaayaaku.

*. . . udi bamfumu baa pa buloba bende nende masandi, ne badi basòmbèle pa buloba mbabafikishe dikwacika mvinyo wa masandi ende.*

36 “Mvinyo” wende ke uwayne wabanyinangana, disaluka dyende dya ne: “Twêtù ke Ekeleeziya! Twêtù ke badi bacipete.” Nwamonu anyi? Mpindyewu, zolaayi anu ciine aci mu mitu yenu mpindyewu. Eyo. “Nenku yêyè kungambul- . . .”

37 Mpindyewu, mwanjelo kwambilaye Yone ne: “Nenku nênkuleejè dikosa edi dya cilumbu didi divwila ekeleeziya munene ewu.” Mpindyewu tangilaayi.

*Nenku yêyè kungambula mu nyuma kuya naanyi mu cipeela; ke mêmè kumona mukaji musòmbè pa nyama wa diikala dikunze kunzuu, . . .*

38 *Mukunze kunzuu*, mu Bible, udi uleeja “wa bumfumu.” Diikala *dikunze kunzuu* didi dyumvwija ne “dikunze.” Ne *nyama* udi uleeja “bukole.”

Nukaavwa bamone’s, nyama awu uvwa mupatukile mu mbû, aci mmu Bwakabuulwibwa, nshapita wa 13. Nenku panudi numona nyama upatukila mu mbû, cidi ciswa kwamba ne bukole ebu buvwa bujuukila munkaci mwa bantu.

Kadi mu Bwakabuulwibwa 13, paakajuuka mwânà wa mukooko ewu, wakajuuka yêyè upatukila mu buloba, kamuyi mu bantu to, États-Unis. Kadi pashiishe, paanyima, uvwa ne tusengu tukese tubidi, bukole bwa cyena mbulamatadi ne bukole bwa ntendeleelu. Ke pashiishe kupetaye bukookeshi, ne kwakulaye mwakaakula dragon kumpala kwende. Pa nanku bikengela nufunde nulame ne, tukaadi tubwela ku dikengesha dya mu ntendeleelu ne bintu bimwebimwe byakenzabo mu Loomo wa cimpanganu kukaadi bidimu byâbûngi, bwalu cidi EMU MMUDI MUKALENGE WAMBA.

Mpindyewu tangilaayi bwalu abu. “Musòmbè pa nyama, bukole kampanda.”

<sup>39</sup> Nuvwa bamone Rebekah? Paakamupeta Eliezer, kuvwa ku dîbà dya diloolo, nenku yêyê kunwisha kaameelu mâyi. Bwalu, Eliezer ukaavwa mwambe ne: “Nsongakaji wâlwa kunwisha kaameelu aka mâyi awu, yêyê awu ke wîkala... ne wâmpa paanyi mâyi a kunwa awu, yêyê awu ke uwikala Wêwê musungule, Mukalenge, bwa kwikalaye mukaji musela wa musadidi Webe, Izaka.” Kadi pacivwaye anu munkaci mwa disambila apu, Rebekah kulwa e kusuna mâyi ne kumupaye bwa kunwa, kunwishaye kabidi kaameelu. Monaayi, kaameelu kavwa nyama. Ne nyama mwine umweumwe uvwaye unwisha mâyi awu, ke wâkamwambulà e kumufikisha kudi mukaji musela wende, Izaka.

<sup>40</sup> Nenku, leelu ewu, bukole bwa Nyuma Mwîmpè, budi Ekeleeziya munkaci mwa kunwisha mâyi ne kukuukwila abu, ke Cintu cyaMwambula e kumuumusha pa buloba ebu, bwa kusambakeena ne Mukaji musela. Ncya bushuwa ne, Izaka uvwa mupatuke mwikale mu budimi, ku diloolo. Katwena tusambakeena ne Mukalenge mwamwa mu Butumbi to. Efeso, nshapita 5, udi wamba ne netusambakeene Nende mu mpeepele. Kaa, aci’s cidi cifikisha ba-Méthodistes ku diikala pabwipi ne kwela mbila. Anji elaayi meeji ku bwalu abu! Nwamonu anyi? Mukalenge... .

Izaka ukaavwa mupatuke mu nzubu wa taatwëndè, mwikale usanganyibwa pambelu mu budimi paakamonaye Rebekah ulwa mubande pa kaameelu. Mukaji kumunangaye, anu ku cimumwenenyi, kutupikaye pa kaamelu e kunyeema lubilu bwa kuya kasambakeena nende. Ncya bushuwa. Mwômò amu ke mutudi tukasambakeena ne Mukalenge. Ne kaameelu kiine kaakanwishaye mâyi aku, kaakamwambula kumufikisha kudi bayende.

Nenku Bukole bwine budi Ekeleeziya ukuukwila abu, budi baa pa buloba babiikila ne ndikolesha dya maalu abu, budi Ekeleeziya ukuukwila abu, Bukole bumwebumwe abu ke bwikala mwa kwambula Ekeleeziya mu mpeepele: “Bwa kuya kasambakeena ne Mukalenge mu mpeepele.” Nyuma Mwîmpè! Nwamonu anyi? Kudi... .

Nenku, tangilaayi, Rebekah uvwa virgo.

<sup>41</sup> Kadi ewu mukaji yêyê nndumba, utudi twamba apa ewu. Mpindyewu, nuumvu mpindyewu ne bukole ebu ncinyi anyi? Bu—bukole, cidibu buumvwija, ne, nyama. Uvwa pa mukunze kunzuu. Mpindyewu, ncifwanyine kwikala nyama wa mushindu kaayi? *Mukunze kunzuu*, abu’s mbufwanyine kwikala bukole “bubanji.” Ewu neikale ekeleeziya wa mushindu kaayi mpindyewu? Ng’ekeleeziya mubanji, ne ng’ekeleeziya munene, ne ng’ekeleeziya wa bukole, ne bwenzeji bwende mbutangalake pa misumba ne pa bantu. Ne bamfumu baa pa buloba mbende nende masandi a mu nyuma, mbwena kwamba ne bantu banene

baa pa buloba. Mpindyewu netujandule ne yêyè udi nganyi, mu kasunsa kamwe cyanaana, ne netujandule bidi bitangila dingumba edi.

*Ne mukaji awu mmuwale bivwalu bikunzubile (bya bumfumu) . . . muvwale bivwalu bya meekala a dikunzubile ne dya dikunze kunzuu, . . . mulengeja ne ngòlò ne mabwe a mushinga mukole . . . masanga, mwikale ne dikopo dya ngòlò mu cyanza cyende dyùle tente ne cinyangu ne bukooya bya masandi ende:*

<sup>42</sup> Uwva ne cinyi mu cyanza cyende? Dilongesha dyende, diine didiye wolwela bantu ne: “Twêtù ke ekeleeziya, tudi *cikampanda*.” Nenku mmufikishe bamfumu baa pa buloba ku dikwacika nende, mushindu awu. “Tudi *cikampanda*. Twêtù ke badi bukole bunene! Tudi batangalake mu ditunga ne ditunga dyònsò. Twêtù ke ekeleeziya udi mutambe bunene udiku. Lwâyi, nunwe wetu . . . Angataayi, pongololaayi nubikule ndambu. *Wêwè* angata. *Wêwè* angata.” Ncyôci aci, nwamonu’s. Nenku uvwa ne dikopo mu cyanza cyende. Tangilaayi.

*Ne mukaji awu uvwa muvwale bivwalu bya meekala a dikunzubile ne dya dikunze kunzuu, . . . mulengeja ne ngòlò ne mabwe a mushinga mukole ne masanga, mwikale ne dikopo dya ngòlò mu cyanza cyende dyùle tente ne cinyangu ne bukooya bya masandi ende:*

<sup>43</sup> Mpindyewu, balunda baanyi, citudi tubala eci kî ncibejibeji cya ku dituku ne ku dituku eci to. Tudi tubala Dîyì dya Nzambi dya Cyendeleele ne dibenesha. Maulu ónsò ne buloba nebijimine, kadi Dîyì adi nedishaale. Ncya bushuwa.

*Ne pa . . . mutu wende pavwa pafunda dînà, pavwa dînà difunda, nanku’s we: BWALU BUSOKOKA, BAABULONA MUNENE, MAMWÈNÈ WA BANDUMBA, NE BINYANGU . . . MAMWÈNÈ WA BANDUMBA, NE BINYANGU BYA PA BULOBA.*

<sup>44</sup> Mpindyewu, mwaba ewu kukaadi cikondo kampanda, ngela meeji ne kî mmu ekeleeziya emu to, kadi nkaadi muyiishe pa cyena bwalu cya ne: *Mufundù Ku Cimanu*, mwikale mufile cibadi cya maalu malonda a Baabulona. Mpindyewu, kasumbu kònsò kakaadiku kajuuke aka, ntendeleelu yònsò ne kasumbu kònsò kadiku pa buloba apa leelu ewu, mbibangile mu Genese. Mpindyewu, nwênù bangate mukanda wa Hislop wa *Baabulòná Ìbidi*, nwênù baswe kucilondesha mu maalu malonda, anyi mu umwe wa ku mikanda ya mîmpè ayi, nudi mwa kupeta nansha kasumbu kònsò kanudi baswe kupeta aku. Nènnwâlùjèku mu tusunsa tukese emu, pa bidi bitangila bayiishe bakaji, nwamonu’s, nenku nnuleeje anu kwakabangilabi, nwamonu’s, mwamwa mu Genese. Nenku pa bintu bishiileshilangane ebi, anu mushindu mene wakapatukilabi mu Genese. *Genesis* udi uswa kwamba ne “mbangilu.” Mbanganyi badi bamanye ne aci

ncyá bushuwa? Genese mmbangilu. Pa nanku, bintu byônsò bidiku ebi, bivwa ne cya kwikala ne mbangilu.

<sup>45</sup> Pândi ntangila mucí . . . Mvwa mwitu kukaadi ngondo ibidi, isatu, bu ibidi nanku. Ndi mmona mucí, mushindu udiwu mulenga. Ndi ngumona, udi uya mu buloba; mukwabo udi ujuuka pa kaaba kaawu apu, mwoyi wa ku musangu ne ku musangu. Nenku ndi ngelangana meeji pa cyôci aci. Kadi mucí awu uvwaku ne mbangilu kaaba kampanda. Uvwa ne cya kwikala ne mbangilu. Ne mushindu umwepele udiwu mwa kwambiibwa ne mmuci, anyi mwa kwikalawu nsanga, anyi hêtre, anyi cilombalomba, anyi dibwè, anyi nî ncinyi cyônsò, bivwa bikengela kwikale Meeji kampanda a kumutu paanyima paawu. Anyi bu kwôkô kwikale anu umwepele, mwine awu mwikale nsanga umwepele, bintu byônsò nunku bidi anu nsanga pa buloba bujima. Kadi bivwa bikengela Cintu kampanda, cya cinene, Meeji a kumutu, bwa kuwuteeka mu bulongame.

Dîná Dyende dya Cijila dibeneshiibwe! N'Yêyè Udi uteeka ngondo ne mitooto mu ndongolwelu wa díbà ne mabulunga. Yêyè ngudi muteeke bintu byônsò mu bulongame bwabi. Ne Yêyè ke wateeka Ekeleeziya Wende mu bulongame. Neakudimuke atangile anu kudiYe muswe bwa kutangilaYe; esete, wesete, nord, anyi sud, anyi cyônsò cidiYe aci. Díbà ditwikala mwa kuumusha ngenyi ya cyena mangumba eyi mu mitu yetu ne kudyela twètù biine mu kaabujima mu Kalvariyo. Yêyè neabiteeke mu bulongame, bu twètù mwa kwikala bakookele mudi mici ne bufuki Bwende bukwabo. Kacya kanutu numona ngondo wamba ne: “Mémè ncyakukenkesha bufuku ebu to. Nwênù bakwabo mitooto kenkeshaayi pa kaaba kaanyi” to. Kadi twètù, kaa, tudi bashiilangane, nwamonu's.

<sup>46</sup> Mpindyewu, Baabulona, tangilaayi mwakamweneka Baabulona. Udi umweneka ku mbangilu kwa Bible. Udi umweneka munkaci mwa Bible. Ne udi umweneka kundekeelu kwa Bible. Mpindyewu, kudi cintu kampanda. Mpindyewu, wakabanga ne Nimrod. Nimrod ke wâkaasa Baabulona mu Cibandabanda cya Shinear, anu pabwîpi menemene ne Musulu wa Tigre ne wa Euphrate. Ne Euphrate udi ukosolwelamu. Ne—ne mushindu uvwa njila yônsò, ikosolwela mu ditunga dijima adi, ikafikisha too ne ku Baabulona. Ne cyônsò cya ku biibi abi civwa bunene bwa makàsà bu nkama ibidi [mètres 61], biibi byenza ne cyamu cya kabanda. Nenku pauvwa ubwela munda mwa cimenga cya Baabulona, mùsèèsù wônsò uvwa ukafikisha anu too ne ku nkwasá wa butumbi.

<sup>47</sup> Mpindyewu, udi mwa kuya ku Loomo, leelu ewu, ne njila yônsò neakafikishe anu ku Loomo. Ne kudi ka-virgo Mariya kakese kiimane mu disangu dyônsò, mu disangu dya njila, kambule Kilisto mwânà mu cyanza cyaku, mwikale ufunkuna njila uyaaya too ne ku Loomo awu. Nwamonu anyi? Cidi

cimweneka ku mbangilu, kwa Bible; cidi cimweneka munkaci mwa Bible; s'ke cyôci eci kabidi ku ndekeelu wa Bible.

Mpindyewu ndi muswe kutungunuka ne kubala, anu bwa tusunsa tukese cyanaana, bwa nwamona mwa kupeta paa kushindamijila cyôci eci. Nwamonu anyi? Eyo. “Nenku mêmè kumona mukaji awu,” mpindyewu tangilaayi, “ekeleeziya.” Panudi numona *mukaji*, tumaayi meeji anu ku “ekeleeziya.” Nwamonu anyi?

... *mêmè kumona mukaji awu mukwacike ne mashi a bansantu, . . .*

48 Mpindyewu, mwaku *munsantu* udi ufuma ku cinyi? Mwaku *munsantu* udi ufuma ku “musantwisha,” anyi “mujidiibwe,” musantwisha. Eyo.

... *mêmè kumumona mukwacike ne mashi a bansantu, . . .*

49 Mpindyewu, piikala mukaji ewu ne ng'ekeleeziya, wakakengsha bansantu. Ne yêyè ke ekeleeziya wa mutambe bunene. Udi ne bukookeshi pa buloba bujima. Udi pamutu paa mâyi âbûngî. Ne udi . . . Bamfumu baa pa buloba badi benda nende masandi. Ee, yêyè udi nganyi? Bwalu busokoka bwa mushindu kampanda. Mpindyewu Nyuma neikale mwa . . . Nudi bamanye, kudi ne cya kwikala mapà citeema a Nyuma mu ekeleeziya; dya lungenyi, ne dikwabo bwa kuumvwa, ne dikwabo dya dyondopa, ne dikwabo bwa *bikwabo*.

... *ne mashi a badi bafwile diitabuujja dya Yesu: . . .*

50 Mbimweneke ne kabavwa batamba kucyuka bivwa Yesu mwambe to. Anu bivwa ekeleeziya mwambe. Ncya bushuwa. Ne ke cidi mu cyôci, kabidi.

... *ne pângâkamumônâ, mêmè kukema ne dyanyina dikole.*

51 “Mêmè kukema ne dyanyina. Mêmè . . . Civwa nci—nci—ncintu cya dikacila pa bidi bimutangila, mushindu ûmvwâ mukeme mushindu uvwaye . . .” Mpindyewu, ngânji kwangata kaaba kaa Yone ne kuteeta kucitookesha ndambu, nwamonu's. Yone wakamba ne: “Ke yêyè udi musômbe wawa. Udi udyangata bu ne ng'ekeleeziya wa cyena Kilisto. Udi yêyè ne mushindu wônso wa kwela cyanza ku mfranga yônso ya pa buloba. Udi ne bamfumu baa pa buloba mwinshi mwa makàsà ende. Yêyè udi cintu cibanji ne cya meekala kabûkabû, kadi mmunyi mudiye mwa kwikala mukwacike ne mashi a badi bafwile diitabuujja baa Yesu? Mmunyi mudiye mwa kukengesha bansantu? Mmunyi mudiye mwa kushipa badi bafwile diitabuujja baa Kilisto abu? Kadi pende's udi udyamba mudiye mwena Kilisto, yêyè mwine, ekeleeziya wa cyena Kilisto.” Mpindyewu tangilaayi.

*Ke mwanjelo kungambila ne: Bwa cinyi wakemi? Nènkwanbilè bwalu busokoka bwa mukaji awu, ne bwa*

*nyama udi mumwambule awu, ne yêyè uvwa ne . . . mitu mwandamutekete ne nsengu dikumi.*

<sup>52</sup> Mpindyewu, edi didi anu dibala dyetu dya patupu edi mwaba ewu mpindyewu. Kwataayi bwalu ebu. Eci neciikale cipeepele peepelee.

*Nyama uwàmònu awu uwaku, ne kênàku; ne neapweke upatuka mu . . . neabande upatuka mu ciinà cidi kaciyi ne nshiikidilu, ne neaye mu kabutu: ne aba badi basòmbèle pa buloba nebakeme, beena mênà awa kaayi mafunda mu mukanda wa mwoyi kacya baafuka dyulu ne buloba, paamonabo . . . paa—paakatangilabo nyama wa bwena uwaku, udi kaciyiku, kadi pende mwikaleku awu.*

<sup>53</sup> Mpindyewu, mpindyewu eci cidi ne cya kununyinga cizadi, nenku ncyôci eci. Wakamba, monaayi, ne: “Piikala bônso,” kî ng’anu ndambu mukese to, kadi, “bônso badi basòmbèle pa buloba mwa kukema.” Bônso bwabo nebakeme. Buloba bujima nebukeme bwa mukaji ewu. Kudi anu kasumbu kamwepele kiikala kakayi mwa kukema bwa bwalu abu to, ke aba bavwa ne mênà mu Mukanda wa Mwoyi wa Mwânà wa mukooko.

<sup>54</sup> Mpindyewu, mbipiciibwe ne mêmè mucifunyike anu mwine mwaba ewu, bwalu netubwelemu mu tusunsa tukese emu. Nwamonu anyi? Ndìbà kaayi dyakafundiibwa mênà abo mu Mukanda wa Mwoyi wa Mwânà wa mukooko? Nkubangila paakawelabo mu ditabuluja dya ndekeelu anyi? Mmu diloolo dyakayabo ku cyoshelu adi anyi? Mmu diloolo dyakashaalabo beena ekeleeziya adi anyi? Ncyêna nkeba bwa kunutapa ku mwoyi to. Kadi, nyawu nnwambila, Bible mmwambe ne: “Mênà abo akafundiibwa mu Mukanda wa Mwoyi wa Mwânà wa mukooko anu ku cifukidi cya dyulu ne buloba.” Menemene! Dìbà divwa Nzambi, ku cibangidilu, mumone ne Uvwa mwa kutuma Mwanende, ne Uvwa mwa kwangata kaaba kaa ngenzàmpèkààtù, paakeediibwa Mashi a Mwânà wa Nzambi panshi. Bible mmwambe ne Mashi Ende akeediibwa panshi kumpala kwa difuka dya dyulu ne buloba. Mbanganyi badi bamanye ne Bible udi wamba nanku, ne: “Mashi a Kilisto akeediibwa panshi kumpala kwa difuka dya dyulu ne buloba”? Paakeediibwa Mashi awu panshi, cidimba cyônso cya Mubidi, beena mênà akafundiibwa ne Mashi awu, mu Mukanda wa Mwoyi wa Mwânà wa mukooko, ku difuka dya dyulu ne buloba. Bwôwà bùdi naabu mushindu awu mbwa cinyi? Kaa, mwaneetu! Aci’s cidi cikangula biibi, kî mmwômò anyi?

<sup>55</sup> Ee, mpindyewu tubalaayi eci mwaba ewu mene, bwa twêtù kumona ne cidi aci cyamba ncyà bushuwa. Nwamonu anyi? “Ke mwanjelo kungambila ne: ‘Bwa cinyi wa- . . .’” Ngela meeji ne mmvansa wa 8: “Ne nyama uwàmònu awu . . .” Eyo. Nyêye.



*Nyama uwămònu awu udiku, ne kênàku; ne neabande upatuka mu cìnà cidi kaciyi ne nshùikidilu, . . .*

Mpindyewu, netwalukile ku cyôci aci, kadi ndi njinga kwangata cikwabo eci, bwalu netukufike.

*. . . ne neaye mu kabutu: ne aba badi basòmbèle pa buloba nebakeme, beena mènà adi kaayi mafunda mu mukanda wa mwoyi kacya baafuka dyulu ne buloba, . . .*

<sup>56</sup> “Nekwikale musumba wa bantu pa buloba,” mu ngakwilu mukwabo, “biikala mwa kuseeswishibwa,” bwalu yêye wakabaseeswisha. Ne kuvwa anu kasumbu kamwe kavwa kakayi kaseeswishibwe to, ne kiine aku nkaa aba beena mènà avwa mafunda mu Mukanda wa Mwoyi kacya anu ku cifukidi cya dyulu ne buloba. Netubwelemu paanyima ndambu.

<sup>57</sup> Mpindyewu monaayi mukaji awu, ekeleeziya awu, uvwa “*Bwalu Busokoka, Baabulona.*” Tudi tumumona umweneka ne Nimrod. Kiipacila kaa Nimrod kavwa nkaa cinyi? Nimrod wakaasa cimenga kadi kwenzeja bimenga bikwabo byònsò bwa kwikalabi bifuta citadi kudi cyôci cimenga eci. Tudiku bafwanyine kumona cintu bu nanku leelu ewu anyi? Kudiku mwaba bu nanku leelu ewu anyi? Kudiku ekeleeziya kampanda mwikale ne bukookeshi pa ditunga dyònsò pa buloba anyi? Cya bushuwa. Kudiku mwaba leelu ewu mwikale ufucisha ditunga ne ditunga citadi kudiwu anyi? Mwaba bu nanku udiku anyi?

Tuyaayi kumpala tubale bidi bishaale ebi, ndambu mukese cyanaana, bwa nupete cimfwanyi cyawu mu kaabujima. Eyo.

*. . . mumone nyama wa bwena uwwaku, . . . kayiku, kadi pende mwikaleku.*

*Kadi apa ke padi meeji adi ne lungenyi.*

<sup>58</sup> Mpindyewu, mbanganyi badi bamanye ne lungenyi ndimwe dya ku mapà a Nyuma? Mpindyewu, nkasumbu kaa mushindu kaayi kadiYe wambila aka, piine apu? Udi ne cya kwikala wambila kasumbu kaa bantu badi ne—ne mapà a Nyuma miikale akwata mudimu mu Ekeleeziya ewu.

*. . . apa ke padi meeji adi ne lungenyi.*

<sup>59</sup> Mpindyewu, imanaayi, jandulaayi bwalu abu mu byònsò bya ku bikondo bya ekeleeziya ebi mwaba ewu. Mu kubipatula, Nyuma Mwîmpè wamba patooke, mushindu udi mapà awu ne cya kwikala akwata mudimu mu dituku dya ndekeelu. Mpindyewu, tudi ne mapà a dyondopa miikale akwata mudimu. Kaa, s’bidi—bidi byenda bîmpè. Ee, mwaneetu, s’kudi makwabo mapà. Dyôdi adi’s didi anu dimwepele dya ku ôwò awu. Adi’s didi anu kaacintu kakesee kaa kashaadile. Ee, s’ke dipà ditambe bunene menemene edi mwaba ewu mene. Didi difwanyine kwikala ditambe bwîmpè, ndipà dya Nyuma Mwîmpè dya lungenyi, bwa kutwangaja Dîyi dya Nzambi ne kuleeja Ekeleeziya mwaba utudi biimane, anyi dya kufikisha anu

muntu kampanda ku dyondopiibwa cyanaana? Twêtù bônso's tudi dijinga ne kwikala ne bukole bwa mubidi. Kadi abi's mbipiciibwe ne mêmè ne musuuka wanyi mwikale tumatuma, pamutu paa mubidi mwikale tumatuma, dîbà kana dyônso. Kaa, ekelekele!

Teelejaayi mudi Nyuma Mwîmpè wakwila kudi Yone, mu Paatemo, wamba ne: "Apa ke padi lungenyi. Ateeleje Eci." Mpindyewu mwaba ewu ke utudi tupetela dizola dya cimfwanyi aci. "Apa ke padi . . ."

*Kadi apa ke padi meeji adi ne lungenyi. Mitu mwandamutekete mmikuna mwandamutekete, padi mukaji awu musômbe.*

<sup>60</sup> Kudi cimenga anu cimwepele, cîndi mêmè mumanye, pa buloba . . . Kudi bimenga bibidi, bîndi mumanye, bidi ne mikuna mwandamutekete anyi mipite apu. Cincinnati ncimwe cya ku byôbî abi, cidi ne cya kwikala bwalu bufwikakaja bwa Cincinnati. Mmaamu mbwa wa diitu, nudi bamanye, uvwa . . . ne bikwabo. Kadi's cidi ne bya nanku bipite apu bûngî. Kadi kakwena ekeleeziya nansha umwe udi ukookesha Cincinnati to.

Kudi mwaba anu umwepele pa buloba bujima, mwikale ne ekeleeziya musômbe pa tukuna mwandamutekete, mwikale ukookesha buloba bujima. Mpindyewu, mêmè ewu nciidi mfuminaku. Bintu byônso abi.

Nenku ndi mumone muntwamu mwaba udibo bambe ne: "Nenku apa ke padi lungenyi." Bwakabuulwibwa 13. "Ewu udi ne lungenyi ênzè makumi a nomba wa nyama wa lwonji awu, bwalu nnomba wa muntu kampanda." Kî mmusumba wa bantu, kasumbu kaa bantu to, kadi muntu "kampanda." "Ne nomba wende udi nkama isambombo ne makumi asambombo ne isambombo."

<sup>61</sup> Mwawa anu ngumyumvwa bamba, ne, kumutu kwa nkwaswa wa butumbi wa paapà wa Loomo, mbafundeku ne: "VICARIVS FILII DEI." Mwawa anu ndikonka misangu yâbûngî ne civwa mbulelela anyi. Elaayi kashoonyi, nubifunde mu bishiferi, mu bishiferi bya cyena Loomo, numonebi ne ke mudibi. Mbulelela anu bwa menemene. Mwawa mwimane pabwîpî mushindu ewu ne cifulu cya butumbi cya ntongo isatu cya paapà aci, mu lumwenu: "Bukookeshi pa iferno, dyulu, ne mpurgatoriyo." Nwamonu anyi? Nenku, bintu abi, nciidi mfuminaku, nciidi mfuminaku ku Loomo ne ndi mumanye ne mbulelela. Mpindyewu tudi bamanye ne bidi mu bimfwanyi.

*Nenku apa bamfumu mwandamutekete: bataanu bakaadi bapone (abi bivwa mmu cikondo aci), ne umwepele udiku (awu ngudi ne cya kulwa mpindyewu, uvwa César), ne mukwabo ucidi ne cya kulwa (uvwa Helode, uvwa wa cikisu awu); . . .*

<sup>62</sup> Mpindyewu tangilaayi. Tangilaayi mudibi bipwangane.

. . . *ne paalwaye, neatungunuke bwa cipoolo cîpî.*

63 Kudiku muntu mumanye bûngî bwa matuku buvwa Helode mukookeshe anyi? Ngondo isambombo. Wakaya wenda ukokela mamwëndè mu mùsèèsù, muswikila ku mucu wa cikokedi cya kabalu. Ke kwoshaye cimenga; kadi kwela beena Kilisto bwalu abu pambidi. Mwikale wimba cindaala ku luseke lwa kakuna pavwabo. . . pavwaye wosha cimenga apu. Ngondo isambombo— isambombo. Nenku monaayi: “Ne nyama. . .” Mpindyewu anji anu tangilaayi, tangilaayi muvwaye mupange kaneemu bwa bakwabo. Nwamonu anyi? Mpindyewu tangilaayi.

*Ne nyama uwaku awu, ne udi kaciyiku awu,  
nansha. . . udi wa mwandamukulu, ne udi wa ku baa  
mwandamuteke (ngiikadilu wa wa mwandamutekete),  
ne udi uya mu kabutu.*

64 Muntu kana yònsò mmumanye cidî *kabutu* kumvwija, kadi “iferno.” Nenku tangilaayi numone mwaba kaayi udiye mupatuke mu kubanda kwende, mu “iferno.” Ncinyi ciine aci? Biinà bidi kabiyi ne nshiikidilu. Kakwena bishimikidi to bwa dilongesha dya Katolike. Kakwena Bible nansha umwe to bwa dilongesha dya Katolike. Kakwena cintu paaci ne m’ Bible bwa dilongesha kampanda dya Katolike to, nansha kakese. Kabatu bambaku ne udiku to. Nsaserdose kajuukaye mwaba awu, nsaserdose wa mwânà awu mwaba ewu wa ekeleeziya wa Mwoyi Munsantu ewu kulwaye kuntwaku. Yèyè ne: “Kaa, yèyè. . .” Mwawa mmulondela mùmvwà mubatiize Mary Elizabeth Frazier. Yèyè ne: “Kaa, s’udi mumubatiize mushindu uvwa ekeleeziya wa Katolike wa mbangilu ubatiiza.”

Mêmè ne: “Ncikondo kaayi civwaye wenza nanku?”

Yèyè ne: “Mu Bible, mu Bible webe awu.”

65 Mêmè ne: “Ekeleeziya wa Katolike uvwa ubatiiza nanku? Aci ndilongesha dya ekeleeziya wa Katolike anyi?”

“Eyo.”

66 Mêmè ne: “Mu dibenga kupangila dya ekeleeziya wa Katolike adi, mmulwe kushintuluka bikole nunku bwa cinyi?” Nwamonu anyi?

67 Yèyè ne: “Ee, udi umona, nwênù bònsò nutu nwitabuuja Bible. Twêtù tutu twitabuuja ekeleeziya.” Nwamonu anyi? “Twêtù katwena tucyuka bidi Bible wamba to. Anu bidi ekeleeziya wamba.” Aci ncyà bushuwa menemene. Udi mwa kufika ku diteetangana dya makanda, pa bwalu abu, wâteetabî musangu kampanda, wamonu’s. Bôbô kabeena bacyuka bidi Bible wamba to; abi kabyena ne bwalu to. Badi bacyuka bidi ekeleeziya wamba. Nwamonu anyi?

68 Kadi twêtù katwena tucyuka bidi ekeleeziya wamba to. Tudi twitabuuja bidi Nzambi wamba. Amen. Bwalu Bible, mbafunde

ne: “Diyì dya muntu yònsò diikale mashimi, kadi Dyanyi diikale Bulelela.” Ke cidi cyenza ne twètù katwikadi dingumba to.

<sup>69</sup> Mpindyewu tangilaayi. Teelejaayi eci, mu kasunsa kamwe cyanaana. “Bamfumu bataanu bàvwàku abu, bapone, bamfumu bataanu.” Panudi nujinga kupetela aci mu maalu malonda, nènùnleejèci. “Ne umwe udiku, ne mukwabo ne cya kulwa.”

Mpindyewu monaayi, “nyama wa lwonji.” Mpindyewu, nyama wa lwonji kavwa mfumu to. Uvwa “umwe udiku, udi kayiku; kadi pende mwikaleku, ne kênàku; kadi pende mwikaleku, ne kênàku.” Ncinyi aci? Dishiihangana dya nkwasà dya baapaapà, bukookeshi, nyama wa lwonji mwikale ukookesha. Mpavwa Loomo wa cimpanganu mukudimuke bwa kwenza Loomo wa ciipaapà. Loomo wa cimpanganu wakakudimuka, ke pashiishe kushaalaye buupaapà, mmumwe ne, bavwa ne paapà pamutu paa mfumu, nenku paapà awu ke mfumu wa mu nyuma. Ke bwa cinyi batu bamwase cifulu cya butumbi, mfumu wa mu nyuma, udyamba mudiye mupinganyi wa Yesu Kilisto. Ke bwalu abu’s. Monaayi mpindyewu.

<sup>70</sup> Nenku netupatule dilongesha dya Katolike adi muntwamu bwa kunuleeja mushindu uvwadi didifinde kadi kubwela mu ekeleeziya ya Mishònyì, nwamonu’s, mushindu ucidiye anu mwadije nkwasà musòmbè mu ekeleeziya wa Mishònyì, mu byàbùngì. Bibengangane, menemene, ne Bible, bibengangane kakuyi mpatà to. Mpindyewu: “Nyama uvwaku awu, udi kaciyiku.” Mpindyewu vulukaayaaku: “Bwònsò bwabo nebaseeswishiibwe, pa buloba, beena mènà avwa kaayi mafunda kacya dyulu ne buloba byafukiibwa.” Tumonaayibi.

*Ne nyama uvwaku awu, ne udi kaciyiku awu (mvensa wa 11) ne nansha nanku yêyè udi wa mwandamukulu, ne...wa ku baa mwandamutekete, ne udi uya mu kabutu. (Neatungunuke too ne paafikaye pa biinà bidi kabiyi nshiikidilu ku ndekeelu wa njila.)*

*Ne nsengu dikumi iwāmònu ayi mbamfumu dikumi,...*

Mpindyewu tangilaayi mwaba ewu. Panwikala baswe kumona cintu kampana cya cikoka ntema, tangilaayi eci.

*...mbamfumu dikumi, badi kabayi banji kupeta bamfumu to; kadi badi bapeta bukookeshi bu bamfumu munda mwa dîbà dimwepele pamwe ne nyama wa lwonji.*

<sup>71</sup> Kî mbamfumu badi baashiibwe cifulu cya butumbi to; mbamfumu baa cimbambila. Nwamonu’s, kabatu kacya baashiibwe cifulu cya butumbi bu ne mbamfumu to, kadi badi bapeta bukookeshi bu bamfumu, munda mwa dîbà dimwepele, mu bukookeshi bwa nyama wa lwonji. Mudi anu mu cikondo cikese eci cya mu cimfwanyi mpindyewu mene emu ke mudi bamfumu baa cimbambila bajuuka. Nwamonu anyi? “Bapeta

bukookeshi bu mfumu, munda mwa dîbà dimwepele pamwe ne nyama wa lwonji.” Mpindyewu, eyo.

*Bôbò aba badi ne meeji amwe, ne nebafile bukookeshi bwabo ne dikanda dyabo kudi nyama wa lwonji.*

*Bôbò aba nebalwishe Mwânà wa mukooko mvita, kadi Mwânà wa mukooko neabacimune: (Butumbi's we!) bwalu yèyè udi Mukalenge wa bakalenge, ne Mfumu wa bamfumu: ne aba badi nende badi babiikidiibwa ne, basungula abu, ne beena lulamatu.*

<sup>72</sup> Bivwa bijinga nyiishe diyiiisha anu mpindyewu mene pa cyôci aci ne: “Basungula, kumpala kwa difuka dya dyulu ne buloba, ne biikale bashaala ne lulamatu ku dibiikidiibwa dyabo.” Aleluuyah! Ncyôci. “Badi babiikidiibwa ne, basungula, ne beena lulamatu.” Ne utu mmutwangaji, nwamonu's: “Basungula, ne beena lulamatu.” Nebamucimune. Nansha bôbò balwe kushaala banene munyi.

<sup>73</sup> Ne communisme munene ewu, nkwaka wa communisme utudi bapete leelu ewu ewu, kanuditacishi bwa aci to. Udi ukwata mudimu menemene anu mu byanza bya Nzambi. Ndi mwa kucijaadika ne Bible ewu. Yèyè ke wâmukèngesha bwa lufu lwa muntu ne muntu yônsò wâkashipàye bwa diitabuujja. Eyowa's, mukalenge. Nutangilaayi ne bamfumu aba nebiikale mwa kuumvwangana bônsò, ne nebamukine. Ne ditunga dijima, buloba bujima, communisme mutangalakemu. Mona's, bikengela kwikale nkwaka wa Nzambi, bwa kunyooka ciine aci. Wêwè udi wamba ne: “Anji indila kakese, Mwaneetu Branham. Communisme, nkwaka wa Nzambi?” Kakuyi mpatà to, cya bushuwa, nnkwaka wa Nzambi. Bible ngudi mwambe nanku. Kadi udi ubwelamu bwa kufika ku dikosa dya cilumbu cya cisamba cidi cipeetula Nzambi ne cya bantu balela mu masandi eci byenze ne bundu. Cidi cishaale pa buloba ebu ncinyi? Citudi bapete ncinyi? Mwaba ewu dituku adi . . .

<sup>74</sup> Nêngǎnjì kwimanyika cyena bwalu cyanyi kakese, bu byôbì mwa kwenzeka. Mvwa mbala mu katupa kaa Mufundu mwaba uvwabi ne mwânà mulela mu masandi kaakubwela mu disangisha dya Mukalenge munda mwa nkongo dikumi ne inaayi. Mbanganyi badi bamanye nanku? Ncya bushuwa, Dutelonoma 23; mwânà mulela mu masandi. Bôbò babucikile mukaji mu budimi, mmumwe ne, kule ne dikubiibwa dya bantu, nenku mulume kampanda kupitaye mukaji awu bukole, mulume awu uvwa ne cya kumusela. Nenku nansha byôbì ne mukaji awu walu kushaala ndumba, mulume awu uvwa anu ne cya kusômba nende too ne ku lufu. Nenku mukaji ewu yèyè musediibwe kudiye, udyamba ne udi virgo, pende kayi virgo to, pa dîbà adi badi mwa kumushipa bwa bwalu abu. Nenku mulume ne mukaji biikale baselangane, kadi kulelabo mwânà wa mu masandi, wa nanku awu, mu disangisha dya Mukalenge yèyè

kaakumubwelaku to, too ne ku nkongo dikumi ne inaayi. Ne bidimu makumi anaayi ke bidi byenza lukongo lumwe. Nebiikale bidimu nkama inaayi kumpala kwa mpekaatu awu kuumukaye mu Izaleela.

<sup>75</sup> Nzambi utu mukine mpekaatu! Mmunyi mûdì mwa kuswa kudyatakaja ku makàsà Mashi a Cijila a Mukalenge Yesu, ne anu bwalu udi wa mu dingumba kampanda, mutekemene ne neubwele? Nebikengele wêwè kukumbaja mikiiya ya Nzambi anyi kwadyakubwelaku to. Cya bushuwa. Mulami, muyiishi, citudi mwa kwikala cyònsò aci, kacylene ne cidici cyenza mu ebu bwalu to. Udi ulwa bilondeshile mèyi mateeka a Nzambi.

<sup>76</sup> Nkongo dikumi ne inaayi. Muntu mmusòmbe mwaba ewu patudi twakulungana apa uvwa ukokangana naanyi pa ciine aci. Wamba ne: “Kadi mwaba awu mmunyi mutwamanya ne kampanda ngwasungidiibwa?”

<sup>77</sup> Mémè ne: “Mwaba awu ke udi ukengela wêwè kwikala Calviniste mwîmpè.” Dînà dyakafundiibwa mu Mukanda kumpala kwa difuka dya dyulu ne buloba. Nzambi ngudi wangata ndelanganyi ya mu mashi awu. Aci nciMutangile Yèyè. Nwamonu anyi?

“Kadi aci cidi . . .”

<sup>78</sup> Teelejaayi. Nwênù bansonga, leelu ewu, ncyèna mumanye ne nutu nulwa mu ekeleeziya ewu, anyi ne nutu nulwa penyi, nwênù bansongalume ne bansongakaji. Nukaadiku bafike ku dyumvwa ne, bintu binudi nwenza abi, kwôkò kwikale lukongo lukwabo, bânà beenu balela mbiikala mwa kulumbulwishiibwa bwa binudi nwênù nwenza abi anyi? Kanwenaku ne kaneemu kaa nsòmbelu wa kaneemu anyi? Nwênù nsongakaji idi ipatuka pambelu apa mivwale tuputulu tukese etu ne bintu bu nanku nwendakana naabi, nudi bamanye ne, bidi bikadimwenesha pa mwaneebe wa bakaji. Utu mumanye ne kakwèbè mukaji uvwa mukaji wa—wa mvwadilu mubi, ne mamwèbè wêwè uvwa muji wa maja wa uvuula ne bilàmbà, ne ke cidi cyenze ne wikale muji wa maja wa wimansha ne bilàmbà leelu ewu anyi? Cya bushuwa. Beebe bânà nebiikale cinyi? Eyowa’s, mukalenge. Nzambi mmwambe ne Yèyè neanyooke bubi bwa baledi pa bânà ne pa baabo bânà, too ne ku nkongo isatu anyi inaayi.

<sup>79</sup> Ne wêwè ukaadiku mufike ku dyumvwa, mwaneetu wa balume, ne misangu yònsò yûdì wenza cidi cîmpè, necilwe kubadiibwa pa bânà beebe anyi?

<sup>80</sup> Tangilaayi kuneeku, twangataayi Ebelu, mu nshapita wa 7. Bible mmwambe ne, paa—paakatutakeena Melekisedeke ne Abraham pavwaye ufuma ku dishipa dya mfumu, ne kumubeneshaye, ne Mmwambe ne, mpindyewu: “Lewi . . .” Udi wakula bwa difuta dya byadiikumi. Mmwambe ne: “Lewi . . .” wakapeta “. . . dîyi dimutumina kudi Mukalenge bwa kwikalaye upeta byadiikumi bya kudi bânà baabo.” Ne Lewi mwine

uvwa upeta byadiikumi awu, ukaavwa mufute byadiikumi, bwalu ucivwa mu twonyi twa Abraham paakatuutakeenaye ne Melekisedeke. Ne Abraham uvwa kakwëndè wa tatwëndè. Abraham wakalela Izaka, Izaka wakalela Yakobo, Yakobo wakalela Lewi; Lewi, taatu, kaaku, kakwëndè wa taatu. Nenku pacivwa Lewi mu twonyi twa Abraham, Bible mmwambe ne yèyè wakafuta byadiikumi kudi Melekisedeke. Aleluuyah!

<sup>81</sup> Muntu kanwămbîdiku ne mushindu wônsò wa nkwaka pa buloba apa udi mwa kupangishaku mu lukata lunene lwa Nzambi bwa kunyungulukalu to. Ludi anu lutungunuke! Bikaavwa bimana kulongolola anu ku cibangidilu kwaka. Kakwenaku démon anyi badémoms bûngi bukumbane bwa kupangisha ndongamu Wende nansha.

<sup>82</sup> Mpindyewu, Bible katu mwambe ne yèyè wakabifuta “mu mushindu mukwabo” to. Bible mmwambe ne: “Wakafuta byadiikumi,” pavwaye mu twonyi twa kakwëndè wa tatwëndè. Butumbi’s we! Ke wanyi Mukalenge nyawu. Kaa, Yèyè’s ukaavwa mumane kucimanya, kwônsò aku, kumpala kwa dyulu ne buloba kwenjiibwabi. Uvwa mumanye kantu ne kantu kônsò. Ne mu Abraham, ke mwakafucilaye byadiikumi.

<sup>83</sup> Nenku wêwè mwaneetu wa bakaji, wêwè mwaneetu wa balume, mmunyi mûdi mwa kupatuka mwaba ewu lubilu, ne bantu băsòmba ne benda masandi ne bakaji baa bende, bakaji biikale banyanga mbanza, biikale ne nsômbelu wa bwena unudi nende awu, nudi nutekemena ne lukongo ludi lulonda nelwikale cinyi? S’ke cidilu eci. Lukaadi lukafike mpindyewu kakuyi ku cîngà cintu to anu ku musumba wa bânà baa mu masandi, balela mu bukooya, mushiki wa dinyanguka. Nenku nkushaadile cintu anu cimwepele bwa lwôlò alu, ndituku dya bombe wa tupwishipwishi ditudi ne mwoyi edi. Aci ke cya bushuwa menemene. Tukaadi ku cikondo cya kunshiikidilu.

<sup>84</sup> Mu dinda emu, mwamwa mu tukuna twa Kentucky, muvwa musômbe mwânà wa balume mukese mukwabo, kuyiku mwa kuseemena pavwaye apu mu makàsà dikumi [mètres 3] to, mwikale wenza byapanshi bya nsukaadi bya mamvwa a tumbûyi. Pămwăpa kayi nansha mumanye kusunguluja ne diboko dya balume ndyèpî ne dya bakaji ndyèpî to. Paakumvwaye...Mvwa mukasambuke mu bitupa bya buloba bikandika bwa kupicilamu. Ncivwa mumanye ne mvwa nsanganyiibwa penyi to. Mvwa anu mu bimwe bya bibandabanda. Nenku mvwa nya kuntwaku bwa kutwa buluwà bwa nshindi. Kadi pângàvu kusômbe mwaba awu, mêmè kubanga kuyiikilangana nende. Ke nsongalume awu kwambaye ne uvwa ujinga kuya ku busalaayi. Nenku mêmè kulwa kujandula, patwakabanga kwakula bwa Mukalenge, ke yèyè ne: “Muyiishi, wêwè kwèna witabuujaku peebe ne tukaadi ku cikondo cya kunshiikidilu?” Lwa mu mikuna ya kwaka yaya.

<sup>85</sup> Mémè ne: “Ncya bushuwa, ke kutukaadi. Cya bushuwa, mwanaanyi, tukaadi ku cikondo cya kunshiikidilu.”

<sup>86</sup> S’ke twètù aba. Ke dyôdì dîbà ditudi ne mwoyi edi, wêwè mwaneetu. Pa kaaba aku ke patukaadi apa. Kwêna mwa kumonaku muvwa baamaamu baa kale wawa, ne baataatu, nsòmbelu uvwabo nende, ne kaaku mulume ne kaaku mukaji? Kwêna mwa kumonaku nsòmbelu uvwa nende papa ne maman? Kabyena bikemesha to patudi tusanganyiibwa mu dinyanguka leelu ewu edi. Kabyena bikemesha to, udi mufwanyine kuyiisha mutu wamba kutuuka; nebatungunuke ne kuvwala tuputulu anu mwabo ne kale, baktwila ne mate mu mpala. Nebakoke mfwanka kadi kukupwidijila mwîshì, bamba ne: “Amba yebe.” Bwa cinyi? Bwalu aci ke cisamba cidibo bapatukile. Némfikè ku cyôci aci, buludi, *Dimiinu Dyà Nyòka*. Netujandule ne yêyè awu udi udifinda bwa kubwela penyi, tumone ne mbwa cinyi badi benza maalu mushindu awu. Bôbò mbânà ba dyabulu kacya anu dyulu ne buloba byafukiibwa. Ncya bushuwa. Nenku katwenamu ne cintu nansha cimwe, cidi cishaale pa bwalu abu to, nenku anu cilumbulwidi ke cintu cimwepele cidi cishaale. Katwena mwa kwikala ne cingà cintu to anu cilumbulwidi. Nzambi neikale anu mwa kutuuta cintakanyi cyônsò kucyela pambelu. Nenku bantu mbôbò biine badi badyênzèlecì. Nzambi kavwa ne dijinga dya kwilakabi mushindu awu to, kadi Yêyè uvwa mumanye ne nebiikale mushindu awu. Ke bwa cinyi Yêyè wakamba ne: “Neaseeswishe bônsò bavwa basòmbèle pa buloba bujima, pa kuumusha beena mênà adi mafunda mu Mukanda wa Mwoyi wa Mwânà wa mukooko kumpala kwa difuka dya dyulu ne buloba.”

<sup>87</sup> Tutangilaayi bwalu abu. Tubalaayi baseemene kumpala ndambu mpindyewu. Mpindyewu, mpindyewu ndi ngela meeji ne tudi ku wa 12.

*Nenku nsengu dikumi iwàmònu ayi mbamfumu dikumi, badi kabayi banji kupeta bumfumu to; kadi badi bapeta bukookeshi bu bamfumu munda mwa dîbà dimwepele pamwe ne nyama wa lwonji.*

*Bôbò aba nebiikale ne meeji amwe, ne nebafile bukookeshi bwabo ne dikanda dyabo kudi nyama wa lwonji.*

*Ne bôbò aba nebalwishe Mwânà wa mukooko mvita, kadi Mwânà wa mukooko neabacimune: bwalu yêyè udi Mukalenge wa bakalenge, ne Mfumu wa bamfumu: ne aba badi nende badi—badi babiikidiibwa ne, basungula abu, ne beena lulamatu.*

*Ke yêyè kungambila ne: Mâyì awàmònu awu, padi ndumba musòmbe apu, mbisamba, . . . misumba, . . . matunga, ne myakulu.*



*...nsengu dikumi iwămònu pa mutu wa nyama wa  
wonji ayi, yôyi eyi neyikine ndumba awu, . . .*

<sup>88</sup> Tangilaayi aci mpindyewu, “nsengu dikumi” eyi, makalenge dikumi aa. Nudi numona, mwômò amu ke mudi byônsò bikuupukila, cidi bamfumu baa cimbambila aba biikale. Tangilaayi numone kudi bamfumu baa cimbambila biinamine. Cyôci aci nciinamine penyi? Anji—anji ngambilaayi mfumu wa cimbambila utu kayi mwinamine ku communisme. Nwamonu anyi? Nenukù bôbò (nebënzè cinyi?) nebakine “ndumba awu,” mukaji awu, ekeleeziya awu. Kadi cinyi? Tangilaayi numone ne ncinyi cyenza cyôci aci.

*...yôyi eyi neyikine ndumba awu, ne neyimushiye  
dibungama ne butaka, ne neyidye munyinyi wende, ne  
neyimwoshe mu kapyà.*

<sup>89</sup> Nebakupule cintakanyi aci pa karta, bushuwa menemene anu mûndi mêmè mwimane mwaba ewu emu. Bu nanshà ne tuvwaku ne dîbà dya kwangata cyena bwalu aci cya ekeleeziya awu, ne kucilondesha mu Mifundu kuumuka eku kutwa eku, mwaba udiWu mwambe, tubala ne: “Bamfumu bônsò baa pa buloba ebu, ne bendeshi bônsò baa mazuwa a mâyi, ne bônsò, badi badila myadi mikole, bwalu Baabulona munene mmupete kabutu kende mu dîbà dimwepele.” Dîbà dimwepele, cikondo cyende kulwaci! Nenukù, kaa, mushindu mwine udiWu mwambe ne: “Sankaayi, nwènù bansantu, ne nwènù baprofeta baa cijila, bwalu Nzambi wasombwedi mashi a bansantu ne a bânà beenu pambidi pende.” Nwamonu’s, aci ncyà bushuwa. Bushuwa, communisme mwikale ukwata mudimu anu pa wôwò mu byanza bya Nzambi. Anu muvwa Mfumu Nebukandeneesa mukwate mudimu pa wôwò mu byanza bya Nzambi, mu dilwa kukwata beena Yuda abu, paakatukabo mu njila! . . .? . . .

<sup>90</sup> Nenukù mpekaatu udi mwa kutungunuka ne kufila dinyanguka, dimiinu dyakane didi anu mwa kushaalamu ne dimiinu didi mwa kutungunuka mu dinyanguka, dinyanguka anu kunyanguka too ne paanyima paa cikondo paadi kujima. Didi dikafika pa kaaba kampanda, bwalu baamamwâbò ne baatatwâbò bavwa ne nsômbelu wa mushindu awu kumpala kwetu twêtù, nenukù mu mushindu awu, too ne padiku kakuciya kutushaadila kantu nansha kamwe to. Kadi nudi bamanye cyakamba Yesu? Yèyè kayi mwipidije mudimu to, nkufwanyine kubenga kwikala muntu wa musunya nansha umwe udi mwa kusungidiibwa.

<sup>91</sup> Nudi mwa kumona anyi? Nudi mwa kumona ne mbwa cinyi tudi bapete bôbò aba anyi? Kî nkadyuwu ngenza nansha. Ba-Arthur Godfrey ne bônsò abu, nudi bamanye, nwamonu’s, ne ba-Elvis Presley, ne—ne dijeekeja dya nyima, ne binsalabeeta, ne nsuki mipweke too ne mu dikoshi, ne mishindu yônsò idi bansonga benza maalù eyi. Bidi byenza cinyi? Ncinyi ciine aci?

[Mwaneetu Branham udi utuuta bintu pa cyambilu misangu dikumi ne umwe—Muf.] Mbwalu bidi bifumina ku musumba wa baakabadyanjidila, bantu balela mu masandi. Kakwena cidi cishaale nansha cimwe to! Kaa, nebiimane kuulu kadi kwimba ne: “Pèpì, Nzambi wanyi, pèpì Neebe,” benze bu Ernie mwaki wa nkunde ya myongodi ewu ne bakwabo bônso abu mushindu awu, bimba kasala kaa mushindu kampanda, ne bikwabo mushindu awu. Mwaneetu, udi mumanye mudi bwalu? Aci, kakuyi mpatà to anu lubombo pa lwôlò. Eyowa’s, mukalenge.

<sup>92</sup> Muntu kêna ne bwalu bwa dyenza mu cyambilu emu to piikalaye upatuka pambelu paapa ukaja maja a rock’n’roll ne boogie-woogie ne bintakanyi byônso bya mushindu wawa byabya. Kêna ne kantu nansha kaa kânà kaa dyenza paanyima paa cyambilu apa to. Ewu mwaba ngwa baakwidi, aba badi Nzambi mubiikile. Bambi babiikila kudi Nzambi ke badi bakumbanyine paanyima apa. Nenu kabeena mwaba ewu bwa bintakanyi bya mushindu awu to. Ke lutatu ludiku mu bwalu abu leelu ewu ndwôlò alu, mbavwije ekeleeziya kayi cintu cishiilangane ne cisumbusumbu cya bantu to. Cisumbusumbu cya bantu cidi anu cimpè, paudi muswe kwenza aci’s, abu budi anu mbwebe. Kadi anyisha nkwambile, kudi dishiilangana dinene pa kuteeta . . . pankaci paa cisumbusumbu cya bantu ne ekeleeziya. Eyowa’s, mukalenge. Paudi muswe kwenza bintu abi mu cisumbusumbu kampanda cya bantu, ne kwikala ne mafesto a mishindu yônso awu ne bikwabo, abu budi anu mbwebe. Kadi, mwaneetu, s’bivwa bikengela ekeleeziya akombiibwe kubangila anu ku cyambilu too ne mu nzubu wa mwinsi mwa buloba. Ncya bushuwa. Ncyêna nswa kwamba dikombiibwa dya ne madidiishi mapyamapya ne bikampanda bikwabo to. Ndi nswa kwamba ditabuluja dya cyena kale, dituma kudi Nzambi diikala mwa kutangalaja cintu aci kuumukila ku elu luseke kwobeka ku lukwabo. Eyowa’s, mukalenge. Bu mudi kuteemesha kwa bukênkè, bukênkè bwa nzembu pa musumba wa mpenzu mikungwile pa cizubu cya cimuma cya pomme. Eyowa’s, mukalenge, yôyi’s neitangalake padi anu bukênkè buteema.

<sup>93</sup> Mpindyewu tangilaayi: “Badi ne meeji amwe, bafila bukookeshi bwabo.” Nkaadi kwinshi kwa aci mpindyewu. “Nsengu dikumi ayi.” Eyowa’s, mpindyewu.

*Bwalu Nzambi mmuteeke mu myoyi yabo bwa kukumbajabo diswa dyende, (ke bwalu mbwabu’s), ne bwa kupetanganabo ku mêyi, ne bwa kufilabo makalenge abo kudi nyama wa lwonji, too ne piikala mêyi a Nzambi ne cya kukumbana.*

Mpindyewu, ne mukaji uwâmònu awu udi ncimenga cinene, cidi cikookesha pa bamfumu bônso baa pa buloba.

<sup>94</sup> Mpindyewu, kabyena bikengela kutwa mu nsampu kutwa mu kaleji to, tudi bamanye ne mbalombodi baa myânzù baa Katolike. Kabyena bikengela bwa muntu. . . Mêmè ndi—ndi ngitabuuja aci ne mwanyi mwônsò anu mûndi ngitabuuja ne ntu nkaadi mupete Nyuma Mwîmpè. Ndi nciitabuuja bîmpè menemene anu mûndi ngitabuuja ne ndi mwena Kilisto mwimane kuulu mwaba ewu leelu ewu, bwa ne balombodi baa myânzù baa Katolike abu badi—badi. . . Nsesa ya Vatican ke cimenga ciine cidi cisômbe pa tukuna mwandamutekete aci. Balombodi baa myânzù baa ekeleeziya abu ke bôbò abu badi nyama uvwaku, ne udi kayiku. Ke Baabulona mwine. Ncintu cyônsò cidi cileejiibwe anu bîmpè menemene mu cimfwanyi, anu menemene kuumukila eku too ne eku kwa Mifundu. Cidi ng'ekeleeziya wa Katolike.

<sup>95</sup> Mpindyewu, mpindyewu kaaba keenu kadi kapapulangaana nkôkò aka. Udi wamba ne: “Ee, kî mmêmè ûdî ulenga to, Mwaneetu Branham.” Kadi imana nkukonke cintu kampanda. Twalukilebi ku mvensa wa 5 tûng.

*Ne pa mutu wende pavwa. . . pafunda ne: BWALU  
BUSOKOKA, BAABULONA MUNENE, MAMWÈNDÈ  
WA BINYANGU. . . MAMWÈNDÈ WA BANDUMBA  
NE BINYANGU BYA PA BULOBA.*

<sup>96</sup> Yêyè uvwa cinyi? M-u-k-a-j-i w-a m-a-s-a-n-d-i. Kabidi uvwa m-a-a-m-u. Cinyi? M-a-a-m-u. Uvwa mulele cintu kampanda. Maamu wa bânà baa balume anyi? Wa bandumba! Ndumba nganyi? Cintu anu cimwecimwe ne—ne mukaji wa masandi, mukaji wa nsômbelu mubi. Cidi cimuvwiye mwena nsômbelu mubi ncinyi? Dilongesha dyende. Uvwa udyamba muvwaye ekeleeziya wa cyena Kilisto, kadi mwikale wabanyinangana mêyi maswika makwatakaja kudi bantu. Nunku s'nyêyè ewu apa wamba muvwaye ne. . . Piikalabi ne yêyè nguvwa bulongolodi bwa kumpala, nanku's bidi bimweka ne kudi makwabo malongolodi mapatukile munda mwende. Yêyè uvwa mamwëndè wa bandumba. Ncya bushuwa anyi? Mamwëndè wa bandumba. Kavwa mwa kwikala, mpindyewu, mamwëndè wa bânà baa balume to. Kavwa mwa kwikala maamu. . . Civwa ne cya kwikla mamwëndè wa bakaji. Nunku, piikalabi ne bavwa bakaji, bavwa maekeleeziya. Mpindyewu tujandulaayaaku. Ncinyi cyakapatuka munda mwa. . .

<sup>97</sup> Bulongolodi bwa kumpala buvwa ncinyi? Ekeleeziya wa Katolike. Bulongolodi bwibîdi buvwa ncinyi? Luther. Bulongolodi bwisâtù buvwa ncinyi? Zwingli. Bwakaya kafika too ne ku cinyi? Calvin. Nunku kuya kabwelabi mu ba-Anglicans, nunku ku ba-Anglicans kuya kabwela mu ba-Méthodistes. Ba-Méthodistes, cyakapatula ba-Méthodistes ncinyi? Mwômò amu mwakapatukila Alexandre Campbell. Mu Alexandre Campbell ke mwakapatukila John Smith. Mu. . . Alexandre Campbell ke ekeleeziya wa beena Kilisto; pashiishe,

baakapeta ekeleeziya inaayi anyi itaanu, ekeleeziya wa Kilisto ne tusumbusumbu tukwabo twónsò tukese atu e kupatukilamu. Pashiishe ke ekeleeziya wa ba-Baptistes ulwalwa ewu, ke kwabulukaye mu tusumbusumbu tukese bûngi bu ntunda ne ngenene. Ke mu ekeleeziya wa ba-Méthodistes kupatukamu. . . mu ekeleeziya wa ba-Méthodistes, kupatukamu, kumpala kwakalwa ekeleeziya wa ba-Méthodistes baa ba-Wasléyens, ke pashiishe kupandulukanganabo misangu inaayi anyi itaanu. Pashiishe kulwaku ba-Méthodistes baa mushindu mukwabo paabo, ne pashiishe kupandulukabo cyakabidi, pashiishe kukafikabo ku ba-Méthodistes Badishikamine. Ke—ke pashiishe kuumukila ku aci kufikabo ku ba-Nazaréens. Nenku kuumuka ku ba-Nazaréens kufikabo ku ba-Pèlerins de la Sainteté, ne kuumuka ku ba-Pèlerins de la Sainteté kadi kuya biyiidi. Anu tusumbusumbu tukese twenda tupatuka mushindu awu, tutungunuke anu nanku twènda tûya, kónsò kaa ku tuumatâmbâ tukese—tukese atu kuntwaku kulwaku kenda kapatuka. Kadi cyakenza umwe ne umwe wabo ncinyi? Ke ndekeelu wa byônsò byôbi kuya kuupukila mu Mpenta.

<sup>98</sup> Kadi cyavu Mpenta kwenza ncinyi? Cintu anu cimwecimwe cyakenza mamwâbò aci, kwalukilabo e kudyenza bulongolodi. Kadi wakalwa cinyi? Di—dingumba. Wèwè bwela anu mu dimwe dya kudiwu aku, cyakumpala cidi ne: “Dilongesha dyebe didi cinyi?” Balumyana wa yaaya, badi bakuumisha mate a mukana, nwamonu’s, bwa kujandulabo ne wèwè udi cinyi, cyûdi witabuuja ncinyi. Kadi wèwè kuyi upetangana naabo mu byônsò to, mwaneetu, badi bakwipata anu mwaba awu. S’ncyá bushuwa.

<sup>99</sup> Kadi kwikadi wadyambidila ne bwalu udi wamba ne udi mwena Mpenta nanku udi mu dikubiibwa to. Mwaneetu, nekwikale beena Mpenta bûngi cyanaana bapambuke mu njila anu mwikalaku badi mu njila, ke mûndi mêmè mutwishiibwe. Nwamonu anyi?

<sup>100</sup> Mpindyewu, malongolodi ônsò awu, biikalapu nanshà balekele dibenesha dya Mpenta ditungunuka, kabayi badiwija bulongolodi to, kudilama anu mu bwânà bwetu ne kulekela Nyuma Mwîmpè utapulula. Nyuma Mwîmpè ke utu utapulula. Ananya ne Safira baakabwela musangu kampanda, kwambabo *bikampanda ne bikansanga*; kadi Nyuma Mwîmpè kwamba ne: “Nwadingi bwa cinyi?”

<sup>101</sup> Kadi twètù tudi twamba ne: “Mpindyewu, awu’s m’Mwaneetu Jones, kanumwambiku kantu kabi nansha kamwe to mpindyewu, ke muntu udi ufilaku dintamfu dya mfranga dipite dya bônso mu ekeleeziya. Ndi mumanye ne yèyè udi ne Nyuma Mwîmpè; nkaadi mumuumvwe wakula mu myakulu, ne nkaadi mumumone wela mbila mu Nyuma.” Aci kî nicipite dipongolola dya nkunde pa ciseba cya ngombe cyûme to. Nwamonu anyi? Kabyena nansha ne dipetangana to. Nzambi

ngudi ne díyì dya kwamba. Yêyè ngudi ne cya kwamba ne yêyè awu udi nanku anyi kèna nanku. Kakuyi mpatà to. “Kadi’s tuvwa bacyängàcìle mu dingumba dyetu. Ee, tudi bamwipate mu—mu Assemblées, ba-Unitaires paabo bumba bamwangata.” Ba-Unitaires benda nende ndambu, pashiishe kumwipatabo. Bwalu, badi bamwakidila mwine amu, pashiishe beena Yesu Nkaayende bamwangata. Beena Yesu Nkaayende benda nende ndambu, kadi pashiishe cintu cìdì cilondà cìdì cimwangatà ke église de Dieu, umwangata pende. Église de Dieu de la Prophétie umwangata pende, ke nkwaka wa Tomlinson umwangata pende. Kaa, ekelekele! Mwaneetu, amba túng ne katwena peetu bashiikile! Ciine aci mmu Mpenta’s, ditabuluja dya ndekeelu diine. Nenku mpindyewu bakaadi ne Ludimi lwa mudilu lwa Bleu, bakaadi kabidi ne bakuukwidi baa maanyi, ne—ne baa mashi mu mpala. Kadi, kaa, luse we, ncyèna mumanye kukaadibo baye patudi twakulangana apa.

<sup>102</sup> Cintu cimwepele cyanaana, ke cintu mu kaabujima cikaadi cinyanguke. Nutu bamanye ne Bible utu mwambe ne necifike ku dinyanguka anyi? Nutu bamanye ne—ne Bible udi wakula bwa dituku edi, ne nediikaleku, diikalàbi ne nansha meesa a Mukalenge miine neikale mûle tente ne bilushi? Mmwambe ne: “Nganyi úndì mwa kulongesha dilongesha? Nganyi úndì mwa kufikisha ku dingumvwa Mémè? Bwalu bidi ne cya kwikala kanungu pa kanungu, pa kanungu, mulongo pa mulongo.” Nganyi udiYe mwa kulongesha dilongesha? Ng’aba badibo balekeeshe dibeele, dya maman. Nwamonu anyi?

<sup>103</sup> Mpindyewu, kakwena—kakwena mukaji, mukaji nansha umwe wa maalu makole mu cimenga emu udi kayi mufwanyine kulela mwànà wa bakaji virgo to. Udi virgo padiye ulediibwa, mpindyewu, kabidi udi mwa kuya anu bîmpè. Kadi kuyi mutangile bîmpè to, byôbì ne mamwëndè uvwa ne ngiikadilu awu, mwànà wa bakaji awu, misangu citeema pa dikumi, neenzè maalu menemene anu mudi mamwëndè wenza. Mpindyewu, nudi bamanye ne aci ncyà bushuwa. Mukaji mukulumpe mwikale ulombola nzubu wa bakaji baa luumu lubi, mmufwanyine kulela mwànà mukese wa bakaji. Mmufwanyine kwikala ne bidimu dikumi ne bisambombo, mukezuke mwikale ne nsòmbelu mwîmpè anu mudi wa mbata, kadi, amba anu yêyè mushaale mushindu awu’s. Kadi, bwalu budi ne, udi walukila cyanyima kadi kubanga kwenza maalu anu bu mamwëndè.

<sup>104</sup> Mpindyewu, ekeleeziya wa Katolike ke ndumba wa kale udi mupatuke ne malongesha adiye mudyènzèle, miitabuua a majimbu, miine awu, Bible mmwambe ne: “Mmupatuke mu biinà bidi kabiyi ne nshiididilu ne neapingane ku kabutu.” Bible ngudi mwambe nanku. Mpindyewu, bôbò balongesha nanku, mbya mafi. Mbya mafi, bilondeshile Díyì dya Nzambi. Pashiishe ke ekeleeziya wa ba-Méthodistes ulwalwa ewu, mulediibwe munda mwende yêyè, nsongakaji mulenga kwisù,

kadi cyakenzaye ncinyi? Wakakudimuka kutangila paanyima ne kwenza anu bintu bimwebimwe bidi maman wende wenza abi. Ulekela beena disangisha dyende bavwala tuputulu. Ubalekela banwa mfwanka. Ubalekela benza maalu a lukutukutu ne benza anu mudibo baswe amu. Kakwena cidibo bamba pa bwalu abu to. Kampaasata kaa kale kenze bu dyâmpà dyosha aku kiimane paanyima paapa, paanyima paa cyambilu paapa, kiikale ne bwôwà bwa ne nekajimije difutu dyaku dîngà dituku, anyi dilongo dyaku dya bisukwita.

<sup>105</sup> Leka's nkwambile, mwaneetu, s'mbicipiciibwe ne mêmè muyiishe Evanjeeliyo, ndya bisukwita bya mukèlè mwikale nnwa mâyi a ku musulu, kadi ngamba Bulelela pa bwalu abu. Muntu ne muntu wa mu disangisha dyanyi mujuuke mupatuke e kuya, mêmè nêmbâmbilè Bulelela pa bwalu abu. Eyowa.

<sup>106</sup> Mbwalu kaayi ebu? Kaa, nkwende kudiye udiila. "Ee, udi mumanye's, mêmè's ndi mpaasata wa ekeleeziya udi mutambe bunene mu cimenga." Nwênù ba-Baptistes ne ba-Méthodistes nudi nuteelja muprofeta wa mashimi. Mpindyewu, aci mmakoyi, kadi cyônsò cidi cilongesha bibengangane ne Bible mmuprofeta wa mashimi. Nansha ciikale cya kapelu mushindu kaayi, nciprofeta cya mashimi. Ncya bushuwa.

<sup>107</sup> "Kaa, byônsò's bidi anu bîmpè bu mudibi ne dînà dyebe didi mu mukanda." Udi mufwanyine kwikala ne dînà dyebe difunda mu mikanda dikumi ne ibidi. Piikaladi kadiyi mu Mukanda wa Mwoyi to, udi mujimine! Udi mwa kwikala mwîmpè menemene, udi mwa kwikala ne lulamatu lwa menemene ne mukezuke ne nsômbelu mwîmpè wa kapelu, abi kabyenaku bipetangana nansha ne cyôci aci to.

<sup>108</sup> Esawu uvwa mupite Yakobo misangu ibidi, bwa bivwa bitangila kwikala muntu mulume, kucyuka tatwëndè mpofo ukaavwa mukulakaje awu ne bikwabo byônsò. Kadi Yakobo kavwa kenji kaa maalu makonyangale kacya anu kaalebelela kwinshi kwa mapuupila a mamwâkù, kânà kaa balume kiikale cilumaacikaji. Kadi Nzambi wakamba ne: "Ndi munange Yakobo mubenge Esawu," kumpala kwa bânà baa balume abu bônso babidi kulediibwabo. Ke cidi Loomo wamba. Ncya bushuwa menemene.

<sup>109</sup> Nzambi mmumanye cidi mu muntu. Yêyè mmumanye cidi mu ekeleeziya, kabidi. Tudi ne mwoyi ku Dyâmpà dya Mwoyi, Dyâmpà dya Dìyì dya Nzambi. Mpindyewu, ke cidi cyenza ne katwikadi dimgumba nansha.

<sup>110</sup> Mpindyewu ndi njinga kunupa kakwabo kantu kakese... Ndi njinga kunupa kaacifwanyikijilu kakese kâmvwà mufunde mwaba ewu. "Munene..." Mpindyewu mu Bwakabuulwibwa, mu 19.2. Ndi ne cintu kampanda cifunda mwaba ewu. Ndi muswe ntape dîsù bwa mmone ne ncinganyi.

*Bwalu dilumbulwisha dyebe ndilelela ne dyakane: bwalu yêyê walumbulwishi mukaji munene wa masandi, uvwa unyanga buloba ne masandi ende, ne yêyê wamanyi kusombwela mashi a basadidi bende ku cyanza cyende. (Ke ndekeelu wa ekeleeziya wa Katolike nyêyê awu.)*

<sup>111</sup> Mpindyewu, tudi tukeba kabidi bwa numone, apa kabidi, ne dingumba—ne dingumba ndijandudiiibwe kabidi mu Mifundu mwaba ewu, ne... Ne Bible mwine katu wakulaku bwa dingumba to. Dingumba ndyumukile ku ekeleeziya wa Katolike. Yêyê ke mamwëndê wa kumpala wa dingumba, ke dingumba dyônsò kulediibwadi. Mpindyewu eci neciikale mwa kununyingaku kaacizadi. Neciikale mwa kununyinga kaacizadi kakole dibà dyônsò, nudi numona's. Kadi ndi—ndi muswe numone ne mangumba kaàvwa malela anyi mateeka kudi Nzambi nansha. Mmateeka kudi dyabulu.

<sup>112</sup> Ekeleeziya wa Nzambi udi... Twêtù katwena bakosoloke to, tudi bônso mubidi umwe; ditekemena dimwe ne dilongesha dimwe, umwe mu dinanga. Ke Ekeleeziya wa Nzambi udi ne mwoyi nyawu. Nansha kwikale, bintu abi, tudi umwe pamwe! Ncya bushuwa. Nansha yêyê mwikale Méthodiste anyi Baptiste, mwaneetu, piikalaye mulediibwe cyakabidi ne mûle tente ne Nyuma Mwîmpê, mmwaneetu. Tudi twenda batwangane makaaya. Cya bushuwa. Eyowa's, mukalenge. Kabyena ne cidibi bishintulula to.

<sup>113</sup> Môsà. Misangu mikwabo ntu nkenzakana ngamba ne: "Udi mumanye musumba wa beena Mpenta bakoleshi baa maalu abu, Mwaneetu Branham, mbwa cinyi udi mufwanyine kwikala kupatuka ne musumba wa mushindu awu?" Nudi bamanye kudi bwalu? Môsà uvwa utuma mèsù ende pa bânà baa Izaleela. Uvwa utangidila ku dididiishi dimwedimwe divwa Pâlò utangidila pende adi. Pâlò uvwa ubatangila bu musumba wa basopi baa bitoci, kadi Môsà uvwa ubatangila bu basungula baa Nzambi. Uvwa mumanye ne bavwa ne mulayi. Bwa cinyi? Uvwa mucimanyine ku Diyì. Ne ku diitabuuja... Mwikale ne dikàsà pa nkwasa wa butumbi, bwa kushaalaye Pâlò, ne buloba bujima busanganyiibwa ku makàsà ende, ùsòmba mwaba awu upongolola mvinyo mukana mwende, ne bakaji balenga kwisù biikale bamwela lupeepele, yêyê bu mukalenge munene, anyi mfumu wa cimbambila, anyi mfumu wa buloba bujima, Môsà mwânà awu, ne bidimu makumi anaayi, mwikale ne biine abi mu cyanza cyende. Utuma mèsù pambelu utangila musumba wa basopi baa bitoci abu, kadi kujingululaye ne uvwa umwe wabo. Aleluuyah! Ke cyôci aci. Wakajingulula ne uvwa umwe wabo. Nenku anu ku diitabuuja, nkaayaadi, kusungulaye!

<sup>114</sup> Bikengela muntu ne muntu ênzè disungula. Bikengela wênzè disungula. Newênzè disungula mpindyewu. Newênzè disungula mu dinda. Newênzè disungula maalaba diloolo, pawikala ne

mwoyi. Bikengela wènzè disungula kumpala eku. Mwaneetu, kukaadi ntanta mule kúnkaadi mèmè musungule. Bible ewu ke uvwa wanyi mukanda wa mbumbilu wa myaku. Bible ewu ke uvwa wanyi Mukanda wa Mwoyi. Bible ewu ke uvwa Dìyì dya Nzambi. Ku Bible ke kùndi mèmè ne mwoyi. Bible ewu ke kwanyi kùndi mwimanyine.

<sup>115</sup> Ke bwa cinyi, Mòsà uvwa ne mèsù ende matangija pambelu pa bânà baa Izaleela. Kavwa anu wamba ne: “Kaa, badi cisamba cilenga be. Ncyêna naabo cilumbu to. Kaa, to, ncyêna mufwanyine kwikala ne dîyì dibi nansha dimwe dya kubamba to.” Mushindu awu ke udi bantu bààbúngì benza lelu ewu. “Kaa, beena Mpenta ne bantu badi bapete Nyuma Mwîmpè baba, ne bantu badi biitabuuja dyondopa dya kudi Nzambi baba, kaa, mèmè—mèmè—mèmè ncyêna naabi cilumbwee.” Kadi Mòsà kavwa nanku to. Yêyè wakalekela Ejipitu kadi kushaala umwe wabo. Wakapatuka kuyaye munkaci mwa bânà baabo. Uvwa umwe wabo.

<sup>116</sup> Mwaneetu, ke kùndi mèmè ewu ndonda wanyi njila. Mèmè nêndondè njila pamwe ne banyaabanya badyombola baa Mukalenge, nansha biikale dyanza dimwe, nansha cinyi. Badi ne mulayi, ne ndi mmona mênà abo mu Mukanda wa Mwoyi wa Mwânà wa mukooko. Mbânà beetu. Ncyá bushuwa. Enza peebe disungula wimane ku luseke lwabo. Nansha bôbò mu bulelela anyi mu ntupakanyi, nansha nanku wêwè imana anu ku luseke lwabo. Piikalabo mu ntupakanyi, ubakwacishe ubafikishe ku bulelela. Cya bushuwa. Kwakubavwija baakane mu dibatwa misebe ubasaka eku ne eku to. Udi umona, uditacishe bwa kubakoka kubapatulamu.

<sup>117</sup> Charlie, anu muvwabo bamba bwa Mwaneetu Allen, bwa mudilu uvwabo . . . mashi mu byanza. Mèmè kwamba ne: “Kacya, kacya ncituku mudyombole A. A. Allen to.” Mèmè ne: “Bu mèmè mwa kuyiisha bu A. A. Allen, ncyênaku mufwanyine kwenza disangisha dya dyondopa to.” Mpindyewu, pakaadiku ne mbwa dibenga kupetangana pa bidì bitangila mashi bu ne ke cileeji cya Nyuma Mwîmpè, mu byanza byebe, mèmè nêmbenganganè ne aci. Kadi pakaadiku ne mbwa bwânà bwetu, yêyè mmwaneetu. Ndi ngimana nende batwangane makaaya mu mvita. Ncyá bushuwa. Yêyè mu ntupakanyi, nênditacishe bwa kumukwacisha. Piikalabi ne kî nyêyè udi mu ntupakanyi to, mèmè nî ngudi mu ntupakanyi, ndi muswe bwa yêyè ankwacishe. Nenku mushindu awu ke utudi twenda—twenda mu dipetangana. Mpindyewu tangilaayi apa.

. . .uvwa *BWALU BUSOKOKA, BAABULONA* . . .  
*MAMWÈNDE WA BANDUMBA* . . .

<sup>118</sup> Mpindyewu nudi numona mudi ekeleeziya lelu ewu, nwènù balunda baanyi, nudiku mwa kumona mudi ekeleeziya eyi lelu ewu ne nsômbelu yônsô naka udiyì miswe kwikala



nende awu anyi? “Bidi anu bîmpè menemene, ndaayi anu kumpala,” ngulube udyà ngulube nende, kayi ubucyuka to. “Mona’s, kakwena bwalu bubi pa kwenza nanku to. Mona’s, wêwè ngudi anu uteeta bwa kwikala wa cyena kale.” Tangilaayaaku dilongesha dyabo. Mpindyewu ndi muswe... Tangilaayi mpindyewu. Aci ke cyabo ciibidilu. Nudi numona ne, kukaadi ndambu wa bidimu, anu ekeleeziya wa Katolike nkaayende ke uvwa ne dyanyisha dya kuya kamona sèndemâ anyi? Ekeleeziya wa ba-Méthodistes kabavwaku bafwanyine kutuma meeji ku cintu bu nanku to. Mangumba ônsò awu avwa ne: “To! Abi mbyenzedi bya dyabulu.” Nkaadi ndikonka cyènzèki’s. Eyowa’s, mukalenge.

<sup>119</sup> Kadi nudi bamanye, udi mufwanyine kwangata nsongakaji miine ya beena Katolike ayi, ipatuka miwale tuntu etu... (Mpindyewu, bamwe baa ku nwênù bakulumpe baa bukole bwanyi ebu aba)...bapatuka bamona kantu kakese aka muvwabo ne tupanta tudi tushiikila mu binù atu. Mulumyana awu, ngela meeji, ukaadi mu iferno, diloolo edi. Ncyèna mumanye. Ncyèna mulumbulwishi wende to. Kadi paakenzaye kaamusambu kaa manyaanu kaa kumpala kaakatuka ku cisanji aku, kakayi kakenketa to, ne: “Binyungululaayi, nwênù tukajaana, binyungululaayi; binyungululaayi nupwekelele too ne panshi nuleeje binù byenu bilenga abi.” Mbanganyi badi bavuluke aci dîbà dyakapatukaci musangu wa kumpala, kukaadi bidimu? Ke civwa cilema cya kalèngù cya kumpala anu piine apu. Ncyà bushuwa. Kadi paakateta mwine mulumyana wa ku Texas ewu, ne paakateta labo bakaji abu bavwale tulàmbà twa mwinshi atu bwa kwangatabo mmwenekelu wa cintu kampana civwabo kabayi to, ne bintu bya mushindu awu abi, kadi kubalekela badikolesha ku mwoyi ne biine abi. Kadi mpindyewu cyakenza cinyi? Cyakadifinda’s. Cintu s’nyuma.

<sup>120</sup> Muntu mulume kampana uvwa wakula, dituku dikwabo. Yèyè kwamba ne: “Ncyèna mumanye mêmè ewu cingènà to. Ndi ne mwanaanyi wa balume mwîmpè, wa meeji matooke, kadi mwânà awu udi wangata cyônsò cidiye pende mwa kufika ku ditwa byanza aci.”

Mêmè ne: “Mbwa cinyi?”

“Udi ukadisanga ne mwîvi.”

<sup>121</sup> Paudi ulamakana ne muntu mwikale mwîvi, wêwè mwine peebe newikale mwîvi. Maman wanyi wa beena Kentucky uvwa anu ne ciibidilu cya kwamba ne : “Paudi ulaala pamwe ne mbwa mwikale ne nkùpà, neujuuke mwikale ne nkùpà, wêwè mwine.” Angata—angata mukaji udi kayi mwîmpè to, kadi ulekele mwânà wa bakaji. . .kadi umuteeka pamwe ne mwânà wa balume mwikale mwî—mwîmpè ne wa kaneemu, nenku cintu cya kumpala ciwamona ncyà ne mwânà wa balume awu neikale wa maalu makole anu mudi kânà kaa mbwa. Kudimuna bwalu

abu bwa ewu ne ewu. Badi bakumanyina nku balunda baudi wenda naabo. Tapuluka! “Patukaayi munkaci mwabo,” mudi Bible mwambe, “tapulukaayi!” Ncya bushuwa.

<sup>122</sup> Piikala mangumba abo awu alukila ku dinyanguka dya mushindu awu bu mudi dya kulekela bantu baabo. . . Ee, mwaba ewu dituku dikwabo, mu ekeleeziya munene mwîmpè wa ba-Baptistes, byakakengela bwa bôbò kulekela bantu kuyabo. Kuyiisha anu tusunsa makumi abidi, muntu awu, bwalu bivwa bikengela bwa mpaasata kwanjiye kunwa mfwanka. Disangisha dijima kupatuka pambelu. Bônsò kushaala biimane pambelu apa banwa mfwanka beele milongo, pashiishe kwalukilabo, mpaasata ne bôbò bônsò. Mvwa muye ku ekeleeziya wa ba-Congrégationalistes, kuvwa muntu mwimane, muvwale muzabi munene mule, mwimane mwaba awu, wamba, mweyemene ku cyambilu mushindu *ewu*, ulonda bwalu bwa kaacilongo kaa mushindu kampanda kavwaye musangane pa kakuna. Ke cyônsò paaci civwaku ncyaci, ke kupatukaye. Minu yende mishaaale ya kalaabi ne mwîshî wa mfwanka. Eyowa. Nenku ulonda muvwa bakaji, muvwa balume baya kanaya. . . Dinaya dya ba-Allemands ditubo banaya ne cyôci aci adi ndinaya kaayi, nutu nudinaya bikole mu mushindu wa—wa nwabanyinangana twarta, nudi bamanye? Uvwa. . . Kaa, mvwa ngela meeji ne mvwa mwa kudivuluka’s. Karta kaa belote, bavwa baya kanaya dinaya dya karta kaa belote. Ngela meeji ne mmwômò. Eyo, mmu dinaya adi munutu nutwabanyinangana. Ndinaya dya twarta dyetu dya ciibidilu edi. Dinaya dya karta kaa belote, mu nzubu wa mwinshi mwa buloba! Kaa, Nzambi wanyi! Ke mwaba udi wabo nshindameenu bôbò usanganyiibwa. Kabyena bikemesha to! Ncinyi? Badi benza ciine aci, kadi kwela ekeleeziya wa Katolike cibingu pambelu apa badi biikale mu myaba ya Rotary biikale banaya PMU. Mona’s, nwênù beena Mishônyî’s nukaadi peenu bakooyike anu mudibo amu, mwaba awu cinudi mwa kwamba pa bwalu abu ke cinyi? Lwesu lwa mishila kalwena mwa kwamba mbidika wa diipikila café mudiye “mufiike” to. Nansha kakese. Nudi nwenza biine abi, kadi kwamba ne: “Ee, ndi Presbytérien. Ndi Méthodiste.” Kwêna cintu to paudi kuyi mwanji kulediibwa cyakabidi. Ncya bushuwa. Ne paudi wenza nanku, s’udi mumanye. Kudi cintu kampanda munda mwebe ciikale cikwambila ne bintu abi mbibi, ne neumupatuke anu mudibi menemene ne wêwè udi kapanta kaa kashiikile mu binù bwa dibata. Udi mumanye ne m’Bulelela. Cya bushuwa. Eyowa’s, mukalenge. Cintakanyi aci cidî cyenda pamwe ne cyôci aci. Bwa cinyi?

. . . MAMWËNDÈ WA BANDUMBA . . .

<sup>123</sup> Dimwe dya ku matuku adi panshi aa, maamu mukulakaji ewu neâmbè ne: “Nudi bamanye mudi bwalu? Byôbi biine, s’tudi bônsò anu mwomumwe.” Nenku nudi bamanye ne ncinyi pa dîbà adi? Nsangilu wa Maekeleeziya neabasange bônsò

pamwe bu mudibo mpindyewu emu. Kadi nudi bamanye cyalwa kwenzekela kasumbu kakese bu mudi aka? Nenuyoobe bwa bwalu abu, balumyana. Aci ncyá bushuwa menemene.

<sup>124</sup> Kadi kanuditacishi to, Mwânà wa mukooko neamucimune. Bwalu Yèyè ke Mukalenge wa bakalenge, ne Mfumu wa bamfumu, ne Nzambi ke wálombola Ekeleeziya Wende, pamutu paa dingumba. Neapongolwele Ekeleeziya awu Maanyi a ngòlò a Nyuma Mwîmpè awu pa mutu. Mwaneetu, Kapyá nekapone mu Dyulu, ne bimanyinu ne maalu a kukema nebyenzeke, mu mushindu unutu kanuyiku banji kumona kwònsò eku to. Eyowa's, mukalenge. "Kanuciinyi to, nwênù kasumbu kakese kaa mikooko, diswa dya Taatu wenu ndya kunupa Bukalenge." Eyowa's, mukalenge. "Ewu wananukila too ne kundekeelu awu!" Ke bwalu mbwabu. Tungunuka anu ne kupweka ne njila. Lama mutu webe mpala mutangija ku Kalvariyo. Bible ewu ngwa bushuwa. Kutacishi mwoyi webe to.

<sup>125</sup> Tangilaayi mpindyewu. Kudi bimwe bya ku biibidilu bidibo naabi. Amwe a ku maalu a mu nsòmbelu adibo naawu. Tuvwa anu bafwanyine kutungunuka. Cintu cya kumpala, mbikazololokele mu ekeleeziya ya Mishòdnyì. Pashiishe bakaji baa cyena Katolike babanga ku- . . . Mona's, kabivwa anu bibi bwa kuvwala tuputulu atu to, bu muvwabi ne bavwa baya mu ekeleeziya ne baswika kaacitambala kakese ku mutu. Kaacilele kaa mushindu kampanda ne: "Kanudi munyinyi mu ditànù to." Nenku, kaa, nkwepi kunukaadi bapete ciine aci ne bikengela nuswike citambala ku mutu bwa kubwela mu ekeleeziya? Ndi muswe nundeeje Mufundu awu. Nciprofeta cya mashimi. Mbambe penyi mu ekeleeziya ne udi ne cya kuvwala cifulu mu ekeleeziya? Paudi uvwala cifulu ku mutu webe, udi ufwisha Kilisto bundu, cya bushuwa; nwênù balume, ke bândi ngambila abu. Nwênù bakaji, nudi bulelela ne cibwikilu, kadi nêngèlè ní nganyi ní nganyi yònsò kadyombo bwa kundeejaye mwaba udibi ne ncifulu anyi ncitambala. Nnsuki yebe ayi! Kadi nyawu ukaaadi muyikose yònsò. Mpindyewu udi wamba bishi bwa aci? Kaa, badi bamba ne: "Abi mbya cyena kale." Piikalabi nanku, s'm'Bible! Ne Dîyi dya Nzambi's ndidi dya cya bushuwa.

<sup>126</sup> Mwva mwakule mwaba ewu, kî nkwanji kunenga ntanta to, bwa mukaji wâkasukula makàsà a Yesu awu, mwangate nsuki yende, nudi bamanye, nenku—nenku muàkùpule naayi. Mêmè kwamba ne: "Mushindu umwepele udi mukaji mwa kwenza ciine aci, nkwymanyina ku mutu wende bwa kupetaye nsuki búngì bukumbane bwa kwinamaye ne kuMusukula ku makàsà, kukupula naayi." Ncyá bushuwa. Kaa, bidi, mbya bundu be bwa kumona mushindu udi. . . Kadi mona, ne kuulu kwa mashika makole eku, wenda utambakana muvwale kankooici kakese kaa kapeepele mushindu awu, ne mubidi wende mumweneke butaka.

127 Mpindyewu udi wamba ne: “Bwa cinyi kusuminyinangana anu ne bakaji?” Nwênù bikengela kusuminyinangana neenu.

128 Ne nwênù peenu balume badi balekela bakaji beenu benza ciine aci, mwaneetu wa balume, ndi—ndi mupange too ne meeji miine àndi mwa kukwelela’s. Mpindyewu, aci’s ncyà bushuwa.

129 Ne nwênù bampaasata, ncyêna ngela meeji ne nudi mwaba ewu to. Kadi paudi umona muntu awu, s’udi umwambila bwa kulwaye, kumwambila, alwe kumonangana naanyi. Nwamonu anyi? Piikalaye kayi ne kaneemu kààbûngì bwa Kilisto pamutu paa kulekela beena mu disangisha dyende badikolesha naaci ku mwoyi kabayi. . . Mpindyewu yêyê. . . Mbafwanyine kwikala bacyenzela mu nyima mwende pambelu paapa, kadi padiye kayi ubambilaci to, kî mmwakanyine kwikala musadidi wa Yesu Kilisto to. Ncyà bushuwa menemene. Kî mmwakanyine kwikala musadidi wa Kilisto to. Musadidi wa Kilisto bikengela ikale kayi ne bwôwì bwa cintu to piikalabi ne mvita ayi udi uyilwangeena Bible. Cya bushuwa. Kadi ke bôbò abu’s, badi bapatuka bakabyenza anu mwine.

130 Ne pashiishe, cyakumpala, byakakengela beena Mishòònyì bacyângàtè. Wêwè Méthodiste wa mwîmpè, ne wêwè Baptiste, ne wêwè Presbytérien, anyi Nazaréen, Pèlerins de la Sainteté, ne nwênù bônso, cintu cimwecimwe aci, ncyenze anu cipatuka, kadi kwenzabi maanyi mu nkunde, nkunde mu maanyi. Ke bwalu abu’s: “Mamwëndè wa bandumba.” Dyenu dingumba ne: “Bu mudibi ne mbabangile bwalu abu ku ciimamwëndè wa bukalenge, mbyenze dishiilangana kaayi?” Nwamonu anyi? Bidi byenza dishiilangana dinene dya dikema. Kacitu cibangile aku to, ku Ciimamwëndè wa bukalenge aci. Ncifwanyine kubangila ku ciimamwëndè wa bukalenge cyenu nwênù pa buloba apa, kadi kî nku Cya kuulu Kwaka to. Mbilondeshile anu ku mwaba ùdì wêwè mufumine. Aci ncilelela.

131 Mpindyewu, ncyêna ngela meeji ne tudi ne dîbà dya kwangata bwalu bukwabo ebu to, pàmwápa bikengela mbushiye ebu mu dinda. Eyo, twangataayi anu ebu budi bwîpì ebu. Tudi, mwaba ewu, ne “dibatiiza dya mu mâyi.” Tudi kabidi ne “didyanjila kulongolola,” ne, kaa, bintu byàbûngì. Pa nanku twangataayi anu eci, kantu kakese, kîpì kaa “bayiishi bakaji” aka, nenku twangataayi bwôbò bwalu ebu.

132 Mpindyewu, mpindyewu, wêwè inàbànzà muiyishi, ncyêna njinga kukutapa ku mwoyi to, kadi ndi njinga kukwambila cintu kampana. Kwênaku ne katupa nansha kakese kaa Mufundu to, nansha kamwe mu Bible. Eyo, ndi mumanye kùdì uya aku, ne nkaadi mumane kupeta meeji ebe ònsò awu, eyo: “Ne bânà beenu baa balume balela ne baa bakaji nebâmbè biprofeta.” Mpindyewu, piikala mpaasata webe kayi mumanye cidi dînà edi “kwamba biprofeta” dyumvwija, kî—kî mmumanye cintu to. Kêna ne mudimu wa bushuwa wa kwenza paanyima

paa cyambilu apa to, padiye uteeta kukwambila bwa wêwè kwikala muyiishi apu. Wamonu anyi? Bwalu, kakuyi mpatà to, aci ncipiishiibwe kuumukila anu ku Genese too ne ku Bwakabuulwibwa. Lekela mpindyewu nkuleeje eci, wamonu's.

<sup>133</sup> Mpindyewu ndi muswe wêwè umbuulwile mu Timote wa Kumpala 2.11. Buulula wêwè anu kaaba aka nenku netusangane cyôci eci mpindyewu, ne netucipete, apa kabidi, Byenzedi 2 byebe abi. Eyo. Nenku teeje anu—anu cyanaana kaaba aka cidi Mufundu ne cya kwamba pa ciine cyena bwalu eci.

<sup>134</sup> Mpindyewu, muntu kampanda mmutungunuke anu ne kwamba ne: “Ee, Mwaneetu Branham, cyûdi wêwè utu anu mukinyi wa bakaji wa kwônsò eku.” Mêmè nciyu mukinyi wa bakaji to. Ntu. . . Cîndi mêmè nciyu muswe bakaji biikale bateeta kwangata kaaba kadi kakayi kaabo to.

Nudi bavuluke ku dilobo dya Howard Shipyard eku, dimwe dya ku malobo adi mende luumu pa Musulu wa Ohio? Bavwa bateekeku mukaji bu kapita. Tangilaayi numone cidi cyenzeke.

Mbape mukaji bukenji bwa disungulangana. Tangilaayi numone cidi cyenzeke.

<sup>135</sup> Lekelaayi nnwâmbilè anu mpindyewu mene. Kî ng'anu bakaji bândi ngela mfimbu to. Ndi muswe bwa nwênù balume nûmvwè ne nudi peenu mu bwalu ebu. Kadi lekela nkwambile cintu kampanda, wêwè mwaneetu wa balume. Ditunga edi nditunga dya mukaji. Nêncijaadikilè kûdî wêwè, ku Mifundu, ku cyônsò cyûdi muswe bwa nkujaadikileku bwalu abu. Ncyeci. Cidi cimweneka pa mfranga yetu ncinyi? Mukaji. Yêyè udi usanganyiibwa penyi? Mu Bwakabuulwibwa, mwaba ewu, udi umumona. Yêyè udi nomba dikumi ne isatu, kabidi, cyônsò cyakabangaye; mitooto dikumi ne isatu, tushoonyi dikumi ne tusatu, matunga dikumi ne asatu adi ku bukookeshi bwende. Dikumi ne isatu, byônsò bivwa anu dikumi ne bisatu, twamb'eku twamb'eku. Yêyè udi umwenekela mu nshapita wa 13 wa Bwakabuulwibwa. Mukaji, dikumi ne isatu!

<sup>136</sup> Ne mu 1933, pavwa Mukalenge. . . Patuvwa twenza masangisha mwaba ewu uvwa usanganyiibwa église de Christ awu mpindyewu, nzubu wa kale wa Masonic awu, cikeena-kumona cya kudi Mukalenge cyakalwa kûndi mwaba ewu ne cyakadyanjila kwamba ne “Allemagne neajuuke ne neñze mbu lwa Maginot Line kuntu kwaka.” Bââbûngî beenu mbacivuluke. Ne muvwabo mwa kwikala basanganyiibwa munda mwa lumbu lukole muntwamu, ne muvwa Amerike mwa kutuucika bikole kuntwaku mene ku lwine lumbu alu. Ne cyakamba kabidi bivwa mwa kulwa kwenzeka, ne bivwa bitangila Roosevelt ne bintu abi, muvwaye mwa kufila mpala bwa kumusungulabo bwa musangu mwinâyì awu. Bipwangane, anu menemene mushindu wakenzekabi. Cyakamba kabidi ne mashinyi a tudyendelendela awwa atungunuka ne

kwenda kushaala mafwanangane ne diyi, mu mushindu wa ne mu matuku a ndekeelu avwa mwa kwikala anu menemene mu mbungakeenu wa diyi. Nenu ngâkamba ne: “Nebilwe kwenzeka ne mashinyi miine awu kabaakwikala baaludika kudi yèndà to. Cintu cya cyanaana ke ciikala mwa kuâludika.” Ngôwò mashinyi awu adibo bapatula mpindyewu mene, biikale baakontonwena pa bule, bwa dikubiibwa. Anu mu byôbi. Kwakupeta mushindu wa kubwela mu cimenga kampanda. . . Pashiishe, mu mwaba wa ntanta wa miles makumi abidi [kilomeeta 32], udi mwa kunyeemesha anu miles makumi abidi. Kwêna mwa kuya kadikuma ku mashinyi makwabo to, bwalu mmakontonwena pa bule. Nwamonu’s, adi aya nanku awu, ne mmpindyewu mene. Nenu mêmè kwamba ne: “Nwavulukaayi ne, mu dituku adi, kumpala kwa cikondo cya nshiikidilu kulwaci, kumpala kwa cikondo cya nshiikidilu kulwaci, mukaji kampanda. . . Mpindyewu, nwênù bônso nufunde nulame bwalu ebu. Nekujuuke mukaji munene, wa bukole, wikala anyi Mfumu wa ditunga, anyi mwena cimbambila, anyi mukaji wa bukole kampanda mu États-Unis emu. Ne ditunga neditukinè, mu bwenzeji bwa bakaji. Mpindyewu, vulukaayi ne, cidid EMU MMUDI MUKALENGE WAMBA.” Nwamonu anyi?

<sup>137</sup> Didi mu ntuapakanyi. Ne dyôdi diine ndilongolole njila ku cinyi? Lekelaayi nnewâmbilè. Ikalaayi baa nyuma. Lekelaayi. . . Ikalaayi bakanguke byumvwidi. Tangilaayi. Didi dyanza nanku bwa cinyi? Bwa kupengela ekeleeziya wa Katolike kaaba kaa kubwelelaye. Nwamonu anyi? Nutu nukuukwila bakajaana badi bende luumu baa mu sèndèmâ aba ne bintu bikwabo byônso bya pambelu apa ebi. Nutdi bavuluke diyiiisha dîngâkayiishà anyi? Margie, udi mudivuluke, kukaadi bidimu, pa—pa dibucikila dya États-Unis, ne ditonkola dya bukaleenge bwa Amerike. Ne mûngâakambà ne yèyè wakajuukila mu Paris paanyima paa twètù bamane kubasungila kuntwaku ku bwenzeji bwa bakaji, mvinyo ne bisankasanka. Nenu ke yèyè kulwa kwikala mu Hollywood. Mpindyewu, pamutu paa twètù kwikala kulombesha myodele ku Paris, bôbò ke bakaadi balombesha muneemu bwa kupeta myodele. Mbyenze cinyi? Bikaadi. . . Twètù aba katuvwa baswe bwa kulekela bânà beetu balela baye mu sèndèmâ to, kadi nyawu wabwedi mu television, mutungunuke e kupatuka kadi kutampakajila cilumyana cyônso nkòong, kumwela pambelu. Ke mwaba utukaadi leelu wa Ndaaya ewu, twânà twa bakaji ne twa balume twônso, twâfwányanganyi twônso anu ne banàyi baa ku television aba. Ncinyi ciine aci? S’nnjila benda bapenga’s. Balumyana wa yaaya, mukaji wa masandi umwepele cyanaana udi mwa kutuma bantu mu iferno bûngi bupite bwa binwinu bya maala a kapyà byônso binudi bafwanyine kuteeka muneemu mu cimenga emu. S’ncyà bushuwa. Mutangilaayi numone padiye wenda upweka ne müsèèsù muvwale mwenze bu udi butaka, muntu nansha yèyè bamwamba ne nganyi, yèyè muntu wetu wa mujima ne mubidi tumatuma ewu, padiye anu utangila

mukaji bu nanku udi anu ne cya kuumvwa cintu kampanda bu mavwayila amwenza. Mpindyewu ikala anu ne meeji matooke. Nansha byòbì ne . . .

<sup>138</sup> Mêmè ntu mupete Nyuma Mwîmpè kukaadi bidimu. Kwèna mwa kutangila mukaji mwenze bu muvwale bu udi kayi muvwale . . . Mêmè—mêmè ntu ngenda ne kankuruse kakese mu mashinyi aanyi, bààbûngì beenu bakaadi bakamone. Muntu mukwabo kungambaye ne: “Wèwè utu mwena Katolike anyi?” Ekeleeziya wa Katolike mbapetele bumfumu pa nkuruse kwèpi? Nkuruse udi uswa kwamba ne “Mwena Kilisto.”

<sup>139</sup> Tu-Cicilia munsantu twa kale twatwa ne bikwabo’s bidi ncimanyinu cya bwena Katolike. Twêtù katwena twitabuuja bintakanyi bya mushindu awu abi to. Twêtù tudi twitabuuja Kilisto. Bòbò nyawu badi ne mishindu yònsò ya bafwe badibo bakuukwila. Aci’s ke mushindu mutumbuke wa ditendeleela wa bakishi. Ke cyònsò cidiku aci, dikuukwila dya bafwe. Cintu bu nanku kacyenaku to, to.

<sup>140</sup> Mêmè kwela nsaserdose awu lukonko. Mêmè ne: “Kadi mbwa cinyi, piikalabi ne . . . Peetelo ke uvwa paapà wa kumpala anyi?”

Yèyè ne : “Ncya bushuwa nanku.”

<sup>141</sup> Mêmè ne: “Kadi bwa cinyi Peetelo mmwambe ne: ‘Kakwena mutwangaji mukwabo pankaci paa Nzambi ne bantu pa kuumusha Muntu awu Kilisto Yesu?’ Kadi nwènù nyawu nudi ne bakaji bafwe binunu bitaanu, ne bikwabo byònsò, nubavwija batwangaji. Mpindyewu cidi cyenzeke ncinyi?” Ke bwalu mbwabu. Kabatu ne dyandamuna nansha dimwe pa bwalu abu to. Ncya bushuwa.

<sup>142</sup> Mpindyewu dimwe dya ku malongesha abo, dilongesha dyabo dya mashimi, musumba mujima wa baprofeta baa beena Mishònyì mbalwe kadi kubanga kudilongesha, ne nwènù beena Mishònyì aba’s nudi nudii tabuuja bu ne ndya bushuwa. S’mmwômò menemene. Mangumba ne mishindu ya mabatiiza, ne mèyì matuma mashiileshiilangane ne bikwabo binudi nwenza, bya bwalu kabiyiku bya mu Mifundu to kakuyi mpatà. Idi ibibenga, mu Mifundu amu, kadi nudi anu nushikula mitu nubiitaba. Ncya bushuwa.

<sup>143</sup> Mpindyewu teejeaayaaku eci pa bidi bitangila bayiishi bakaji. Eyo. Timote wa Kumpala, ndi njinga kubala Timote wa Kumpala 2.11. Mpindyewu teejeaayi cidi Mukanda ewu wamba.

*Bakaji beenu biikale bayiila bapuwe mu dikookela dyònsò.*

*Kadi ncyèna nganyisha bwa mukaji kulongeshaye to, anyi kwangataye bukookeshi kumutu kwa mulume, kadi bwa kwikalaye mupuwe.*

144 Ncyèna mwambule bujitu bwa kucyela muntwamu to. Ndi mwambule bujitu bwa kunwambila ne cidì muntwamu. Nwamonu anyi? Nwamonu anyi?

*Bakaji beenu biikale bayiila bapuwe ne biikale mu dikookela dyònsò. (Ne nukaadiku baye mu ekeleeziya wa beena Orthodexe ne babatangile, nwamonu's. Nwamonu anyi?)*

*Kadi ncyèna nganyisha bwa mukaji kulongeshaye to, anyi bwa kwangataye bukookeshi (kwikala mpaasata, mulami, anyi nì ncinyi cya bu nanku) kumutu kwa mulume, nwamonu's, kwangataye bukookeshi kumutu kwa mulume, kadi bwa kwikalaye mupuwe.*

*Bwalu Adama ke wâkenjiibwa dyambedi, ne pashiishe Eva.*

145 Nuvwa bamanye anyi? Mpindyewu teelejaayi, nwênù bakaji. Nwênù bakaji bîmpè ne beena Kilisto aba, nudi cintu cya citambe bwîmpè civwa Nzambi mwa kupa mulume, bwa patupu Yèyè uvwa mwa kwikala mumupe cintu cya mushindu mukwabo. Eyowa's, mukalenge. Nwamonu anyi? Mukaji kavwa nanshà mu bufuki bwa ku cibangidilu to. Mukaji kî ncintu cifûka kudi Nzambi to. Ncintu cyangata ku mulume. Nzambi uvwa mwenze muntu, mwikale byònsò bibidi mulume ne mukaji. Ke Yèyè kubatapulula. Nenku paanyima paa muntu mumane kusòmba pa buloba ne mumane kwinyika nyama mènà, ne mumane kusòmba panwapa ntanta mule, ke Yèyè kwangata lubadi mu luseke lwa Adama, bu cintu cyangata ku cikwabo, e kwenza naaci mukaji. "Adama ke wâkenjiibwa dyambedi, ne pashiishe Eva." Mpindyewu tangilaayi.

*Ne Adama kî ngwâkashimiibwa to, kadi mukaji paakashimiibwaye wakadisangana mu dishipa dya mukenji.*

146 Nzambi kwangata mulume. Dyabulu kwangata mukaji. Tangilaayi bwalu abu, nubutangile anu mumpala menemene, ne ncinyi cidì cyenza bwalu abu leelu ewu. Tangilaayi Ekeleeziya mulelela wa Nzambi, neâmbè ne: "Yesu!" Mufwilakanyi ne Kilisto neâmbè ne: "Mariya!" Tangilaayi nyuma ayi. Nwamonu anyi? Ke yôyi ayi. "Mwoyi Mariya, maamu wa Mvidi Mukulu, udi mubenasha munkaci mwa bakaji bônso, nenku utulombele twêtù beena mpekaatu, kataataka ne dituku dyetu dya lufu. Amen. Mariya, sambila!" Kaa, ekelekele, Nzambi wanyi! Nudi numona, ke bwalu mbwabu's, "mukaji," muntu wa dyabulu kukwataye nende mudimu. Kilisto, cintu cya dikuukwila, ne anu Yèyè umwepele awu! Ke bwalu mbwabu. Ke bwalu mbwabu.

147 "Adama ke wâkenjiibwa dyambedi, ne pashiishe Eva." Adama kî ngwâkashimiibwa to. Kadi mmunyi munudi mwa kwikala ne mpaasata mukaji, mulami mukaji? Adama kî ngwâkashimiibwa to, kadi mukaji ngwâkashimiibwa. Yèyè's



wakashimiibwa, cya bushuwa. Kavwa wela meeji ne udi mu ntupakanyi to, kadi uvwamu. “Mukaji paakashimiibwaye wakadisangana mu dishipa dya mukenji.” Bwalu, yêyè, musangu wônsò udibo anu ba—bapweka ne citalu mu mùsèèsù, mmukaji udi mukalukebe. Musangu wônsò uvwa anu mwànà wa mu diboko wasa mwadi, mmukaji udi mukalukebe. Musangu wônsò uvwa anu muntu ufwa, mmukaji udi mukalukebe. Luvya lwônsò, mmukaji udi mukalukebe. Bintu byônsò, ne lufu, mmukaji udi mubikebe. Bintu byônsò bidi bibi, mmukaji udi mukabikebe. Nenku pashiishe kumuteeka yêyè bu ne ke mutu wa ekeleeziya, mpaasata, kakaa, misangu mikwabo mwepiskopo. Bundu bwende.

148 Mpindyewu lekelaayi nnuuulwile mu eci, mu mwaba mukwabo ewu, bwa kasunsa kamwe cyanaana. Nwamonu anyi? Mpindyewu tubuululaayi mu Kolinto wa Kumpala 14.32 amu, bwa tumone cidi Pôlò wamba mwaba ewu, nenku pashiishe netuye buludi ku mikwabo myaba, mu kasunsa kamwe cyanaana. Nenku katwena baswe kunulama mukùngùlù mutambetambe bule to, mu mushindu wa bafwanyine kucyoka bwa kanuciyi kabidi mwa kwalukila maalaba mu dinda. Eyo. Ndi muswe kubala. Mbanganyi badi biitabuujja ne Pôlò uvwa mulongeshi musonsola? Mpindyewu, vulukaayi ne, Pôlò nyêyè wâkafundila kabidi Timote bwalu ebu. Nwamonu anyi? Aci, mpindyewu, Kolinto wa Kumpala 14.32. Mpindyewu tubangilaayi anu mwab’ewu mene, tubangile kubala apa, 14.34, ngela meeji.

*Bakaji beenu biikale bapuwe mu ekeleeziya: . . .*

149 Nudi bumvwe cidiye mwambe aci anyi?

*Bakaji beenu biikale bapuwe mu ekeleeziya: bwalu kabvena byanyishüibwe bwa bôbò kwakula nansha; kadi mbabatumine dîyi bwa kwikalabo mu dikookela, . . .*

150 Nudi ne mêyì a kumpenga kwa dibeki mwaba awu anyi? Panwikala naawu, apingajaayi paanyima numone ne kaena ateela Genese 3.16. Paakambila Nzambi Eva ne, bwalu yêyè wakateeleja nyoka pamutu paa kuteeleja bayende, mulume uvwa ne cya kwikala ne bukookeshi pa yêyè matuku ende ônsò a mwoyi. Mmunyi mudi muntu mukaji mwa kulwa kadi kwikala ne bukookeshi pa muntu mulume, mwikale mpaasata anyi mulami, padi Bible mwambe ne ikale mu “dikookela,” anu menemene muvwabi ku cibangidilu amu? PavwaYe. . . Nzambi—Nzambi kênàku mwa kushintuluka to. Kanwena mwa kwenza ne Dîyi dyâmbè cintu kampanda *apa* ne cingà cintu *apa* nansha. Kadyena dicyenza to. Cidi anu cintu cimwecimwe aci dîbà dyônsò.

151 Nenku, ku cibangidilu, nkwôkò aku, kumpala kwa eci kujikaci, bu mêmè mwa kupeta mushindu, ndi muswe kunwolwela bwalu bwa *Dibàkà Nè Dîfwà Dyà Dibàkà* abu.

Ncitu mwanji kucyenza mu ekeleeziya ewu to. Kadi tangilaayi bipungidi bibidi ebi. Ewu wamba ne mukaji udi mwa kusediibwa; mukwabo ne kabena mwa kuselangana; ne ewu wamba *cikampanda*, *cikansanga*, anyi *cikankenga*. Indilaayi anu ndambu numone cidi Bible wamba, patwafika kwine aku. Nwamonu anyi? Eyo. Mpindyewu tangilaayi mwaba ewu.

*Bakaji beenu bashaale bapuwe mu ekeleeziya: . . . kabyena byanyishii bwe bwa bôbô kwakula nansha; kadi mbabatumine diyì bwa kwikalabo mu dikookela, bu mudi kabidi mikenji yamba.*

<sup>152</sup> Nenu, mu Dipungila Dikulukulu, kabavwa babaanyishila bwa kwakulabo nansha, bwalu Pòlò ngudi mwambe mwaba ewu ne kabavwa babaanyishila to. Ncya bushuwa anyi? “Bakaji beenu bashaale bapuwe. Ndikookela.” Mpindyewu wêwê muswe kutangila mēyi ebe a kumpenga kwa dibeji awu mwaba awu, necikupingaje ku Genese 3.16. Nwamonu anyi? Eyo. “Mwinshi, bu mwinshi mwa mikenji.”

*Nenu padibo . . . kuyiila cintu kampanda, baabo ba- . . . bakakonke—bakakonke baabayaabo . . . kwabo kumbelu: bwalu bidi bundu bwa mukaji kwakulaye mu ekeleeziya.*

*Cinyi? . . .*

<sup>153</sup> Mpindyewu tangilaayi cikonkelu aci mu yônsò wa ku Bibles yenu ayi, pa cyôci aci ne: “Cinyi?” Ncinyi cyakafikisha Pòlò ku dyamba nanku ne ku dyenza mushindu awu? Mpindyewu, bu nwênù anu mwa kwangata mikanda mifundila Pòlò kudi beena Kolinto. Mpindyewu, nudi mwa kuyipeta mu nzubu yônsò naka mwimpè wa disumbishila mikanda ewu, nwamonu’s, ivwa beena Kolinto bafundile Pòlò. Baakafunda bamwambila, paanyima paa bakaji aba bakaavwa bakudimune mucima . . . Bavwa ne—ne nzambi mukaji kuntwaku, bamubiikila ne “Diana.” Nenu uvwa nzambi wa Efeso, kabidi. Ne beena Kolinto bavwa bakuukwila yêyê umweumwe awu, bwalu civwa ndikuukwila dya bampanganu. Ke kusanganabo lubwebwe kampanda mu budimi dituku dikwabo, lwikale ne mmwenekelu wa muntu mukaji. Bôbô kwamba ne: “Nzambi mmuntu mukaji, bwalu nyêyê ewu mutumacishile cimfwanyi cyende.” Ne ntempelo wabo uvwa mulenga wa dikema kutamba ntempelo wa Solomo ne kule, mulidibo bambe, kudi bafundi baa maalu malonda. Kaa, uvwa anu mabwe a matooke mafinunuke pa ôwò, mulaaba ngòlò pambidi; pavwabi ne, ntempelo wa Solomo yêyê uvwa mwenza ne mici ya cèdre, mulaaba ngòlò. Nwamonu anyi? Kadi uvwa mumutambe ne kule. Nenu ciine aci, mwaba awu, piikalabi ne Nzambi uvwa muntu mu—mukaji, mona’s, cya bushuwa, uvwa mwa kwikala ne baakwidi biikale bantu bakaji. Ncya bushuwa, piikalabi ne Nzambi mmuntu mukaji, nanku’s muyiishi mukaji mmubinge. Kadi, Nzambi m’Mulume. Bible mmwanbe ne Yêyê

m'Mulume, ne Yêyè mwine m'Mulume. Nwamonu anyi? Nenku piikalabi ne Nzambi m'Mulume, nenku's bikengela ciikale bantu balume.

Mpindyewu tangilaayi mwaba ewu ne: "Cinyi?"

<sup>154</sup> Mpindyewu, bamwe baa ku baakwidi bakaji abu, paakakudimunabo mucima kuumuka ku bumpanganu kuya ku bwena Kilisto, bavwa beela meeji ne bavwa mwa kushaala anu balame mudimu wabo wa buyiishi awu, cibi biikale anu buumuke eku baye eku. Piikalabi ne bavwa bayiisha Diana kwaka, padibo balwa kuneeku badi bayiisha Kilisto.

<sup>155</sup> Ke yêyè ne: "Cinyi? Dìyì dya Nzambi dyakapatukila. . ." Anji teejejaayi anu Eci. Mwaneetu, mmunyi mudì bambi mwa kwenza ciine aci? Mvensa wa 36.

*Cinyi? Dìyì dya Nzambi dyakapatukila kunudi nwênù anyi? anyi dyakalwa anu kunudi nwênù?*

*Muntu nî nganyi nî nganyi yêyè wela meeji ne mmuprofeta, anyi wa nyuma* (kabyena nansha bikengela kwikalaye muprofeta to; anu muntu udi ne ngelelu wa meeji wetu wa nyuma ewu), *itabe ne bintu bìndì mêmè nnufundila ebi mmèyì matuma a Mukalenge.* (Nudi nwitabuuja nanku anyi?)

*Kadi piikalabi ne yêyè awu, piikalabi ne nî nganyi nî nganyi mwikalè mmupangi, ikale yêyè anu mupangi.*

<sup>156</sup> Mpindyewu, awu's mmushindu mupepele peepelee ûndiku mumanye wa kucyumvwija. Nwamonu anyi? Mmwambe ne: "Muntu yêyè mwikalè muntu wa nyuma, anyi muprofeta, neitabe ne bìndì mfunda mwaba ewu ebi m'Mèyì matuma a Mukalenge." Kadi yêyè ne: "Piikalabi ne yêyè—piikalabi ne yêyè awu neikale mupangi, ikale mene anu mupangi nanku." Nwamonu's, cintu cimwepele cinudi mwa kwenza. Padibo baswe kutungunuka ne kuya too ne ku cyôcì aci, bikengela anu kubalekela kuyabo, bwalu wàkacimòna cibanga kuntwaku.

<sup>157</sup> Nenku mukaji mukwabo wakangambila, wamba ne: "Kaa, Pòlò uvwa anu mukinyi wa bakaji wa kwine kwònsò aku."

<sup>158</sup> Kavwaku mukinyi wa bakaji to. Udi mumanye, Pòlò uvwa mupostolo, wa Ekeleeziya wa baa Bisamba bya bende. Tangila kuneeku. Uvwaku mumanye ne Pòlò. . . Mbanganyi badi biitabuuja ne ke civwa Pòlò muiyishe? Ke—ke cyakambaye apa nenku anyi? Ke Pòlò kwambaye ne. . .

<sup>159</sup> Udi wamba ne: "Ee, anji indila kakese mpindyewu, Mwaneetu Branham. Indila kakese! Mpindyewu, mwepiskopo wetu twètù udi wamba ne bidi anu bìmpè. Mutangidi mukulu, wa Assemblées, udi wamba ne bidi anu bìmpè. Mwepiskopo wa ba-Unitaires udi wamba ne bidi anu bìmpè."

<sup>160</sup> Cidi bôbò abu bamba nansha ciikale cinyi. Ncya mafi! Nkaavwa mumane kunwambila ne netupoopele cintu eci

bikole. Nenu bapofeta ba mashimi mbavwa bafwanyine kwamba nanku. Bwalu Bible mmwambe ne: “Muntu ni nganyi ni nganyi ye ye udelele meeji ne ngwa nyuma, anyi ne mmupofeta, itabe ne bindi memem ngamba ebi m’Meyi matuma a Mukalenge.” Nenu piikala nyuma wende kayi ufidila Diyì adi bujaadiki to, mmupofeta wa mashimi, twamb’eku twamb’eku. Mbipiciibwe ne memem mwikale mukinyi wa bakaji pamutu paa kwikala munangi wa bakaji, bwa kwanyisha cintu bu nanku, kutwala cintu bu nanku mu Ekeleziya wa Nzambi, cibengangane ne mikenji ya Nzambi. Nenu Pòlò wakamba ne... Angataayi Galatiya 1.8. Pòlò mmwambe ne: “Mwanjelo ufumina mu Dyulu ye ye muyiishe evanjeeliyo mukwabo nansha wa bishi mushiilangane ne undi memem munuyiishe ewu, ediibwe mulawu.” Mpindyewu ciwenza bwa Aci ncinyi?

<sup>161</sup> Mpindyewu wewè udi wamba ne: “Kadi mwaba udi Ci cyambe ne: ‘Bana beenu balela balume ne bakaji nebambè biprofeta,’ mu Yowela, ne—ne mwaba wakateela Peetelo Dituku dya Mpenta awu?” Aci ncyà bushuwa menemene.

<sup>162</sup> Utu mumanyeku ne, mu Dipungila Dikulukulu, mushindu umwepele, ne mushindu umwepele mpindyewu, udi muntu yonsò ewu mwa kubwelaye mu cipungidi, kupicilaku, kudi Abraham, ye ye uwabò bape mulayi, ne ci—citampi cya mulayi ciwa nditengudiibwa. Mbanganyi badi bamanye nanku? Aci ciwa n’Nzambi mwikale ushindika.

<sup>163</sup> Byenze bu mwaneetu kampanda wa ba-Baptistes, uvwa wamba ne: “Mwaneetu Branham, mona’s, twètù ba-Baptistes aba’s tutu bapete Nyuma Mwimpè.”

Mémè ne: “NwâkaMupeta dibà kaayi?”

Yèyè ne: “Dibà ditwakiitabuuja adi.”

<sup>164</sup> Mémè ne: “Pòlò wakamba ne: ‘Nukaadi bapete Nyuma Mwimpè kacya nwítabuuja anyi?’” Nwamonu anyi? Mémè ne: “Mpindyewu, nwènù ba-Baptistes lwâyi nwangate ndambu wa Cyôci aci, nenu netuyiikile neenu pa dikubiibwa dya Cyendelele.” Mémè ne: “Kadi, ee, nutu nuMupetela mushindu awu penyì?” Nwamonu anyi?

<sup>165</sup> Yèyè wakamba ne: “Nukaadi baMupete kacya nwítabuuja anyi?” Bavwa beena kwitabuuja, biikale ne mbila ne disanka ne bikwabo byonsò. Kabavwa banji kupeta Nyuma Mwimpè to. Pòlò ngudi mwambe ne kabavwa banji kuMupeta. Nwamonu anyi? “Nukaadi bapete Nyuma Mwimpè kacya nwítabuuja anyi?”

Bòbò ne: “Katwena bamanye ne Nyuma Mwimpè udiku to.”

Yèyè ne: “Nenu nwâkabàtijiibwa mushindu kaayi?”

<sup>166</sup> Bòbò ne: “Tukaadi babatijiibwe.” Kadi, bibi’s, nwamonu’s. Pa nanku byakakengela kubatijiibwaye, cyakabidi. Eyo.

167 Mpindyewu monaayi eci mpindyewu ne, bayiishi bakaji aba, paakabwelabo, bavwa badyambidila ne nebangate anu bukookeshi bwabo abu. Kadi kakuyi mpatà to kabyena byanyishiibwe kudi Nzambi bwa kwenza nanku to. Nenku . . . anu bu mutucidi pa ciine cyena bwalu eci, bakaji aba, nwamonu's. Nenku aci, mpindyewu, yêyè kwamba ne: "Piikalaku muntu kampanda munkaci mwenu, mwikale wa nyuma, anyi muprofeta, itabe ne bîndi mêmè mfunda ebi m'Mèyì matuma a Mukalenge. Kadi piikalaye mupangi, ikale mene anu mupangi." Nenku ke bwa cinyi . . . tabernacle ewu kèna utwala anyi ujidila bayiishi bakaji, balami bakaji, anyi nî ncinyi nî ncinyi cya mukaji kwenzaye bu mudimu wa mu ekeleeziya emu to, mbwalu Mufundu ewu mmwadija apa mutookesha tòò.

168 Mpindyewu, Bible mmwambe cya bushuwa ne: "Bànà beenu balela balume ne bakaji nebâmbè biprofeta." Mpindyewu, mwaku ewu *kwamba biprofeta* udi uswa kwamba cinyi? Ukebaayi. Mmumwe ne "kwamba bwalu kampanda, ku disonsodiibwa," anyi "kudyanjila kwamba bwalu kampanda." Mmwaku mwikale ne bitupa bibidi.

169 Anu bu mudi *kujidila* uumvwija ne kwikala "musukula, ne muteeka ku luseke bwa mudimu." Nwamonu anyi? Anyi, mmwaku mwikale ne bitupa bibidi, uumvwija bintu bipite pa cimwe, anu mutudi naayi bûngì cyanaana mu Anglais mwaba ewu.

170 Bu mudi, tudi bafwanyine kwamba bwa mwaku ewu wa mu Anglais "board." Ee, *board* mmufwanyine kuumvwija cinyi? Nutu nwamba ne: "Ee, yêyè's udi uswa kwamba ne mmufute *mfranga ya byakudya* byende." "To, kî ng'aci to. Uvwa uswa kwamba ne *mmutubule* disoso." "To, kî ng'aci to. Uvwa uswa kwamba ne *mmumusuyye*." Anyi, nudi numona's, mmwaku paawu nanku, bikengela umanye cyûdi wamba ne ncinyi. Nwamonu anyi?

171 Nenku ke mudibi bwa mwaku ewu udi ne bitupa bibidi, wa ne: "Bànà beenu balela balume ne bakaji nebâmbè biprofeta." Mpindyewu, mushindu umwepele udi Nzambi . . .

172 Baptiste ewu kwambaye ne: "Ee, twêtù tudi bapete Nyuma Mwimpè." Mêmè ne . . . "Patwakiitabuuja." Mêmè ne . . . Mpindyewu, monaayi, yêyè ne: "Nzambi wakapa Abraham . . ." Yêyè ne: "Abraham wakiitabuuja Nzambi." Ke mushindu wakaciteekaye. Yêyè ne: "Abraham wakiitabuuja Nzambi ne baakamubadilaci bu bwakane." Mbanganyi badi bamanye ne aci ncyà bushuwa? Mpindyewu tangilaayi numone mudi—mudi Sataana mwa kucyela mwaneetu pambidi mu mayele anu bipeepele ebi. Nwamonu's, anu bipeepele nunku ewu. Mpindyewu, aci m'Mufundu.

173 Mwaneetu, nyawu nkwambila, ku cyambilu eku, bikengela wikale mulaabiibwe bwa kubwela mwaba ewu. Bikengela

ubwele mu mwaba musokome usambile. Bantu batu bamba ne: “Mbwa wêwè cinyi kutu upatuka ukamonaku bantu?” Mwaneetu, pawikala uya bwa kwakula ne bantu anyi kubalongesha, bikengela ushaale paa nkaayeebe, wêwè ne Nzambi, bwa ndambu wa dibà, kumpala kwa kubanda mu cyambilu amu. Ncya bushuwa, wamonu’s, bwalu Sataana mmudimuke, mudimuke wa dikema.

<sup>174</sup> Kwambaye mpindyewu, monaayi, yêyè ne: “Abraham wakiitabuuja Nzambi, ne baakamubadilaci bu bwakane.” Aci ncyà bushuwa. Yêyè ne: “Mpindyewu, ncinyi cikwabo cidì Abraham mwa kwenza pa kuumusha kwitabuuja?”

Mêmè ne: “Ke cyònsò civwaye mwa kwenza.”

<sup>175</sup> Yêyè ne: “Ncinyi cikwabo cyûdì wêwè ewu mwa kwenza anyi cidì muntu kampaanda mukwabo mwa kwenza pa kuumusha kwitabuuja?”

<sup>176</sup> Mêmè ne: “Ke cyònsò citudi mwa kwenza. Kadi tangila, mwaneetu, pashiishe’s Nzambi wakatwangaja, anyi wakiitaba diitabuuja dya Abraham. Wakamupa citampi, cimanyinu cya ditengula, bu citampi cya cipungidi. Nwamonu anyi? Wakamupa. Wakamba ne: ‘Mpindyewu, Abraham, Mêmè nêngitabè diitabuuja dyebe adi, pa nanku nênkupè cimanyinu cya ne ngakwitabi mpindyewu.’”

<sup>177</sup> Ke Yêyè kutengula Abraham, nenku ke cyakadi citampi cya cipungidi. Kadi mpindyewu mu dituku edi . . . Mpindyewu, muntu mukaji kavwa mwa kwikala mu aci cipungidi to; amba anu mukaji musediibwe. Jandulaayi, kabavwa mwa kutengula muntu mukaji to; pa nanku, bivwa bikengela bôbò kubwelamu, nenku yêyè ne bayende badi umwepele. Kabacyena kabidi babidi to; bakaadi umwepele. Mbanganyi badi bamanye aci? Mufundu ngudi wamba nanku. Nenku, bu mudiye musediibwe, nenku udi—udi ushaala umwe. Nenku pwekayi kwinsi eku nutangile mu Timote emu, mbambe cintu cimwecimwe aci, ne: “Nansha nanku yêyè neasungidiibwe mu kulela kwa bânà, piikalaye munanukile mu diitabuuja ne mu cijila ne dicincika dya maalu.”

<sup>178</sup> Mpindyewu, kadi, pashiishe, ditengula dya mu Dipungila Dikulukulu divwa dya mu mubidi, kadi mu Dipungila Dipyadipya, Yowela wakamba ne: “Nêmpongololè Nyuma Wanyi pa musunya wònsò, ne bânà beenu balela balume ne bakaji nebâmbè biprofeta.” Mpindyewu, mwaku ewu *kwamba biprofeta* kawena uumvwija ne nkulongesha to. *Kwamba biprofeta* kudi kuumvwija anyi “kulondelangana dilabula, ku disonsodiibwa,” anyi “kudyanjila kwamba bwalu budi bwamba kwenzeka.” Ne twètù’s tudi bamanye ne kuvwa baprofeta bakaji mu Dipungila Dikulukulu. Kabavwaku mwa kwakwila mu nzubu amu, kwakwila mu ekeleeziya, mu disangisha, bu mulongeshi to. Kadi yêyè, Anna, ne bààbûngì baabo mu ntempelo amu, bavwa baprofeta bakaji, ne bavwa . . . Miriam uvwa muprofeta

mukaji, anyi cintu bu nanku. Uvwa ne Nyuma pambidi pende, aci ncilelela, kadi uvwa ne mikalu mu kende kaaba. Bantu bakaji badi mwa kwikala baprofeta bakaji leelu ewu, kakuyi mpatà to; kadi kabayi balongeshi, ne bikwabo, mu cyambilu emu to. Panudi nucyenza, nudi—nudi nufikisha Bible ku dyamba Yèyè mwine maalu abengangana. Bible kèna mwa kwamba cintu cimwe *apa*, ne cintu cya cyanaana *apa* nansha. Udi ne cya kwamba cintu cimwecimwe aci dibà dyònsò bwa cyanaana Kì n’Dìyi dya Nzambi to. Nwamonu anyi? Pa nanku: “Bànà beenu balela balume ne bakaji nebãmbè biprofeta,” udi uumvwija anyi “kwamba maalu acivwavwa” anyi “kufila majaadiki.” Mpindyewu, kebululaayi cintu aci, nwangate mukanda wa mbumbilu wa myaku ya Bible bwa kumona ne aci kì ncyà bushuwa. “Bànà beenu balela balume ne bakaji nebãmbè biprofeta.”

<sup>179</sup> Mpindyewu, Bible udi kabidi wakula bwa mukaji uvwa udyamba, mushindu awu, anyi ulaka mukana muvwaye. . . Eci ncifwanyine kutangila ne ekeleeziya wa Katolike, ne kabidi cifwanyine kutangila. . . cyena bwalu citwikala mwa kwamba mpindyewu eci. Tubuululaayi mu Mukanda wa—wa Bwakabuulwibwa, nenku twangataayi nsha—nshapita 2 ku mvensa wa 20, anu patucidi kiine kaaba aka pabwìpì naaci apa, bwa nwàpeta mwa kumona anu mushindu udi cintu aci mwa kwikala cya dyabulu, cya dyamba mu matuku a ndekeelu aa biikala mwa kwenzeka, mushindu udi bôbò aba. . . civwa mukaji ewu mwa kwikala. Vulukaayi ne, ekeleeziya wa Katolike mmukaji. Twafumu ku dicibala, kì mmwômò anyi? Teelejaayi eci mpindyewu, mudiCi cyamba. Bwakabuulwibwa 2.20: “Nansha nanku. . .” Udi wambila ekeleeziya wa Twatila, nwamonu’s: “Nansha nanku. . .” Yèyè nguvwa ekeleeziya wa munkacinkaci mwamwa, mupicile mu Bikondo bya Mìdimà.

*Nansha nanku ndi ne ndambu wa maalù àndi mbengangana neebe, bwalu udi witabila mukaji awu Izabela, udi udibiikila yèyè mwine ne mmuprofeta mukaji awu, bwa kulongeshaye ne. . . kukookesha ku bukole basadidi baanyi ne bwa kwendabo masandi, ne bwa kudyabo bintu bilambula mpingu. (Nwamonu anyi?)*

<sup>180</sup> Mpindyewu, bu nwènù mwa kumonaku, tangilaayi bikondo bya ekeleeziya ebi, pashiishe netwimanyike. Pashiishe mu dinda netwangate bikwabo bintu ebi. Tangilaayi. Mu. . . Mwinshi mwa biteekedi bya myendu bya—bya ngòlò bya mu tabernacle wa beena Yuda awu, lwa munda amu, mùvwà màmpà a baakwidi ne bikwabo amu, muvwa biteekedi bya myendu by ngòlò mwandamutekete. Nwènù bònsò nudi bamanye aci. Nwamonu anyi? Kudi bikondo mwandamutekete bya ekeleeziya. Aci cidì cyakula bwa bikondo mwandamutekete bya ekeleeziya, bukènkè kampanda. Mpindyewu bu nwènù mwa kumona mu Bwakabuulwibwa 1, tudì tusangana Yesu mwimane mu

bikondo mwandamutekete bya ekeleeziya, biteekedi bya myendu bya ngòlò mwandamutekete, paakakudimukaye e kumona Kampanda mufwanangane ne Mwânà wa muntu, mwimane, muvwale mushindu uvwabi awu. Uvwa m'Mukaji Musela mwimane munkaci mwa biteekedi bya myendu, bamufikishe ku dyakula mudilekelele.

<sup>181</sup> Mpindyewu, Dipungila Dikulukulu, bôbò bavwa mwa kwangata...kandeyi kamwe aka, kukateemesha, kwangata kandeyi kakwabo kukateemeshila ku kaka naka, kutemeeshila ku kaka naka, aka ku kakwabo, mushindu awu, too ne pavwabo bateemesha tundeji twônsò mwandamutekete.

<sup>182</sup> Bu nwênù mwa kumona, ku cibangidilu, paakabanga Nzambi kukwata mudimu ne beena Yuda, baakapicila mu cikondo cya ngòlò. Ne pashiishe cikondo cya mîdimà mikole cya dikwata mudimu ne beena Yuda, cyakapeta Nzambi ne mwena Yuda, cyakadi mmu bukookeshi bwa Aakaba. Nenku bu nwênù mwa kumona, mu kubala kwa bikondo bya ekeleeziya abi, Yêyè udi ukupinganyina anu cyakabidi. KwambaYe, mpindyewu ne: "Kukaadi ndambu wa bintu," wamba ne. . . Mpindyewu, anu mu Cikondo cya Mîdimà aci, cya bidimu cinunu ne nkama itaanu aci, anyi mu cikondo cya Aakaba, dyambedi, ne beena Yuda. Cikondo cya mîdimà mitambe bukole cyakapetabo, paakalwa Aakaba kusela Izabela ne kubweja dikuukwila dya mpingu mu Izaleela, ne kufikishaye bantu bônsò ku dikuukwila dya benda balonda Aakaba...balonda nzambi wa Izabela. Nudi bavuluke ne, baakangata, baakakuna mici ya bimuma, ne baakuupula byoshelu bya Nzambi. Ke Elisha kwela lubila lukole, ne yêyè ke uvwa "umwepele," kadi Nzambi uvwa naabo nkama mwandamutekete bavwa kabayiku banji kutwila nzambi ya ba-Baals cinù to. Nudi bavuluke aci anyi? Ke cimfwanyi cya Ekeleeziya musungula ulwalwa awu. Nudi numona mwaba awu anyi? Nudi numona mudi maalu anyi?

<sup>183</sup> Mpindyewu, mu ekeleeziya ewu, bu nwênù mwa kumona ekeleeziya wa kumpala, ekeleeziya wa kumpala, ekeleeziya wa Efeso, uvwa ekeleeziya munene. Yêyè wakamba ne: "Ucidiku ne bukênkè, ndambu." Nenku bu nwênù mwa kumona, ekeleeziya yônsò, buvwa bubange kubwicidila, kubwicidila, kubwicidila, too ne paakafikabi ku Twatila. Pashiishe, bidimu cinunu ne nkama itaanu abi. Pashiishe kupatukilabu ku luseke lukwabo ne: "Kadi udi anu ne kaabukênkè kakesee. Kolesha cyûdi naaci aci, bwa citeekedi cyebe cya mwendu kacilu kuumushiihwa." Nenku kutungunukabu ne kupweka too ne ku cikondo cya ekeleeziya wa Filadelefiya, ne pashiishe kubwela mu cikondo cya ekeleeziya wa Laodikiya.

<sup>184</sup> Mpindyewu, bulenga bwa kwîsù mbwebu. Kaa, ekelekele! Mêmè's ndi munange eci, Mwaneetu Smith. Nwamonu's, tangilaayi eci. Mpindyewu, mu eci cikondo cya ekeleeziya, bu mutwalondeshi...Mpindyewu tangilaayi eci. Cikondo cya



kumpala cya ekeleeziya civwa Efeso, cikondo cya ekeleeziya wa Efeso. Mpindyewu, cyònsò cya ku bikondo bya ekeleeziya abi, too ne padibi bikafika ku bidimu cinunu ne nkama itaanu ebi, bu nwênù mwa kumona . . . Nwacibalaayi mpindyewu panudi nwalukila kumbelu diloolo edi, panwikala ne dîbà, anyi mu dindadinda, kumpala kwa nwênù kulwa mu ekeleeziya, mu nshapita 1, ne 2, ne 3 ya Bwakabuulwibwa. Nenulwe kujandula ne, mu cyònsò cya ku bikondo bya ekeleeziya abi, Yèyè mmwambe ne: “Udi ne kaabukole kakese, kadi kwèna muvile Dîná Dyanyi to,” too ne mwaluYe kufika ku bidimu cinunu ne nkama itaanu bya Twatila ebi, Cikondo cya Mîdimà. Pashiishe Yèyè kupatukila luseke lukwabo, wamba ne:

. . . udi ne *dîná dya* ne udi ne mwoyi, kadi udi *mufwe*.

<sup>185</sup> Nenku ebi, nansha cimwe cya ku bikwabo bikondo bya ekeleeziya ebi, nî ncyòci aci nî ncikondo cya ekeleeziya wa Filadelefiya, kabaakangata kabidi Dîná adi to. Kabaakapeta kabidi Dîná adi to, bwalu dyakajimina mu cikondo ciine eci. Mpindyewu, kaa, mushindu mwine utudi bafwanyine kwomekela bwalu abu ku malongesha a mashimi awu mpindyewu, anu mwômò amu, bwa kunuleeja ne yèyè awu mmaamu, ekeleeziya wa Katolike awu, mamwëndè wa byònsò abi, mushindu udiye “maamu, bwalu busokoka, Baabulona.” Nenku mbwena kwamba ne, tangilaayi, cikondo cya ekeleeziya eci paakatukaye, uvwa ne kaabukênkè kakese, pashiishe ke kubangabu bwenda bubwucidila, bubwucidila, ke pashiishe kubwelaye mu bulongodi lwa kuneeku eku, mu bidimu ebi cinunu ne nkama itaanu. Ke kupatukaye mpindyewu, kayi bu Ekeleeziya wa Mukalenge Yesu Kilisto to, kadi bu ekeleeziya wa Katolike. Luther wakapatuka bu ne ncinyi? Bu ekeleeziya wa ba-Luthériens. Ba-Baptistes baakatuka bu ne ncinyi? Bu ekeleeziya wa ba-Baptistes. Kaciyi Dîná Dyende to, kaciyi Dîná Dyende to; dîná dya cyanaana, “udi ne dîná.” “Bwalu kakwena dîngà dîná difidiibwe mwinshi mwa Dyulu munudi mwa kusungidiibwa to, anu Dîná dya Yesu Kilisto.” “Udi ne dîná dya ne udi ne mwoyi, kadi udi mufwe,” aci cidid ne dingumba adi.

<sup>186</sup> “Kaa, mêmè’s ndi Presbytérien,” kadi udi mufwe! “Kaa, mêmè’s ndi Baptiste,” mufwe! Udi ne mwoyi anu paudi ulwa ne mwoyi mu Kilisto Yesu. Ncya bushuwa. Mabatiiza enu a mafi awu, a mâyi, dibatiiza dya mafi; dimyaminangana dya mâyi, dipongolwelangana, pamutu paa diinyijangana; biikale nwanza mudimu ne “Taatu, Mwânà, ne Nyuma Mwîmpè,” pamutu paa Dîná dya Mukalenge Yesu Kilisto. Bintu byònsò bya mafi abi biikale benda babisambulujilangana, Bible pende wakula, byenze bu udi upongolwelamu ne bukole bwònsò. Nenku ke twêtù aba twitaba biine abi pamwe naabo ne: “Ee, ekeleeziya wanyi utu yèyè uCiitabuuja mushindu *ewu*.” Kadi’s Bible udi wamba *Eci*. Nwamonu anyi? Kî mbintu bya mushindu awu to. Cintu cya bu nanku kacituku to.

<sup>187</sup> Kacya kakwenaku mwaba nansha umwe mu Bible ukaadiku muntu mupatule ludimi mwangate Ukaristia munsantu, nsaserdose ubikula mvinyo kadi kubiikila ciine aci ne n’Nyuma Mwîmpè to. Kacyapu mu Bible kabatuku balabulangane ku cyanza beelangane mwoyi wa ku cyanza wa buunyaana, kadi kubiikila ciine aci ne n’Nyuma Mwîmpè to. Kacya muntu katuku mujuuke kuulu kwamba ne: “Mpindyewu ndi mwena kwitabuuya,” kadi kupeta Nyuma Mwîmpè to. Ne bikaadiku byenzeke, Byenzedi 2 mmufwanyine kubadiibwa mushindu ewu: “Nenku paakamana Dituku dya Mpenta kukumbana patapata, nsaserdose wa beena Loomo wakalwa wenda upweka ne mùsèèsù, mwikale ne muteelu wa nshingu wa nkoolò. Kuseemenaye, kwamba ne: ‘Nwènù bônso patulaayi ndimi yenu mpindyewu nutambule Ukaristia munsantu, koomunyo wa kumpala.’” Aci kî ncifwanyine kwikala mushindu kampanda wa kubala Byenzedi 2 anyi?

<sup>188</sup> Ee, nwènù beena Mishònyì nudi peenu anu babi. Nudi nwalukila kwaka nwamba ne: “Mpindyewu netulwe kunudi nwènù ba-Méthodistes; nubapicisha ku dyabalume, anyi, nubeela mwoyi wa ku cyanza wa buunyaana, nubapa ngondo isambombo ya kubashiya mu diteeta.” Nudi nubala ciine aci penyi mu Byenzedi 2? Nwamonu anyi? Nudi nupetela ciine aci penyi? Nwamonu anyi?

<sup>189</sup> Mmbambemu ne: “Pavwabo bônso mu mwaba umwe, ne diyì dimwe!” Kakwakalwa mwepiskopo wâkenza *cikampanda*, ne kakwakalwaku nsaserdose wâkenza *cikansanga* to. “Kadi kwakalwa mutooyi ufumina mu Dyulu mwenze bu cipeepele cikole civuma, ne Cyakuuya nzubu mujima muvwabo basombe.” Mushindu wakaMupetabo ngôwò awu, eyowa’s, mukalenge, mwenze bu cipeepele cikole civuma cifumina mu Butumbi. Kî ncyenda cibànda ne cibeeba anyi cifumina mu dingumba kampanda nansha.

. . . udi ne *dînà dya ne* udi ne mwoyi, kadi udi *mufwe*.

<sup>190</sup> Nudi numona’s, twitabaayi yenu ne mangumba awu mbidi bijikile Nzambi njila mushindu awu, biye too ne ku ne: “Twètù tudi twitabuuya *cikampanda*, ne tudi twitabuuya ne matuku a bishima akaadi mamane kupita.” Muprofeta wa mashimi ngudi wamba nanku awu. Muprofeta wa mashimi ngudi ukwambila, ne: “Udi mwa kulabulangana ku cyanza bwa kupeta Nyuma Mwîmpè.” Muprofeta wa mashimi ngudi ukwambila ne: “Udi upeta Nyuma Mwîmpè paudi witabuuya.” Muprofeta wa mashimi ngudi ukwambila ne: “Bivwa bikengela bwa kukupongolwelabo ne kukumyaminabo mâyi mu mutu pamutu paa kukubatiiza.” Muprofeta wa mashimi ngudi ukwambila bwa “kubatiiibwa mu dînà dya Taatu, Mwânà, ne Nyuma Mwîmpè,” padiku kakuyi Mufundu nansha umwe mu Bible bwa ciine aci. Ncya bushuwa. Kakwena Mufundu nansha umwe mu Bible udi ukwambila bwa kubatiiibwa, padibi ne

muntu yônsò ukaadiku mubatiijiibwe ewu, anu mu Dîna dya Yesu Kilisto. Baswe kuumusha, anu bayiidi baa Yone; nenku byakakengela bwa kulwabo, kubatiijiibwa cyakabidi, mu Dîna dya Mukalenge Yesu Kilisto, bwa kupetabo Nyuma Mwîmpè. Ncya bushuwa. Mpindyewu, aci kî ndilongesha dya beena Yesu Nkaayende nansha. Mêmè ntu mumanye dilongesha dya beena Yesu Nkaayende. Kî ng'adi to. Adi didi anu Dilongesha dya Bible. Ncya bushuwa.

<sup>191</sup> Kadi's ke bwalu mbwabu. Nudi nwenza naabu cinyi? S'ke mamwênù nyèyè awu. S'ke mamwëndè wa twitabaayi ayi.

<sup>192</sup> Mpindyewu, pingajaayi mèsù paanyima mu Bible nundeeje mwaba ukaadiku muntu bamumyamine mâyi pa mutu. Nwênù ba-Méthodistes, ba-Presbytériens, beena Katolike, ngambilaayi mwaba ukaadiku muntu bamumyamine mâyi pa mutu, mu Bible. Ngambilaayi mwaba ukaadiku muntu bamupongolwele mâyi pa mutu, mu Bible, bwa dilekelediibwa dya mpekaatu. Uteelaayi. Nudi mwa kuwupeta anyi? Pawikala mwa kuwupeta, ulwe kûndi, nenku nêmpwekè mu mùsèsèsù emu ne cimanyinu cilamika paanyima apa, ne: “Muprofeta wa mashimi! Mwawa mutupakane.” Anyi, upete mwaba nansha umwe mu Bible mujima ukaadiku muntu mubatiijiibwe mu dîna dya Taatu, Mwânà, ne Nyuma Mwîmpè, mushindu udi bya pa lukama makumi mwandamukulu baa kunudi babatiijiibwe awu. Umpetele Mufundu umwepele ukaadiku muntu mubatiijiibwe mushindu awu, nenku nêndamikè cimanyinu paanyima paanyi apa ne, “muprofeta wa mashimi,” ne nya ngenda mpweka naaci mu cibeeba mushindu ewu. Nenku undeeje mwaba ukaadiku muntu mubatiijiibwe, mu Ekeleeziya mupyamupya, uvwa kayi mwenzejiibwe bwa kwalukila bwa kubatiijiibwaye cyakabidi, mu . . . kacyi mu dîna dya “Yesu” nkaayaadi to, kadi mu Dîna dya Mukalenge wetu Yesu Kilisto. Ncya bushuwa. Tangila umone ne kî ncya bushuwa.

<sup>193</sup> Nenku, mwaba ewu, cidi ncinyi? Yèyè uvwa mamwëndè wa bandumba. Cyakamuvwija ndumba ncinyi? Cyakamuvwija mukaji wa masandi ncinyi? Dilongesha dyende adi! Cyakabavwija bandumba ncinyi? Dilongesha dyende yèyè!

<sup>194</sup> Nenku ke bwa cinyi twêtù katwena tutwala mangumba abo ne twitabaayi yabo ayi to. Tudi twêtù tushaala bakezuke ne Bible ewu. Ncyèna mumanyen mmushindu kaayi mwîmpè wa nsòmbelu údi nende ku Yèyè to, kadi Yèyè ngudibo bakulongeshe, nansha nanku. Cya bushuwa. Aci ncikutangile. Kî mmêmè udi mwa kukwenzeja bwa kwikala ne nsòmbelu wa ku Yèyè to. Cîndi mêmè mwa kukwambila cidi anu ne Bulelela ncinyi. Ke bwa cinyi twêtù katwena dingumba to. Ncyèna mufwanyine—mufwanyine kuswa bwa twêtù kudikooyisha mu kubwela kwa mu cintakanyi cya mushindu awu to, bwa kwikala ne cya kushikula mutu ku mushindu kampanda wa díyi diswika. Mbipiciibwe ne mêmè musungule bwa kwenda ne banyaabanya

badyombola baa Mukalenge. Mbipiciibwe ne mèmè mushaale mutooke ne mukezuke kumpala kwa Dìyì ne kwa Nzambi, ne kwimana paapa ngamba ne: “Kakwena mashi a muntu nansha umwe pa bilàmbà byanyi to.” Ke bwa cinyi tudi twètù tushaala ku Branham Tabernacle. Ke bwa cinyi katwena beena Assemblées to. Ke bwa cinyi katwena ba-Unitaires to. Ke bwa cinyi katwena beena Yesu Nkaayende to. Ke bwa cinyi katwena ba-Méthodistes to. Ke bwa cinyi katwena ba-Baptistes to. Anu kaatabernacle ka—kakese mwab’ewu. Katwenu twètù ne dingumba to nansha dya kânà. Tudi badishikamine, mu Kilisto. Ke bwa cinyi tudi bashaale mushindu utudi bashaale ewu. Ne Nzambi mmutubeneshe, Nzambi mwikale utukwacisha.

<sup>195</sup> Mpindyewu, tudi mwa kunwambila bwa cinyi tutu tudya Meesa a Mukalenge, tudi tunwambila bwa cinyi tutu twenza dyoweshangana dya mâyi ku makàsà, bwa cinyi katutu twitabila bidimba bwa kuàngata patudi bamanye ne badi mu mpekaatu. Ke bwa cinyi, mbingu ibidi anyi isatu mishale eyi, ndi muye kudi cidimba ne cidimba, kwa bwena kunuvwa ne tuumakokyanganyi twenu tukese tukese atu, nwènu peenu. Baya eku ne eku, muntu kayi muswe kwakwisha mukwende, bapitangana mu njila batume mpala mu cisuku. Bundu bwenu, nwènu badi banwe lupanza lubenesha lwa Nzambi dyamwamwa dya eci, dya cyoshelu eci, nudibiikila peenu munudi bânà beetu baa balume ne baa bakaji, nenku pashiishe kwangata telefone kadi kwambangana mambavi. Kanwena bakumbane kubiikidiibwa ne nudi beena Kilisto to panudi mu mushindu awu. Cya bushuwa. Disakaayi kule ne ma-telefonos awu; pawikala kuyi mwa kwamba bwalu bwîmpè bwa muntu kampanda, kwakulu kantu nansha kamwe to. Wavuluka ne, Nzambi neakwomekele bujitu abu. Padi anu nyuma wa mushindu awu usanganyiibwa munda mwebe, s’udi anu mumanye ne kwèna mu mushindu mwîmpè ne Nzambi. Pawikala kuyi udyumvwa . . .

<sup>196</sup> Muntu yèyè mu ntupakanyi, nda kudiye upungishangane nende. Panudi kanuyi mwa kupungishangana to, angata muntu kampanda akakufile. Kabyena bikemesha to padi Nzambi kayi mwa kukazamuna Ekeleeziya Wende, mbwalu kanwena nubyenza mu mushindu mujaalame to. Pamutu paa kwangata telefone bwa kwakula bwa kampanda ewu, bwa bidi byenzeke, ne bwa tusumbusumbu tukese ne bikwabo, eku ne eku mushindu awu. Pamutu paa kwenza aci, bwa cinyi kanwena nwenza cidi Bible wamba? Piikala mwaneetu wa balume kampanda mupeteke mu cilema, nda kudiye umonebi ne kwèna mwa kupungishangana nende. “Ee, mpindyewu, yèyè’s ngudi mungenzele!” Cidiye mwenze nansha ciikale cinyi, nansha nanku nda wèwè anu kudiye! Dìyì kî ndyambe ne yèyè alwe kûdi wèwè to. Wèwè ngudi uya kudiye piikalabi ne yèyè ngudi mupiile. Udi wèwè wamba ne: “Ee, yèyè’s nguvwa mu cilema.

Yêyè nguvwa ne cya kulwa kûndi.” Aci kî nciidi Bible mwambe to. Bible mmwambe bwa wêwè uye kudiye. Piikalabi ne yêyè ngudi mupiile, wêwè ngudi uya kudiye.

<sup>197</sup> Nenku pashiishe yêyè kayi muswe kukuteeleja to, dîbà adi wangate muntu mukwabo akakufile, bu ntemu.

<sup>198</sup> Nenku pashiishe yêyè kayi muswe kwangata ntemu awu ne mushinga to, nenku wâmbè ne: “Nenku nênkangâtè mpaasata webe.” Pashiishe umwambile, wamba ne: “Nyaaya kacyambila ekeleeziya, ne mu matuku makumi asatu kuumukila ku mpindyewu, nwênù bânà beetu kanuyi balongolole bwalu abu to. . . Mwaneetu wa balume ewu udi ne dijinga dya nwênù kupungishangana. Wêwè ngudi kuyi muswe kucyenza to. Nenku wêwè kuyi mulongolole bwalu abu mu matuku makumi asatu emu to, pashiishe ncinyi ciikala mwa kwenzeka? Wêwè kwakwikala kabidi umwe wetu to.”

<sup>199</sup> Bible mmwambe ne: “Yêyè kayi muswe kuteeleja ekeleeziya to, nanku ikale kûdi bu mumpanganu ne mupublikano.” Nudi numona’s, padi anu mwaneetu mwikale mwinshi mwa dikubiibwa dya ekeleeziya adi, Mashi a Kilisto adi anu amukuba. Ke bwa cinyi katwena tufikisha ekeleeziya ku diya kumpala anu bwa mushindu udiye wenza ewu. Mpindyewu, eyo, *Eci* ke dilongesha dya ba-Bap- . . . dya ekeleeziya wa ba-Baptistes, anyi dya Branham Tabernacle ewu, panwikala mwa kucyenza. Nudi numona, bwa cinyi kanuyiku mwa . . .

<sup>200</sup> Nudi nulwa mwaba ewu, nwamba, cileejiilu, bantu babidi, twânji kwamba ne Leo ne mêmè. Nenumfikishe mêmè . . . Nenku mêmè ngamba ne: “Ee, yêyè—yêyè ngudi mungenzele bibi.” Aci kacyena ne cidici cishintulula to. Mêmè ngudi ne cya kuya kudiye. Ee, yêyè’s ncidimba cya ekeleeziya ewu. Ukaadi—ukaadi mushaale mwena Kilisto. Utu udyà Meesa a Mukalenge mwaba ewu ku cibasa eku pamwe naanyi. Kabidi tutu babatijiibwe mu Dînà dya Mukalenge Yesu. Tutu bende lwendu lululame, bu bânà baa muntu, ewu ne ewu, pashiishe cintu kampanda kulwa kwenzeka.

<sup>201</sup> Kî mmuntu awu to. Makumi citeema pa lukama dyabulu ngudi mubwele pankaci paa bantu abu. Kî mbantu abu to. Ndyabulu. Nenku panudi anu nulekela dyabulu wenza cyôci aci, nudi nwezela mwaneenu awu bibi. Ncya bushuwa.

<sup>202</sup> Ee, kudi cintu cidici kacyi cyenda bîmpè pankaci paa Leo ne mêmè; tuye tukacilongolole. Ne wêwè mumone ne kudi cintu kampanda, wêwè awu ngudi ne cya kulwa kutudi, kwamba ne: “Nwênù balumyana lwâyi bubidi bwenu mwaba ewu nudisange. Netulongolole cintu aci.” Mpindyewu, pa dîbà adi, yêyè mukafikile apu, ne ulwa kujandula, pa dîbà adi, ke bwalu mbwabu. Ndi ngamba ne: “Ee, cintu cya kumpala, patwikala twêtù—twêtù katuyi mwa kupetangana, nanku nudi nulwa ku ekeleeziya mushindu awu.”

203 Nenku pashiishe panudi—panudi anu kanuyi ne cinudi nwenza pa bwalu abu to, nansha nanku, Mashu a Yesu Kilisto adi atukuba twètù bônso babidi. Nwamonu anyi? Kadi pa dîbà adi kansere kaa kale aku—aku nekalele kansere kakwabo, ne aku kansere nekalele paaku kansere kakwabo, nenku cintu cyônso mu kaabujima neciikale cisaama, myaba yônso, ekeleeziya mujima. Pashiishe nukafika mu mushindu wa nukaadi nubwela mu ekeleeziya nunku, bakwate anu mashika, bikengela bwa nubange kwambila muleejanganyi wa myaba bwa kuzaaza mabwe a mashika, kumpala kwa beena mu disangisha kubwelabo. Mpindyewu, nudi bamanye ne aci ncyà bushuwa. Bakwate mashika's! Muntu usòmba ku luseke aku, nudi bamanye, kayi wambaku cintu nansha cimwe to. “Ee, kadi peetu's tuvwa baa nyuma be pa ciibidilu.” Ee, cyènzèkì ncinyi? Nuvwa nunyeema bìmpè, mbwalu kaayi abu? Nwamonu's, mpekaatu wenu ngudi unutupulula. Ne Nzambi neanwòmèkèlè bwalu abu, nwènù bânà beetu. Mpindyewu ndi muswe kulongolola cintu eci.

204 Kakwena cintu cibi kùndì mèmè to, kakwena cintu cibi kudi Leo to; dyabulu ngudi mubwele pankaci peetu. Ncyà bushuwa. Longololaayi cintu aci. Nda kudiye. Pashiishe yèyè kayi muswe kuteeleja to, anyi mèmè nciyi muswe kuteeleja to, ewu anyi ewu, pa dîbà adi ambila ekeleeziya. Padiye kayi ulwa kupungishangana ne ekeleeziya awu munda mwa matuku makumi asatu to, nenku udi uumushiibwa mu dikubiibwa dya kudi Yesu. Tudi tumusuulula. Aci ncyà bushuwa menemene. Pashiishe tangilaayi numone cidi cyenzeka. Nulekele Nzambi ènzè dikazamuna adi pa dîbà adi. Nwàmanyi kuumushapu byenu byanza. Nwàmanyi kwenza mwenu peenu mwa kwenza. Nenku nulekele Nzambi ànjì amwangate kakese; Yèyè ke wàmwela mu byanza bya dyabulu. Pa dîbà adi nealwe. Yèyè kayi mulwe to, mwoyi wende newikale anu wa citupa cîpì.

205 Nudi bavuluke mu Bible, mwaba uvwa mwaneetu wa balume uvwa kayi muswe bwa kudilongolola kumpala kwa Nzambi awu? Mbanganyi badi bavuluke bwalu abu? Uvwa wenda masandi ne mamwèndè mudiishi, kadi kabayi mwa kufika ku dimulongolola to. Pòlò kwambaye ne: “Mwelaayi mu byanza bya dyabulu, bwa kabutu.” Nudi nujandula ne, mu Kolinto Mwibîdì, yèyè awu's wakadilongolola.

206 Ndi ne mwaneetu, mulunda mwîmpè, ndi muswe kuteela dînà dyende mwab'ewu, mwaneetu muiyiishi. Nenku mwaneetu muiyiishi ewu, dînà dyende m'Mwaneetu Rasmussen. Bààbùngì beenu nwènù bambi badi basòmbe mwaba ewu aba, diloolo edi, dînà dyende didi mu bibejibeji byenu. Mmuyiishi wa pambelu paa cyena mangumba wa mu Chicago. Nenku tangilaayi. Uvwa ne mwanende wa balume, mwambi, ke kuyaye kasela mwànà wa bakaji wa cyena Katolike, ne kuditwa mu njila awu mushindu awu. Nenku bavwa baya bakenza *bikampanda*,

*bikansanga*, ne *bikankenga*, ne—ne bikwabo byònsò; kulwaye kupeta lutatu. Ke papa wende kuya kudiye, kwamba ne: “Mpindyewu tangila, wêwè mwanaanyi, kwêna mwa kuswaku kuya kadipungisha anyi?”

Yèyè ne: “Papa . . .”

Kubiikilaye ekeleeziya wabo awu ne mmusumba wa bansantu babunguluki baa mu malaba, papa wende. Yèyè ne: “Mpindyewu, tangila, kwêna mwa kuswaku kuya kalongolola cintu aci ne ekeleeziya ewu anyi?”

<sup>207</sup> Yèyè ne: “Mpindyewu, papa, udi papa wanyi, kadi ncyêna muswe kubwelakana neebe to.” Eyo.

<sup>208</sup> Ke kuyaye kangata umwe wa ku balami ne kupwekabo kwende aku. Yèyè ne—ne: “Wesley, ndi ne dijinga dya kuyiikila neebe.” Yèyè ne: “Kwêna mwa kuswaku kuya kalongolola cintu eci ne ekeleeziya anyi?” Ke kumupaye kaadyandamuna kîpî kaa myaku ibidi mushindu awu. Yèyè ne: “Vulukka, Wesley, mêmè ke mpaasata wa ekeleeziya wawa. Ndi papa webe, kadi ndi muswe kwenza cidì Nzambi mwambe bwa kwenza. Nyawu nkupa matuku makumi asatu bwa wêwè kulongolola bwalu abu ne ekeleeziya, cyanaana netukwipate mu Bwikadi bwa Nzambi. Wêwè udi mwanaanyi mulela; awu pende’s m’Musungidi wanyi.” Yèyè ne: “Ndi mukunange. Ne wêwè udi mumanye ne ntu mukunange, Wesley. Ndi mufwanyine kufwa mpindyewu mene bwa bwalu bwebe wêwè. Kadi bidì bikengela ulwe mukumbanangane ne Dìyì dya Nzambi. Wamonu anyi?” Yèyè ne: “Mêmè ke mpaasata. Ndi mudiishi wa mikooko ya cisumbu aci. Wikale mwanaanyi mêmè, anyi wikale nì nganyi nì nganyi, bikengela ululame mu njila wa Dìyì dya Nzambi. Wêwè kuyi mwenze nanku to, pa dîbà adi ncyêna mwakanyine kwikala mudiishi Wende wa mikooko to.”

<sup>209</sup> Balumyana, s’ke mpaasata nyawu. S’ke muntu nyawu. Kanwena nwela meeji ne mmwômò anyi? Ke muntu nyawu. Ke kwambilaye mwanende wa balume mulela cyôci aci. “Ke kumutapaci ku mwoyi,” mwakambaye. Kadi kwambaye ne: “Cinyi? Uwatapa ku mwoyi ke nganyi, ke muntu, anyi kutapa Musungidi webe? Pa nanku,” mwakambaye, “nenku ke twêtù kutungunuka.” Ke yèyè ne: “Kaakaswa kucyenza to. Ke twêtù . . . mêmè kwambila ekeleeziya.”

<sup>210</sup> Yèyè ne: “Mwanaanyi mulela, Wesley, udi ubenga kunteeleja, mu bwalu ebu. Udi ubenga kuteeleja mulami. Ne wêwè’s udi ntemu wa bwalu ebu, Mwaneetu *Kampanda*?”

“Eyo.”

“Mbîmpè. Pa dîbà mwandamukulu, dyalumingu didi kumpala edi, mbingu inayì kuumukila ku mpindyewu, yèyè kayi mulongolole bwalu abu ne ekeleeziya ewu to, netwêlè Wesley, mwanaanyi, mu byanza bya dyabulu, bwa dibutuka dya

mubidi. Mashi Ende, Mashi a...a Yesu Kilisto, ne ekeleeziya ewu, kabyena bimukuba kabidi to.”

<sup>211</sup> Ke diloolo adi kulwadi. Kwimanaye mu cyambilu, kwamba ne: “Ucidi ne tusunsa tubidi.” Diba kukumbanadi. Yeye ne: “Mpindyewu, bu mudi mwanaanyi, Wesley Rasmussen... biikale byambiibwe kudi disangisha edi, kudi Wewè, Nzambi wa Bukole bwonsò: Twenji mwetu peetu mwonsò mwa kwenza, bilondeshile Mèyi Ebe ne mishindu ya dileeja dya njila ditu Mwâna Webe—Webe, Musungidi wetu, mutushiile. Twètù mpindyewu, ndi ngela mwanaanyi, ekeleeziya ewu ne mémè, bwa dibutuk-...mu byanza bya dyabulu, bwa dibutuka dya mubidi wende, bwa musuuka wende wasungidiibwa.” Ke cyonsò cyakambiibwa aci. Bwalu nansha bumwe kî mbwenzeke to, munda mwa lumingu anyi mbingu ibidi, pâmwapâ ngondo mujima anyi ngondo ibidi.

<sup>212</sup> Bufuku kampanda, mukwacikwetu Wesley kusaamaye. Nenku mmwenze anu usaama, ke disaama kwikaladi dyenda dikola. Kubiikidishaye ngangabuka. Ngangabuka kulwa e kumupimaye. Uvwa ne mubidi kapywa wa degrés lukama ne itaanu [40,6° C]. Kayi mwa kupeta civwa cyenzeja to. Ke disaama kwikaladi anu dyenda dikola. Ngangabuka kwambaye ne: “Nsongalume, ncyêna mumanye ne mbwalu kaayi budi bukuvwile to.” Kupangaye cya dyenza. Kwambaye ne: “Netubiikidishye ngangabuka wa dimanya dya pawadi.” Kubiikidishabo ngangabuka mupiluke, ke ngangabuka mupiluke kubwelaye muntwamu. Kuyabo nende ku lupitaadi, kumupimabo, ne bikwabo byonsò. Ke kwambaye ne: “Ncyêna anu ne mushindu wa kukwambila to. Nsongalume ewu udi anu—anu umweka wa lufu.” Mukajende mwimane mwaba awu, udila mwadi, byonsò mushindu awu. Ne bânâ biimane banyungulukile bulaalu ne byonsò mushindu awu. Yeye ne: “Ukaadi ufwa. Kwajiki.” Yeye ne: “Dituuta dya mashi ne mweyelu wende, bidi anu byenda bipweka misangu yonsò.”

<sup>213</sup> Yeye ne: “Biikilaayi papa.” Kaa, eyowa’s. Ke mushindu wa kubyenza ngwawu. Ke mudibi. “Biikilaayi papa.” Ke papa wende kupatukaye lubilu mwaba awu mutangile ku lupitaadi, lubilu lukole, bwa kuya kamumona. Yeye ne: “Papa, ncyêna ne mushindu bwa mpindyewu to, kadi Nzambi ngudi uumvwa mêyi aanyi. Nêdongololè maalu ônsò. Nêmbilongololè. Eyo, ke cîngènzà.” Eyowa’s, mukalenge, mwaneetu. Anu mwaba awu mweyelu wende kubangawu wenda ulongoloka.

<sup>214</sup> Nenku dyalumingu dyakalonda, wakiimana kumpala kwa ekeleeziya. Kwambaye ne: “Ndi mwenze mpekaatu kumpala kwa Nzambi, kumpala kwa ekeleeziya ewu. Mémè kubenga kuteeleja mêyi a mpaasata. Mémè—mémè kubenga kuteelaja mulami ewu.” Ke yeye ne: “Ndi ndomba ekeleeziya ewu amfwile luse bwa bubu bûndi mwenze mushindu awu.” Yeye ne: “Nzambi ngudi mulame mwoyi wanyi.” Ndi nkwambila, wakadilongolola. Eyo. Ke cyôci



aci cidi cikengela nwênù kwenza, nwamonu's. Nwamonu anyi? Nwênù, bu nwênù nanshà mwa kwikala kubyenza mu mushindu wa Nzambi! Nwamonu anyi?

<sup>215</sup> Mpindyewu, nudi numona, mushindu utudi twêtù twenza, tudi tubweja cisangilu cya kasumbu kaa balombodi, twamba ne: "Ee, mpindyewu, ke kulama . . ." Ncyèna ngamba tabernacle to, kadi ndi ngamba twêtù beena Mishònyì. Tudi tubweja cisangilu cya kasumbu kaa balombodi, twamba ne: "Nudiku nwela meeji kaayi bwa Jones? Nudiku nwela meeji ne bivwa bikengela twêtù kwenza nende cinyi? Mèmè ndi ncinka ne mmufwanyine kwikala cidimba cimpè menemene mu ba-Méthodistes kutamba mwetu emu." Ke bwalu abu's. Aci, aci ncibi. Ke bwa cinyi kabyena bikengela twêtù kulonda bilele byabu abi nansha; ne mwepiskopo kampanda, bikengela twêtù kumubiikidisha, cidimba cya . . . Nutu numubiikla ne nganyi apa, munene wa district wa mu ekeleeziya wa Mpenta ewu? Mukulu wa district, kumubiikidisha bwa kulwaye kumona ngiikadilu wa muntu awu.

<sup>216</sup> Twêtù Bible ngudi utwambila cya dyenza. Ke bwa cinyi katwena tukutakanangana ne mangumba abo awu to. Tudi tushaala badishikamine ku cintu aci. Amen. Kanwena numfiikila munda to, mmmwômò's? Kanwenji nanku to. Eyo. Misangu mikwabo nêmpetè ndambu wa nkonko ya mimpè menemene maalaba diloolo. Kadi, ee, ncyà bushuwa. Nwamonu anyi? Nwavulukaayi. Manyaayi ne . . .

<sup>217</sup> Ndi ngamba bwalu ebu mpindyewu. Nwênù badi mwaba ewu bafumine mu ekeleeziya mishiileshiilangane ya cyena mangumba, dingumba dyenu, ne, mwaneetu wa balume, ncyèna ngamba ne kwèna mwena Kilisto to. Ncyèna ngamba ne dingumba dyenu kadyenamun ne binunu bya beena Kilisto baa balanga mwômò to. Ndi mèmè nteeta kwamba bwa cinyi twêtù katwena dingumba to. Mbwalu, mèmè ncyèna mufwanyineku kwimanyina cya nanku to. To, mukalenge. Ncyà bushuwa ne ncyènàku mufwanyine kuciimanyina to. Bôbò badi bateeta kukwambila cyûdì wêwè ne cya kwenza. Piikala Nzambi mumbiikile bwa kuyiisha Evanjeeliyo, nenku's ndi m'Muyiisha mu mushindu udi Nzambi ungambila bwa kuyiisha. Ke mudibi menemene, mushindu udici cifunda mu Bible ewu. Piikalaci kacyi cikumbanangana ne Eci to, nanku cidi . . . Nzambi ke wândumbulwisha bwa bwalu abu. Kadi mèmè—mèmè—mèmè mumone mbwa wa diitu ulwa, anyi mwena lukuna ulwa, kadi mpanga kubadimwija, dîbà adi Nzambi neandumbulwishe. Kadi mèmè munudimwije, apu abu bwalu budi anu mbwenu. Nwamonu anyi?

<sup>218</sup> Vulukaayi ne: "Mu matuku a ndekeelu amu, bikondo bya njiwu mikole nebilwe, bantu nebiikale badinangi anu baa bôbò biine, baditambishi, badibandishi, bapendi baa Nzambi." Nwamonu's, bapendi baa Nzambi: "Kaa, musumba wa

bitatakane wawa. Matuku a bishima akaadi mamane kupita. Cintu bu nanku kacituku to.” Awu mmuprofeta wa mashimi wa kale. “Mpindyewu, tudi bamanye ne bakaji beetu badi ne cyumvwilu cyàbùngì anu bu cya balume menemene.” Mèmè ncyèna nkokangana pa aci to nansha kakese, kadi Bible wa Nzambi mmwambe ne numuumushe mu cyambilu. Aci’s—aci’s ncìmpè kwòkò bwanyi mèmè, nwamonu’s. Ncya bushuwa. Eyo. Nwamonu anyi?

Kadi batu bambe ne: “Ee, mpindyewu, mangumba etu, tudi ne bantu baa maalu mîmpè bààbùngì anu bu munudi naabo mu tabernacle amu.” Ncyèna ngamba aci to nansha kakese, kadi Bible udi upiisha mangumba. Ncya bushuwa. Nenku, pa nanku awu, ncyèna ngamba ne kanwena ne bidimba bya bîmpè mu ekeleeziya wenu to. Aci ncilenga cya dikema. Mbantu bîmpè. Bamwe baa ku bantu badi batambe bwîmpè, ntu nsambakeena naabo mu yònsò ayi, beena Katolike ne bikwabo byònsò. Mu yònsò ayi, ntu nsambakeena ne bidimba bîmpè.

<sup>219</sup> Mpindyewu, mushindu utwatwala eci mpindyewu, balunda baanyi, bu Nzambi mwa kwanyisha, mu malonga abidi adi alonda aa, pàmwápa...Nènnùleejè maalaba mu dinda ne byakengela bwa twètù kutungunuka maalaba mu mapingaja anyi to, nwamonu’s, bwa kucipatula. Citudi tuteetela kucyenza, ndi muswe kupweka naaci ne kucifikisha pa kaaba kampanda mpindyewu. Mpindyewu, pawikala muswe kulwa ne muntu kampanda, udi mwitabijiibwe bîmpè menemene bwa kwenza nanku. Kadi wavuluka mpindyewu ne, kwikadi—kwikadi wâya mwikale uteeta anu bwa kupeta mwaba udi cilema to. Udi ulwa mwab’ewu...Bândi ngambila badi anu beena disangisha dyanyi—dyanyi, nudi numona’s. Ncitu ndongesha cyôci eci pambelu paa disangisha dyanyi edi to, bwa abi bidi bitangila muntu wa cyanaana. Aci, yèyè ngudi mulami wa mikooko ya cisumbu aci. Nenku—nenku mèmè ndi anu...[Katupa kaa mukaba wa mèyì munda mutupu—Muf.]

<sup>220</sup> Alukila buludi ku Genese, neücyângàtè kakuyi lutatu to, ne neumone mwaba udici. Mpindyewu netupingane ku Genese, bwa kujandula ne mbwa cinyi mwânà mulela mu masandi awu kavwa mwa kubwela mu disangisha dya Mukalenge munda mwa nkongo dikumi ne inaayi. Mushindu udibi byangata...Bivwa bifwanyine kwangata bidimu nkama inaayi bwa mpekaatu awu kuumukaye. Mushindu utwajandula mudi bu—bubi bwa baledi ne cya kunyookiibwa pa bânà ne bânà, mushindu uvwa cyôci aci cibangile mu Genese, ne bikwabo.

<sup>221</sup> Nenku nwênù...pashiishe nenumone, patwapingana too ne kwaka, muvwa Nzambi, kumpala kwa difuka dya dyulu ne buloba, kumpala mene kwa kapwishipwishi kamwe kutaayikaku, kwaka naka kumpala mene kwa kwikalaku kapese kaa dibwe dya mudilu kaa bukênkè kufikaku ku diikalaku, Nzambi uvwa mumanye cifukiibwa ne cifukiibwa cyònsò ne

bintu byônsò bivwa ne cya kwikala pa buloba abi. Kudiku muntu mwaba ewu. . . Kwèna mufwanyine kuumvwija mwaku ewu, ne kuwusunsulula, ne kwamba cidi mwaku “kayi mikalu” uumvwija to. Mbyenze anu bu kunyungulula cyamu cyebe cya fôtô uteeka mu—mu mushindu wa mèsù kacya anu aaya. Bidi anu, anu kubangila mwaba awu kuya, kwajiki. Nwamonu anyi? Kayi mikalu! Kadi twêtù, ne meeji adi ne mikalu aa, katwenaku mwa kuumvwa cidi Meeji adi kâyi mikalu mwa kulongolola to. Nwamonu’s, katwena mwa kucyenza to. Wêwê, kwèna mwa kucyenza to. Nwamonu anyi? Kadi nwênù anu mwa kutangila, bashaale mu Nyuma, nudi mwa kucyumvwa nansha pa bule apu. Nenku—nenku alukilaayi mwaba ewu mu Mifundu nenumone mpindyewu, nwamonu’s, kwaka kumpala kwa difuka dya dyulu ne buloba.

<sup>222</sup> Mpindyewu, Bible mmwambe ne Yesu Kilisto uvwa Mwânà wa mukooko wa Nzambi. Mpindyewu teejeaayi ne ntema yônsò, bwa ne, piikala bamwe beenu kabayiku maalaba to, bamone mwa kuumvwa mutudi tucijikija. Bible mmwambe ne Yesu Kilisto uvwa Mwânà wa mukooko wa Nzambi, mushipa kacya ku difuka dya dyulu ne buloba. Ncya bushuwa anyi? Wakashipiibwa dîbà kaayi? Kacya ku difuka. Ke dyulu ne buloba abi, piikalabi byenza ne mishiki ya tupwishipwishi tusunsuluke, tutuuke ku dîbà didi muulu mwamwa naka dyadya, kumpala kwa kwikaladi cìdìdi aci. Pashiishe, kumpala mene kwa kapwishipwishi kampanda kaa kumpala kutuukaku ku dîbà, piikalabi ne eci civwa nkapesa kaa dibwe dya mudilu katuuke ku dîbà, bifwanyine kwikala lukama lwa mbòmbò ne mbòmbò ne mbòmbò ya miliyò ya bidimu kale kumpala kwa mene kapese kaa dibwe dya mudilu kamwepele kaa bukênkè kwikalaku, Kilisto ukaavwa mushipiibwe. Padi meeji manene a Nzambi angata dipangadika pa cintu cimwepele, cikaadi ncintu cijikija. Paakamba Nzambi ne: “Kwikale,” nkumane kujika. Piikalabi byakakengela kupite bidimu binunu bya miliyò lukama, bwalu mbumane kujika anu padiYe mucyâmbè apu. “Nenku paakashipiibwa Mwânà wa mukooko kumpala kwa difuka dya dyulu ne buloba,” Bible umweumwe ewu, Nyuma umweumwe awu ngwâkafunda e kwamba ne: “Mênà etu akafundiibwa mu Mukanda wa Mwoyi wa Mwânà wa mukooko kumpala kwa difuka dya dyulu ne buloba.”

<sup>223</sup> Pa nanku muntu wâkafûnda musambu ewu ne: “Kudi Dînà Dipyadipya Difundiibwe Mu Butumbi,” nwênù nuvwa ne ngumvwijilu mwîmpè, kadi yêyè kavwa mu Mifundu to. Nwamonu anyi? Dînà adi dyakafundiibwa mu Butumbi pavwa dyulu ne buloba. . . kumpala mene kwa dyulu ne buloba kubangabi. Paakashipiibwa Mwânà wa mukooko, mênà etu akafundiibwa mu Mukanda wa Mwoyi wa Mwânà wa mukooko.

<sup>224</sup> Lekelaayi—lekelaayi nnupetele anu kaaMufundu kakese kamwe cyanaana. Nudi biitabe bwa kushaalaku kasunsa kamwe

cyanaana anyi? Nkamvwile mu meeji anu mpindyewu. Ngela meeji ne bikengela mbuulule mwaba mene awu. Ncyèna mutwishiibwe to. Nenku mpindyewu numfwile luse bwa dinulama mukùngùlù bule nenku ewu, kadi nkaavwa mumane anu kunwambila ne neciikale mundankulu; katwena banji anu kukufika menemene to. Kadi ndi—ndi muswe anu ku—kufika ku eci, ku Mufundu umwepele cyanaana udi utangila ciine aci.

Buululaayi pamwe naanyi mpindyewu mu Mukanda wa Loomo, nenku ndi muswe nubale pamwe naanyi bwalu ebu. Mpindyewu, indilaayi tumone, Loomo, ne ndi mwa kupapeta, anu lwa kaaba aka nenku. Mpindyewu twangataayi Loomo 8, nenku—nenku tubangilaayi ku mvensa wa 28 wa nshapita wa 8 wa Loomo. Nenku ndi muswe nucibale mu nyuma wa disambila pamwe naanyi. Teelejaayaaku anu mwaba ewu mpindyewu cidid Nzambi mwambe.

*Nenku tudi bamanye ne maalu ònsò adi akwata mudimu pamwe bwa dyakalenga dya aba badi banange Nzambi, dya aba badi...babiikidiibwe bilondeshile kiipacila kende.*

*Bwalu aba baakadyanjilaye kumanya, . . .*

<sup>225</sup> Aci cidid cinupa . . .Nudi mwa kubala pamwe naanyi anyi? “Bwalu ewu . . .”

*Bwalu aba baakadyanjilaye kumanya, yèyè wakadyanjila kabidi kubalongolola (eyo) bwa kwikalabo bakumbanangane ne cimfwanyi cya Mwànà wende, bwa yèyè ewu ikale mwanaabute munkaci mwa bânà baabo bààbûngì.*

*Kabidi aba baakadyanjilaye kulongolola, yèyè wakababiikila kabidi: ne aba baakabiikilaye, yèyè wakababingisha kabidi: ne aba baakabingishaye, yèyè wakabatumbisha kabidi.*

<sup>226</sup> Kacya anu ku difuka dya dyulu ne buloba! Paakatangila Nzambi panshi . . .Mpindyewu, Nzambi kêna ulombola birô Byende, wamba ne: “Ee, mpindyewu, ndi muswe ku- . . .Kaa, netwikale mwa kwenza cinyi mpindyewu?” Nwamonu anyi? Kakwena kantu nansha kamwe . . .

<sup>227</sup> Vulukaayi ne, ubi, mpekaatu, mbwakane bukudimika. Dyabulu kêna mwa kufuka to. Muntu ne muntu, nwènù bônso, nudi nuumvwa aci anyi? Aci ke Dilongesha dya ekeleeziya ewu. Dyabulu kêna mwa kufuka to. Yèyè udi mwa kukudimika cidid Nzambi mufuke. Mpindyewu, dikudimika ncinyi? Mwaba ewu, nudi numweka bu bantu bakole, ciibûngì cyenu. Teelejaayi eci. Twètù tudi bantu bakaadi baselangane. Nenku nwènù balume bakaadi baselangane ne bakaji bakaadi basediibwe nudi mwa kusòmba pamwe mudi mulume ne mukajende, ne bakaji biine abu badi anu mushindu umweumwe byenze bu ne kabatuku kacya . . .Badi virgo paucidi mushaale ne bayeebe

apu. Ncya bushuwa. Mpindyewu, ncikumbanangane ne mikenji ne cyanyishiibwe, ne ncimpè. Ncidi Nzambi mutume diyì bwa kwenza nanku. Mukaji wa cyanaana udi mwa kwenza cyenzi cimwecimwe cya mukajeebe aci; umwe wa kudibo, wèwè udi mwakane ku mèsù kwa Nzambi; kadi cyenzi cimwecimwe aci ne mukaji wa cyanaana, udi mupiishiibwe kumpala kwa Nzambi, dipiila dya lufu. Cidi ncinyi? Bwakane bukudimika, nwamonu's, bwakane bukudimika. Mpindyewu, dyabulu kèna mwa kufuka to, kadi udi ukudimika cikaadi Nzambi mumane kufuka.

228 Mashimi ncinyi? Mbulelela bukudimika. Muntu kampanda mwambe ne: "Kaa, tangila, s'muvwa mmu diisambombo diloolo, pa dîbà citeema, eyo, divwa Bill Branham usanganyibwa mu Jeffersonville," mmwômò. "Mwamwa mu cinwinu cya maala a kapya cya mu Antz, mukwacike," mashimi. Civwa ncinyi? Mvwa mu Jeffersonville. Aci mbulelela. Civwa mbwakane bukudimika buvwija mashimi. Nudi bumvwe cîndi muswe kwamba anyi? Nwamonu's, mashimi adi akudimika bulelela. Ncintu cidi cyambe mwaba ûmvwà nsanganyibwa. Mpindyewu, bu ciikala cyambe ne: "Mu ekeleeziya, uyiisha," mmwômò. Aci ke bwakane. Mmwambe bulelela. "Mu cinwinu cya maala, mwikale unwa," mashimi. Mukudimike; nudi numona, bulelela bukudimika. Nudi bumvwe cîndi muswe kwamba anyi? Bwakane bwônso ebu mbubi bukudimika.

229 Lufu, ncinyi? Mwoyi, mukudimika. Disaama? Bukole bwa mubidi, bukudimika. Wèwè udi ne cya kwikala muntu mwîmpè, wa bukole. Eyo. Pawikala usaamasaama, ncinyi aci? Bukole bwebe bwa mubidi mbukudimika. Nwamonu anyi? Ke cyônso cidiku aci. Ncinyi ciine aci? Nuvwa kwônso eku bakaji batekete, balenga kwîsù; ne balume baa bukole, balenga kwîsù. Mpindyewu nukaadi nwela minyengu, nukulakaja. Ncinyi aci? Mwoyi, mukudimika, nwamonu's, munkaci mwa kunyunguluka kadi kwalukila cyakabidi. Nwamonu anyi? Nenu bikengela kwalukilawu. Dînà dya Mukalenge dibeneshiibwe! Nzambi utu mulaye bwa kuwaluja. Nenu anu mudibi cya bushuwa ne udi—ne udiku (tudi bamanye ne wôwò awu udi mwaba ewu), nenu anu mudibi cya bushuwa ne udiku, Nzambi neàwâlùjè cyakabidi. Wakalaya ne wakadicipa ne neénzè nanku. Ke cidi ciwufila.

230 Mpindyewu, mmushindu kaayi, bivwa bikengela twikale bantu baa mushindu kaayi? Monaayi mpindyewu mudi bintu ebi byenzeka. Mpindyewu, aba baakadyanjilaYe kumanya, Wakababiikila; aba baakabiikilaYe, Wakababingisha. Dîbà kaayi? Kumpala kwa difuka dya dyulu ne buloba, kumpala mene kwa dyulu ne buloba kubangabi. Mpindyewu, bu twêtù mwa kwangata Mufundu ewu ne kubingisha bulelela cyôci aci, tudi bafwanyine kwangata mèbà ne mèbà pa ciine aci, kadi katwena—katwena baswe kwenza nanku to. Kadi bubu bwônso budi apa

ebu, mbwakane bukudimika buvwijiibwe bubu. Ke cyôci aci cidi dyabulu wenza.

Mpindyewu, paudi ufika pa cipimu cya didyambwila bujitu, ne umanya cidi cibi ne cidi cîmpè, udi ne cya kwela nyima ku maalu mabi ebe awu. Bwalu, udi mulela mu mpekaatu, mufwimba mu bubu, mulwe pa buloba ebu mwikale wamba mashimi. Pashiishe mu bushuwa bwa bwalu udi—udi mulela ku dijinga dya disangila dya mulume ne mukaji, nenku bikengela ulediibwe cyakabidi, bwa wêwè kupeta Dilediibwa dipyadipya, bwa kubwela mu Dyulu. Bwalu, ewu mushindu wa dilediibwa dyûdi naadi panwapa edi. . .

<sup>231</sup> Nudi numona mwaba udi Bantemu baa Yehowah bafwanyine kwikala baye kule mu ntupakanyi menemene mwaba awu, pa kwela meeji ne Dilediibwa dipyadipya ndibiika dya ku lufu dya mubidi anyi? Nudi numona, kacyenaku mwa kwikala aci to. Nwamonu anyi? Cidi ne cya kwikala cintu kampanda. . .

<sup>232</sup> Nwênù, nudi mu cipoolo cya dibà. Nenku cintu cimwepele cidi cya Cyendeleele cidi anu cintu kampanda citu kacyi ne ntwadijilu anyi ne ndekeelu to. Cyônsò cidi cya Cyendeleele kacituku ne ntwadijilu nansha, anyi kacadyakwikalaku ne ndekeelu to. Nwamonu anyi? Nenku wêwè mwikale citupa cya Nzambi, Nyuma udi munda mwebe awu katu mwanji kwikalaku ne ntwadijilu anyi kaadyakwikalaku ne ndekeelu to, nenku wêwè udi wa Cyendeleele pamwe ne Nyuma udi munda mwebe awu. Nwamonu anyi? Anu bu mudi di—di—dinanga dya *Agapao*, pashiishe didi dipweka too dikashaala dinanga dya *phileo*, pashiishe dikafika too ne ku dinanga dya dyalakana. Didi ditungunuka anu ne kupweka ne kupweka, ne pashiishe dipweka mu didikudimika too ne mudidi dikashaala mushiki naka wa bukooya bumwe. Ee, mushindu umwepele, Yesu ke wâkatûlulukila ku cibandilu cimwecimwe aci panshi apa, bwa kajuululula ne kwalujulula ku mushindu wa mutambe kutumbuka, kuumusha ku mushindu wa mutambe kupwekela; kuumusha ku lufu kufikisha ku Mwoyi, kuumusha ku disaama kufikisha ku bukole bwa mubidi, kuumusha ku bubu kufikisha ku bwakane. Nwamonu anyi? Yèyè wakuumuka ku Mutambe kutumbuka kulwa too ne ku mutambe kupwekela, bwa Yèyè kwangata mutambe kupwekela kumufikisha ku Mutambe kutumbuka. Yèyè wakashaala mêmè bwa mêmè mpete mushindu, ku ngâsà Wende, wa kushaala Yèyè, mupyanyi wa Nkwasa wa butumbi mu Butumbi. Nudi numona cîndi muswe kwamba anyi? Bintu abi.

Mpindyewu tangilaayi. Kale wawa pavwa dyulu ne buloba ebu kabiyi byanji kubanga mu tupwishipwishi mwamwa, paakamona Nzambi civwa ne cya kwenzeka, anu mwaba awu Yèyè kukumona wêwè, Yèyè kummona mêmè, Yèyè kumona nkupà yônsò, lujiji lwônsò, ludimba lwônsò, kajijijiji kônsò.

Cyònsò civwaku mwa kwikala pa buloba aci, Yèyè wakacimona anu piine apu. Cya bushuwa, Yèyè wakacimona.

<sup>233</sup> Mpindyewu, Yèyè kaakambaku ne: “Nèntumè Mwanaanyi panshi bwa kuMulekela kufwaye, nenku pàmwàpa muntu kampanda neikale mwa kuMuumvwila luse. Ne neciikale bwalu bwa bukwate ne bya luse, pàmwàpa misangu mikwabo muntu kampanda mmufwanyineku kusungidiibwa” to.

<sup>234</sup> Ukaavwa mudyanjile kumanya ne wasungidiibwa nganyi! Eyowa’s, mukalenge. Wakamba ne: “Ndi mukine Esawu, ne munange Yakobo,” kumpala mene kwa yònsò wa kudibo kayi nansha mwanji kupeta mushindu wa kujaadika civwaye to, bwalu Yèyè uvwa mumanye civwabo. Uvwa mumanye. Yèyè mmumanye kantu ne kantu. Yèyè ukaavwa mumanye cyúvwà wèwè mwa kwenza, kumpala kwa kuyi mwanji kulediibwa, anyi kwa dyulu ne buloba kabiyi byanji kubanga.

<sup>235</sup> Tangilaayi mpindyewu. Anu bu munudi bamanye, mèmè ntu—ntu—ntu mutuuci wa cingoma. Ntu—ntu munange bingoma. Mukaji kampanda mu Texas mwamwa, ngela meeji mmu Texas, mmuntwadile cingoma cya Swift, Swift wa mazaji nkama ibidi ne makumi abidi. Mvwa mucijingejinge be. Ndi muswe kucikenketa. Nkaacingoma kakese kaa bukole bupite. Nkaa mazaji makumi abidi ne abidi, dizaji dimwe diikale ne tundimba makumi anaayi ne mwandamukulu. Nenku udi mwa kwelamu tundimba atu ne byanza. Mpindyewu, cyapu ncyambe cyòci ne: “Kwenji nanku to; mbya njiwu mipite.” Kadi udi mwa kwela tundimba mu dizaji adi bwa kuyadi mu makàsà binunu bitaanu [mètres 1524] ku kasunsukila kaa kasunsa, kadi mwikale anu kacya wacilama mwaba waci awu. Makàsà binunu bitaanu [mètres 1524] ku kasunsukila kaa kasunsa, aci’s mmile mujima [kilomeeta 1,5] ku kasunsukila kaa kasunsa. Mu kwamba kukwabo, kabemba kasòmbe, mu ntanta wa yards nkama ibidi [mètres 183]. Wasa kabemba aku, umona masala apeeepuka kumpala mene kwa cingoma kukukukulaci. Nudi numona anyi? Ciine aci, kadi udi ucyangata, katupa kaa kabeetelele kaa kaci kaa kwela ku dínù aka, nenku ukabweja mu kapyà keebe kaa cingoma aku, ne usakidila ndambu búngì *ebu* mwômò amu, anu búngì bukumbane bùdi mufwanyine kukwata ne kaci kaa kwela ku dínù aku; nenku wasa ngulube wa diitu lwa kundekeelu kwa nzubu ewu eku, yèyè kacya anu wàsomba mukutangile. Mbwalu kaayi abu? Dizaji didi disunsuluka, diyaaya lubilu lukole be. Nenku—nenku udi mwa kuteeka dibeji pankaci paa mwaba ewu ne paapa naka, nenku kwakumonaku nansha cishààdilè cya mufuba cimata pa dibeji apu to. Bidi anu byalukila; kî nku—ku butu, butu bwa volcan to, kadi bidi biya kule kupita apu. Bidi byalukila ku acides ya ntwadijilu ici yenza cyamu cya kabanda ne cya plomb bidi munda amu abi. Bidi byalukila muvwabi kukaadi bidimu binunu lukama lwa miliyò. Mpindyewu, kaadizaji kakese nkòkò aka,

kaadizaji kaa tundimba makumi anaayi ne mwandamukulu kândi mukwate mu cyanza aka, kadi mu kasunsukila kaa kasunsa kadi kalonda aka kiikale kaalukila ku civwaku kukaadi bidimu miliyô lukama. Nenuku bu dyulu ne buloba pâmwâpa mwa kushaalaku kabidi munda mwa bidimu bikwabo miliyô lukama, mbifwanyine kwalukila kabidi ku dizaji, bifwanyine kwalujiibwa, bwalu mbifwanyine kwandamuka cyamu cya kabanda.

<sup>236</sup> Mpindyewu tangilaayi cyakenza Nzambi, nenuku pa dîbà adi nenuMunange. Pashiishe nenwalukile mu mènènù, nenuku mu dinda nulaala pashiishe ndambu. Nenuku—nenuku ne—nenuku nenuMunange kupita bya kwônsò eku. Mpindyewu, Nzambi m’Mwenji wa makumi a bya dyasa naabi nzubu. Mbanganyi batu bamanye aci? Yèyè m’Mwibaki. Eyo. Teelejaayi ne ntema yônsò. Mpindyewu, Nzambi kale wawa, anyi, batu bamba. . . Mpindyewu netwangate mmwenenu wa balondolodi pa bwalu abu. Nzambi, kukaadi bidimu miliyô binunu lukama, pakaavwaYe ujinga kwenza dyulu ne buloba, ee, Yèyè wakabanga anu cyanaana. Mpindyewu, Yèyè uvwa. . . Uvwa ne mmwenenu kampanda mu meeji Ende.

<sup>237</sup> Mpindyewu wêwè newâmbè ne: “Kadi Yèyè munene mushindu awu, Mwaneetu Branham, mmunyi mwakiitabilaYe dyabulu bwa kwenzaye mpekaatu?” Ee, Yèyè’s uvwa mumanye, kumpala mene kwa dyabulu kufukiibwaye, ne yèyè awu ke wîkala dyabulu. Butumbi’s we! Kadi mpindyewu ngaavu kudyumvwa mutendeleedi be. Kaa, ekelekele! Yèyè’s uvwa mumanye, kumpala mene kwa dyabulu kufukiibwaye, ne yèyè awu ke wîkala dyabulu. Mpindyewu udi ukonka ne: “Kadi bwa aci udi wamba bishi?” Udi wamba ne: “Uvwa mwanji kumulekela bwa kwikalaye dyabulu bwa cinyi?” Mbwa Yèyè kujaadikiibwa ne udi Nzambi. Ke bwa cinyi Wakacyenza. “Bwa cinyi kuvwa bantu babi? Bwa cinyi?”

<sup>238</sup> Uvwaku kumpala nganyi, Musungidi anyi ngènzâmpèkâàtu? Uvwaku kumpala nganyi? Musungidi. Nganyi uvwaku kumpala, Mwondopi anyi mubeedi? Byakaanyishiibwa bwa ngènzâmpèkâàtu ikaleku bwa cinyi? Bwalu byambiibwa bya Yèyè awu bidi m’Musungidi. Bu ne kacya kakuvwaku kwanji kwikala ngènzâmpèkâàtu to, Yèyè nunku kî mmumanyiibweku bu Musungidi to. Aleluuyah! Yèyè udi mwa kwenza ne maalu ônsò adisange enzeke bwa butumbi Mwende. “Mufwimbi udi mwa kwambila. . . Anyi, dibungu didi mwa kwambila mufwimbi ne: ‘Wângenji nunku’ anyi?” Udi pa lukata nganyi? Udi ne diima nganyi? Didi mu byanza bya nganyi? Pôlò wakamba ne: “Kaa, muntu mukutakane naanyi we, Yèyè kaakambaku ne Wakajuula Pâlò mu kiine kiipacila aka anyi?” Cya bushuwa. Yèyè uvwa mucimanye. Kumpala kwa kwikalaku dyulu ne buloba, Yèyè ukaavwa mumanye ne cikampanda neciikale cikansanga. Wakalekela bwa mpekaatu ikaleku, bwa kumonaYe



mwa kwikala Musungidi. Wakalekela bwa disaama diikaleku, bwa kumonaYe mwa kwikala Mwondopi. Wakalekela lukinu bwa lwikaleku, bwa kumonaYe mwa kwikala Dinanga. Cya bushuwa, ncyakenzaYe. Yèyè udi Nzambi, ne abi mbyambiibwa Byende. Nenku bikengela Yèyè kwikala ne cintu kampanda bwa kuleeja patooke byambiibwa Byende abi.

<sup>239</sup> Mmunyi mùdi mufwanyineku kumanya ne bufuku budiku, mmunyi mùdi mufwanyineku kumanya ne budiku? Bu ne byònsò bivwa anu mundaamuunya pa mundaamuunya, mmunyi mùvwà mufwanyineku kumanya ne bufuku budiku? Kudi bufuku, mbwa bumone mwa kujaadika ne mundaamuunya mudiku. Cya bushuwa, budiku. Amen. Nudi numona cyakenzaYe anyi?

<sup>240</sup> Kadi pavwaYe kwaka, kumpala kwa difuka dya dyulu ne buloba, kumpala kwa kwangataYe dîbà dya kale edi ne kwenzaYe bwa diikale dinyungulukila mutoto wa kale utudi twêtù basòmbèlepu mpindyewu ewu, buloba ebu, ne kubufwimbaYe mwaba ewu ku dîbà, ne kubuteekaYe bwikale bunyungulukila dîbà. Twàmbè ne, ke dîbà *edi*. KubufwimbaYe lwa ku *elu* luseke, ne kubulekela bulembelele mwaba awu munda mwa bidimu miliyò binunu lukama. CivwaYe wenza ncinyi? Ma-gaz kampanda. KuyungulukilaYe *elu* luseke, kwenzaYe cikwabo cintu. CivwaYe munkaci mwa kwenza mwaba awu ncinyi? Ndambu wa binshidimba. KuyungulukilaYe *elu* luseke, ne civwaYe munkaci mwa kwenza kwine aku ncinyi? Wenza ndambu wa calcium. CivwaYe munkaci mwa kwenza ncinyi? Uvwa utwenza wèwè ne mèmè. CivwaYe munkaci mwa kwenza ncinyi? Byenze bu mwenji wa makumi a bya dyasa naabi nzubu mwikale uteeka mabaya ende a ibidi-ku-inaayi ne ibidi-ku-mwandamukulu, ma-triplex ende, bya dilamika mu nseke, mwikale mumanye anu ne nzubu búngi kaayi ivwaye ne cya kwibaka. Nenku twêtù mbatwènzè ne bintu dikumi ne bisambombo bya ku buloba, nenku Yèyè uvwa munkaci mwa ditwenza twêtù bònsò, mwikale utwadija mwaba awu kumpala mene kwa dyulu ne buloba kufikabi ku diikalaku. Ne Yèyè. . . Buvwa mwa kwikala buleepakanangane mwine musangu awu; ncyèna mumanye ne civwa cinyi to. CivwaYe wenzela ngòlò, ne cyamu cya kabanda, ne cyamu cya kabanda cya kàlaabi, ne mâyi, ne bintu byònsò abi ncinyi? Yèyè m'Wwenji wa makumi a bya dyasa naabi nzubu. Udi mwa. . . Mwibaki, Yèyè uvwa munkaci mwa kwadija bintu byònsò mwaba awu, bintu byònsò bimana kukosa ne bisonga. PaakamanaYe kubyenza byònsò, civwa anu difükuka dinene dya volcan. Ke kulekelaYe ntutu ya kale ya volcan ayi ilaadila mwaba awu munda mwa bidimu miliyò lukama, bwa kwenza ndambu wa calcum. Ncinyi ciine aci? Ncitupa cyebe wèwè.

<sup>241</sup> Nenku pashiishe, kumpala kwa kwikalaku katupa kaa mwoyi pa buloba ebu, mibidi yetu ivwa miteeka mwaba ewu. Aleluuyah! Kumpala kwa dimata nansha dimwe dya

citaleela kufikadi pa buloba, twêtù tuvwa bateeka mwaba ewu. Pavwa Adama wenda tamakatamaka mu budimi bwa Edena apu, mêmè mvwa muteeka mwaba ewu. Amen. Eyowa's, mukalenge. Kaa, butumbi's we! Pavwa Bakeluba, mitooto ya mu dinda yimba pamwe apu, ne pavwa bânà baa Nzambi beela mbila ya disanka, mvwa muteeka mwaba ewu mwindile anu mpuuya wa mwoyi bwa kulwawu. Mvwa mwaba ewu. Ukaavwa mungenze mwaba ewu, mulekele mubidi wanyi mulaale mwaba ewu. Eyowa's, mukalenge. Bu kabiyi nanku to, mmufwanyine kwikala mufumine penyi? Huh? Wôwò mwine wakafika mwaba ewu bishi? Nzambi ngukaavwa muwulaadikemu. Nzambi ngukaavwa muwënzè. Twâkenjiibwa ne bintu dikumi ne bisambombo: pituloolo, binshidimba, ne bukênkè bwa mu cibwashibwashi, ne bikwabo. Nwamonu's, tuvwa bateeka mwaba awu.

<sup>242</sup> Pashiishe cyakenzeka ncinyi? Ke Nzambi kwambila Nyuma Mwîmpè, netwangate bwalu abu anu mu mushindu wa cimfwanyi cyanaana ne: "Mpindyewu patukaaku wêwè, ndaaku ukenze mananga ne buloba bwabwa. Bwalu, Mêmè ndi dinanga, ne Wêwè udi cintu cipatula ku Mêmè, pa nanku mpindyewu ndaaku Wêwè ukenze mananga ne buloba." Ke Nyuma Mwîmpè munene awu, mutudi tucinka's, kupatukaye mwaba awu; tudi anu mu mushindu wa cimfwanyi mpindyewu. Kabivwa mushindu awu to. Mu bushuwa bwa bwalu, Nyuma Mwîmpè ne Nzambi badi ne kiipacila kamwekamwe, kiipacila kamwekamwe, Mupersona umwe. Numfwileku luse. Nenku twâmbè anu ne Yêyè wakabaaalula mapwapwa Ende e kuâbwikila mu nyungulukilu yônsò wa buloba, ke kubangaYe kulaadila. Adi dilaadila ndya bishi adi? Mushindu utu nzoolo wenza ne bânà bende awu, wenza cyoku cyoku, wenza mananga ne: "Cyoku, cyoku, cyoku." Kaa!

<sup>243</sup> "Eyi mwoyi we, patuka!" muvwaYe wela mbila. Utangila eku ne eku. "Ndi muswe bulenga bwikale pa buloba ebu. Wêwè bukênkè, patuka!" Nyuma Mwîmpè wenda wendakana. Nenku paakenzaYe nanku, ndi ntangila; ciwva cilwa, kudi kasulu kapweka kwinshi kwa kakuna muntu mwamwa, mwamwa muumukila calcium kiikale kapongoloka, kabwelakanangana ne binshidimba. Bidi bidivunga byenza cinyi? "Mwoyi, patuka!" Ke kaacilongo kakese kaa Paasaka kupatulaku mutu kafumina mwinshi mwa lubwebwe kampanda. "Lwâku apa, Taatu, umone cyacya naka."

<sup>244</sup> "Cyacya cimweka cilenga be. Wêwè tungunuka anu ne kulaadila." Kulaadilaye e kupatula bilôngò. Kupatulaye bukwamici bwônsò. Kupatulaye mwoyi wa bukwanyama. Nyuunyi kubanga kubuuka ipatukila mu lupwishi. Paanyima paa mutanci, ke muntu mulume kumwekaye ne mukaji; muntu kumwekaye, ne muntu uvwa byônsò bibidi mulume ne mukaji.

Kî ncilumaacikaji to, mpindyewu. Bivwa anu ne, anu mu yêyè amu, muvwa nyuma wa bukaji.

<sup>245</sup> Wêwè mwangate mulume ukaadi cilumaacikaji mushindu awu, udi mwa kwikala anu mu yêyè, bamwenze anu bîmpè ebi, kadi kwikale cintu cipampalamuke. Ne paudi wangata mukaji kampanda, muswe kwikala kukosa nsuki yende cisuba ne kuvwala cinsalabeeta, mwikale upatuka kwaka, wamba ne: “Nzambi abeneshiibwe’s we, mêmè’s nênkwambilè!” Kudi cintu cidi cipampalamuke. Mukaji utu ne nyuma wa bukaji, ne mulume udi ne bulume. Tutu bamanye aci. Ne nwênù nutu bamanye aci. Muntu mukaji utu ne mmwenekelu mwîmpè, padiye uteeta kwikala, kwenza maalu bu muntu mulume anyi?

<sup>246</sup> Mona’s, mvwa musòmbè musangu kampanda, pâmvwà mukubi wa nyama ya mwitu mwaba ewu, nenku mvwa musòmbè mu bis mwikale mbanda kuntwaku ntuuta mukaji awu mapi pa cibelu, ne cyanza cyanyi, mwikale nyiikilangana nende, kadi nciyi mumanye ne uvwa mmuntu mukaji to. Uvwa muvwale cimwe cya ku bifulu bya booshi baa soudure abi, ne binete binene bya mêtù manene abi mushindu ewu, ne mêmè musòmbèlè lwa paanyima apu, yêyè mwikale ulonda bwalu kampanda bukwabu bwa cintu kampanda civwa cyenzeke. Yêyè ne: “Udi mumanye’s,” ke yêyè awu, “makeelela diloolo awu’s,” mwikale anu ne mmwenekelu wa muumakane webe wa dikema, mwikale unwa mucu wa mfwanka. Yêyè ne: “Makeelela diloolo, nkwambila’s, mulumyana awu kusenunukaye, kuulu kwa cintu aci. Kwambaye ne: ‘Ekelekelee!’ kukulukaye kuntwaku wenda usenunuka’s.” Yêyè ne: “Kadi mêmè kufwa mu tuseku mûntù nciyiku mwanji kuseka to kacya bandela.”

<sup>247</sup> Ke mêmè paanyi mufwe mu tuseku, nudi bamanye, mushindu ewu. [Mwaneetu Branham udi utuuta cikashi cyumvwika—Muf.] Mêmè ne: “Mulume naanyi, aci’s civwa cibula cya bushuwa, kî mmwômò anyi?” Basòmbè mwaba awu’s tuyiikila mushindu awu. Kadi bu yêyè kayi muumushe cintu aci ne mukupe mutu, wa bwalu uvwa ne cikutu cya nsuki lwa kumutu aku, bileeja ne mmuntu mukaji. Ngâkadyûmvwa mushaadile bikole mûmvwà nciyiku mwanji kudyumvwa to kacya bandela. Mêmè—mêmè ne: “Udi muntu mukaji?”

Yêyè ne: “Mona’s, bushuwa’s!”

<sup>248</sup> Mêmè ne: “Umfwileku luse.” Nciwaku mwanji kumonaku cya mushindu wawa to. Mpindyewu, aci, ncyà bushuwa.

<sup>249</sup> Ngâkamòna cibayabaya cifunda dîngà dituku, cyakaswa kuntupisha ne disanka. Civwa ne cintu cinene cifundapu, ne: “Bainâbânzà bakaadi pa kuvwala bilâmbà.” Mundamunda mêmè kwamba ne: “Nzambi atumbe bwa ciine aci.” Nwamonu anyi? Kadi, mêmè kulwa kujandula ne, bivwa anu mbilâmbà bya mushindu kampanda bimana kwenza, nudi bamanye. Mvwa—mvwa ndyambidila ne bavwa mwa kuvwala bilâmbà byetu bya

bushuwa ebi. Ke mûngààkadyàm̀bidilà cya bushuwa. Cyàm̀ba ne: “Bainàbànzà bakaadi pa kuvwala bilàm̀bà.” Mèmè ne: “Nzambi atumbe bwa bôbò abu. Ncintu cîmpè. Aci, ncyà bushuwa ne ndi nsakidila Nzambi bwa aci.” Kadi, monaayi, bivwa mbilàm̀bà bya mushindu kampanda bikaavwabo bôbò bamane kwenza, cintu kampanda. Cívwa ne cya kwikala cintu kampanda cya lukutukutu, mu ditunga edi, kî mmwômò anyi? Eyo.

<sup>250</sup> Pashiishe paalu Adama kumweneka. Kadi Adama uvwa udyumvwa anu nkaayende, pa nanku Yéyè kupatula lubadi mu luseke lwende e kwenza Eva, cintu cyangata ku cikwabo cimwenzela yéyè. KwenzaYe. . .KupatulaYe nyuma wa bukaji mu Adama, e kumwela mu mukaji, nyuma wa dinanga, wa bukaji, wa musangeelu, wa kalolo. Ke kushiyaYe nyuma wa bulume mu Adama. Mpindyewu, piikalabi ne kudi cintu cya cishiilangane, kudi dikudimika mwaba kampanda. Mpindyewu, ne bubidi bwabo bavwa umwe.

<sup>251</sup> Pa nanku twánjì kwangataayi kaadinaya kakese kumpala kwa twètù kujikija. Ulwalwa ewu ke. . .Apa, ke Adama ewu mukwate Eva ku diboko bapatuka benda bendakana. Mèmè ntu munange muyiiki ewu be. Ke bapatuka apu, nudi bamanye. Ke Eva ne: “Kaa, munanga wanyi, muwám̀bì ne wêwè ngudi mwenze?”

“Eyowa’s, mèmè’s ngudi mwinyike mênà awu.”

“Kadi wawa udi umubiikila ne nganyi?”

“Wawa dyende nkabalu. Uh-huh.”

“Wawa ke nganyi?”

“Wawa nngombe. Uh-huh.”

“Wêwè ngudi mumwinyike nanku anyi?”

“Eyo. Uh-huh.”

<sup>252</sup> “Udi ubiikila wawa ne nganyi lwa kwaka naka, ibidi idi misòmbe paapa mitwangane mitu yaya?”

“Ayi nnyunyi ya nkusu.”

<sup>253</sup> “Aa, ngumvu. Ngumvu.” Ke batungunuka mushindu awu. “Kadi ewu udi apa ewu nganyi?”

“Ndi mbiikila wawa ne, *cikampanda*, ne ewu udi apa ewu.”

<sup>254</sup> Nanku: “Aa, ngumvu. Uh-huh. Mbilenga be.” Ke ntambwe kukungulaye. “Wawa udi umubiikila ne nganyi?”

“Wawa nntambwe.”

“Ewu ewu ke nganyi?”

“Cisumpantambwe.”

<sup>255</sup> Nanku, kaa, mùdì. . . “Aa, ngumvu.” Anu mùdì tumpuusu twànà’s, nudi bamanye, eku ne eku tudila nyawu nyawu.

256 Ke, paanyima paa mutanci, kukenzakanaye. Yèyè ne: “Munanga wanyi, tangila kwaka, dîbà dikaadi dyamba kubwela. Dîbà dyàkànyì dya kuya mu ekeleeziya.”

Nudi bamanye, kutu anu cintu kampanda pakaadi dîbà dyamba kubwela, udi uumvwa dijinga dya kukuukwila. Pawikala kuyi uya mu ekeleeziya diloolo adi to, udi uumvwa dijinga dya kubwela mu cibambalu kampanda, kubala Bible. Mbanganyi batu baswe nanku awu, bwa kuya paa nkaayeebe? Nwamonu anyi? Cidi anu munda mwa muntu bwa kwenza nanku awu. Bikengela nwikale nwenza nanku.

“Dîbà dya kuya mu ekeleeziya.”

257 Mpindyewu, kabaakambaku ne: “Mpindyewu, indila kakese mpindyewu, mpindyewu, Jones ngwa mu Assemblées, twêtù peetu nyawu tudi baa . . .” To, kakuvwa cintu cya mushindu awu piine apu to, nenku baakaya anu kuya. Kabavwa ne ekeleeziya mwine to, ne nkwasa mwîmpè wa kusòmba mushindu awu. Baakaya anu mwinshi mwa nzubu munene wa Mvidi Mukulu wa mu diitu, e kutwabo binù.

258 Nenu Kafulu kaa bukênkè kaka kavwa kalembelele muulu amu mu cipuka amu. Nwamonu anyi? Ndi mwa kuumvwa Dîyì dipweka dyakula dyamba ne: “Bànà Baanyi bāsànkì pa buloba, leelu ewu, bwa bidi Mukalenge Nzambi webe mukupe anyi?”

259 “Eyo, Mukalenge, tudi basanke leelu ewu.” “Kî mmwômò anyi, munanga wanyi?”

260 “Eyo. Eyo, munanga wanyi, tudi basanke.” “Mukalenge, ncyà bushuwa ne tudi tuKwanyisha. Mpindyewu nyewu nkaadi ndyolola bwa kulaala.” Nwamonu anyi? Ke mulume kwolola diboko dyende dinene adi, ne mukaji pende kudyolola, pa diboko dya mulume apu, ke mulume kulaadika cisumpantambwe ne ntambwe panshi, ne bintu byònsò bwa kulaalabi; mu ditalala dya dikema.

261 Ke Nzambi utuuluka ne ulwa baMushindikije mwaba awu, kaa, kudi musumba wa Banjelo, Gabriel, bifukiibwa Byende bya mu Dyulu. Ke bapweka babwela anu biteketebitekete mu nzubu wa bulaalu biikale bendela ku nsongo ya makàsà, nwamonu’s, benda bakenzakana. Gabriel kwamba ne: “Vwila kuneeku, Taatu. Vwila kuneeku. Tangila apa. Ke yèyè ewu. Mona, ke bânà Beebe badi badyòlòle panshi balaale aba.”

262 Mbanganyi mwaba ewu bakaadiku baye ku luseke lwa bulaalu, bamwe baa ku nwênù baamaamu, wèwè pamwe ne papa, nwela mwànà wa balume mutekete awu dîsù, mwànà mutekete wa bakaji, nwanji nuvulwijangana ne: “Kî—kî mmukufwane anyi, ku mushindu *kampanda* ne mushindu *kansanga*?” Nukaadiku benze ciine aci? Mona’s, misangu yàbûngì mêmè ntu anu nya ngambila Meda, ngamba bwa Joseph. Neámbe ne: “Bill, yèyè’s udi ne mpala dipomà mukufwane anu wèwè.”

263 “Eyo. Kadi, Meda, yêyè’s udi ne mèsù manene menze anu bu ebe awu.” Bwa cinyi? Yêyè udi citupa cya ku dyetu dis- . . . Ncipeta cya ku dyetu—disangila dyetu.

264 Mpindyewu, ke Taatu kwamba, udi mwa kwamba eci pa bwalu bwine ebu. Yêyè ne: “Udi mumanye. . .” Ke Gabriel ne: “Udi mumanye, mmukufwane anu Wêwè menemene.” Ke mmwenekelu udi nende Nzambi awu; anji ditangila. Ke mmwenekelu udi nende Nzambi awu. Mmufwanangane neebe. Wêwè udi kânà Kende. Mbanganyi badi bamanye aci? Nwamonu anyi?

265 Mpindyewu tangilaayi. Mushindu wa mwoyi udi mutambe kupwekela utudi naawu ngwèpi? Ludimba. Mushindu wa mwoyi udi mutambe kutumbuka ngwèpi? Muntu. Cya bushuwa. Nenku mushindu udi mutambe kutumbuka ngwèpi? Wakatungunuka anu kubangila ku wa mutambe kupwekela, wenda ubanda, kuumukila ku ludimba kuya ku *cikampanda* ne ku *cikansanga*, ne ku nyuunyi, too, ne bikwabo, mu mishindu ya mwoyi ya mitambe kutumbuka, ne mwalubi kufika ku mushindu wa mutambe kutumbuka uvwa mwa kulwa, ke pa dîbà adi kwenjiibwawu mu cimfwanyi cya Nzambi. Ke bwalu mbwabu. Kadi mukaji yêyè kaakenjiibwa mu cimfwanyi cya Nzambi to, kadi mu cimfwanyi cya mulume. Nwamonu anyi?

Mpindyewu, mpindyewu, ke bôbô abu’s. Nenku Nzambi ubatangila, wamba ne: “Eyo, mbamweke—mbamweke balenga.”

266 Civwa ncinyi, mwaneetu? Kabavwaku ne cya kufwa to. Aci civwa anu dyanza dya kumpala dya calcium, dya kumpala dya binshidimba, ke bintu byônsò kubanga mushindu awu. Kî mbilenga anyi? Kadi mpekaatu kulwa kadi kunyangakaya dizola adi. Mpindyewu, Nzambi. . . Nzambi wakamwitabila bwa ne ênzè cinyi? Mbwa cinyi bwakamwitabilaYe bwa kwikalaye mushindu utwăbyămbi katanci eka? Wakamwitabila bwa Wamona mwa kujaadika ne Yêyè ke Musungidi. Yêyè ke wâkacyènza. Wakalekela disaama dilwa, bwa Wamona mwa kujaadikaYe ne Yêyè m’Mwondopi. Wakalekela lufu lulwa, bwa kujaadika ne Yêyè ke Mwoyi. Nwamonu’s? Wakalekela bintu byônsò bya bibi ebi byenzeka, bwa kujaadika ne Yêyè mmwîmpè, civwaYe aci. Netu- . . .

267 Nwênù’s badi bamba bwa dimba dya muyiiki wa bupikudi! Mona’s, mwaneetu, paalwa Yesu, Ekeleeziya ewu—ewu neimane kwaka ku mibangubangu ya buloba ebu ne neîmbè miyiiki ya bupikudi, piikala Banjelo biinyike mitu yabo, kabayi bamanye ne citudi twamba mene ncinyi to. Ee, bôbô kacya kabatuku bajimine to. Kî mbamanye maalu atudi bapicile to. Twètù ke badi bamanye ne kwikala mujimine ne kwikala mupetulula kudi kuswa kwamba cinyi. Kaa, s’tudi mwa kwela mbila mikole bwa butumbi Bwende’s! Yêyè kî m’Musungidi bwabo bôbô to. Bôbô kabavwaku dijinga ne disungidiibwa to. Yêyè kavwa Mwondopi

bwabo bôbò to. To. Butumbi's we! [Mwaneetu Branham udi utuutakaja byanza misangu itaanu—Muf.] Yêyè kèna—Yêyè kèna Mwoyi bwabo bôbò to. Cya bushuwa. Bôbò kabavwaku bafwe mu mpekaatu ne mu matomboka nansha. Twètù mbavwa bafwe, kadi tukaadi bavwijibwe ne mwoyi. Ke bwalu mbwabu. Citwamba ncinyi, ne bifulu byetu bya butumbi byumusha ne: “Kaa, wêwè udi Révérend *Kampanda*” anyi? To, to, to, to, to. Butumbi bwônsò kudiye Yêyè! Ke mudibi. Ke bwalu mbwabu's. Dîbà adi ke ditwalondelangana muyiiki wa mutudi bacimune. Abidi adi panshi aa netûmvwè cyôcì aci bîmpè menemene.

<sup>268</sup> Pa dîbà adi, nenku mu cyôcì aci kuntwaku, nenku cyakenzeka ncinyi? Nzambi wakamba anu cyanaana ne: “Ee, mbipiciibwe mwine anu ne Mêmè munyangakaje binshidimba Byanyi ne calcium aka. Byônsò byamanyi kunyanguka” anyi? To, to. Ukaavwa mumanye ne nebiikale mushindu awu.

Mpindyewu, mpindyewu, piikala ne Nyuma Mwîmpè mmungenze cîndi eci, mwikale ndya byakudya ne mbipingaja mu mubidi wanyi, ngenda ngwibaka too ne ku cîndi mpindyewu eci. Mpindyewu, kadi paabi, s'mvwa mwenjiibwe mu mmwenekelu kampanda. Cimfwanyi cyônsò cyakamona Nzambi, kumpala kwa difuka dya dyulu ne buloba, ciikale cibobe, cidi cishaala cimweneke cya balenga ne byanza. Nwamonu anyi? Ncipatukile mu mukaji, bu mwakambaYe ne necipatukile mu yêyè; musangu udi ulonda, cidi cifumina kudi Nzambi. Cyakavwila musangu awu, kudi mukaji; cidi civwila ewu musangu, kudi Mulume. Nwamonu anyi? Cyakavwila musangu awu, ku dijinga dya disangila dya mulume ne mukaji; cidi cilwa musangu ewu ku Diyî dyakula dya Nzambi. Nwamonu anyi?

<sup>269</sup> Mwaba awu, mpindyewu, kudi cidi mwa kungenzela bibi anyi? To, mukalenge. Kakwena cidi mwa kutwenzela bibi to. Pôlò wakamba ne: “Nansha mene bintu bidiku mpindyewu ebi, bintu bicilwalwa, masaama, lufu; kakwena cyatupandulula ne dinanga dya Nzambi didi mu Kilisto to.” Kakwena cintu cidi mwa kutupandulula to.

<sup>270</sup> Anu mûntù mulondelonde kaabwalu aka. Kukaadi pa kunshaadila nsuki mitwe ku itaanu bwa mêmè kutuuka dîbàla, dya mutu bu diyi edi. Nenku mvwa munkaci mwa kwela cisaku ku twine tukese atu mwaba ewu kukaadi matuku, ke mukajaanyi ne: “Billy, wêwè's ukaadi pa kutuuka dîbàla.”

Mêmè ne: “Kadi ncyèna mujimije nansha lumwe lwa ku yôyi to.”

Yêyè ne: “Idi penyi?”

<sup>271</sup> Mêmè ne: “Ivwa penyi kumpala kwa mêmè kuyipeta?” Nwamonu anyi? “Idi anu kuvwayi pâmvwà nciyi mwanji kuyipeta apu.”

Mpindyewu, kuvwa musangu kampanda, kukaadi bidimu lukama, nsuki eyi kayivwaku mene mwaba ewu to, kadi yivwa

pambelu apa mu lupwishi. Ncya bushuwa anyi? Kadi kukaadi bidimu bitwe ku makumi ataanu, kubangayi kutoloka ku mutu kwanyi. Mmifumine penyi? Mu lupwishi. Nenku mpindyewu idi yalukila kuvwayi aku. Ncya bushuwa anyi? Kayivwaku to, pashiishe yôyi kwikalaku, nenku mpindyewu kayicyenaku to. Ncinyi aci? Cidi ciyènzè cidiyi eci ncinyi? Nzambi! S'ke Yèyè awu. Uvwa muzole dizola, e kwamba ne: “Mushindu awu ke Ûndì muswe bwa yèyè kwikala.”

<sup>272</sup> “Wèwè lufu, kalonda keebe kadi penyi? Lukita, bucimunyi bwebe budi penyi?” Nudi mwa kunjiika dimwe dya ku matuku adi panshi aa kubangila patudi apa. Ncyèna mumanye to. Kadi, mwaneetu, ncyakwikala mufwe to. Nènkwaambilè cyôci aci. To, mukalenge. Kaa!

Netubiike ku lufu! Aleluuyah! Netubiike ku lufu!  
 Mu dinda adi dya dibiika dya ku lufu,  
 paakoseka milonda ya lufu,  
 Netubiike ku lufu! Aleluuyah! Netubiike ku lufu!

Kakwena cidi mwa kumpangisha bwa kubiika. Kakwena démons bûngì bukumbane mu iferno mujima idi mwa kumpangisha bwa kubiika to. Kakwena cintu nansha cimwe mwaba nansha umwe cikumbane mwa kumpangisha bwa kubiika to. Ndi ne mulayi wa Nzambi. Ndi ne Nyuma Mwîmpè. Ndi ne Zoe, Mwoyi wa Cyendelele wa Nzambi, musòmbèle munda emu. Cibidibidi cya kale eci cyakafuma kwaka, ke Nzambi kulaadila buloba bwa kumpatulamu. Kadi piikala Ewu wâkalàadila buloba bwa kumpatulamu awu. . .

<sup>273</sup> Pângàakafikà bukole bukumbane, mpindyewu, musangu wònsò ùmvwà ngumvwa ngonga wa ku ekeleeziya, Cintu kampana civwa mwa kwakula naanyi, mucikàle kânà kakese menemene kaa balume. Mwanjelo wakaakwila mu cipuka, ne: “Kunu maala anyi mfwanka to. Ndi ne mudimu wa wèwè kwenza. Kukooyishi mubidi webe, anyi kwikadi wenda ne bakaji anyi bikwabo to. Wèwè, Ndi ne mudimu wa wèwè kwenza pawakola.”

“Udi nganyi Wèwè? Udi nganyi Wèwè?”

<sup>274</sup> “Neushiishe kumanya byàbûngì pa bwalu abu matuku kumpala.” Paanyima paa matuku, ke Yèyè ulwalwa ewu. Udi ulebelelela muulu mwamwa dîbà dya dibatiiza. Udileeja Yèyè mwine. Udyamba Yèyè mwine. Wandamuna. Ndi m’Mumona mwimane kwaka, myaba yònsò, ku nseke yònsò.

<sup>275</sup> Mmunyi muwenzà, piikalabi ne Yèyè ngudi mungenze cîndì eci, nciyi ne disungula nansha dimwe. . .? Kî mêmè wâkayakù kuntwaku bwa kwamba ne: “Mpindyewu, Charlie Branham, nda ukasele Ella Harvey bwa nwènù kumpatula mu buloba” to. To,



mukalenge. Nciwaku ne disungula nansha dimwe dya ciine aci to. Nzambi ngudi mucyènzè.

Nenku piikalabi ne Yéyè ngudi mungenze cîndi eci, kakuyi disungula; nebitambe kwikala munyi, piikala Nyuma Mwimpè awu mubange kundaadila, mêmè ngamba ne: “Eyo, Mukalenge, Wèwè ke Mufuki wanyi. Ndi muKunange, ne ndi nKwitaba bu Musungidi wanyi!” Neundaminyine mu lupwishi amu bishi? Kwèna mwa kucyenzaku to, mwaneeu. Kwèna mwa kucyenzaku to.

<sup>276</sup> Nzambi kakenzaku katupa nansha kamwe kaa calcium aku to, anyi kaa binshidimba, anyi nî ncinyi cikwabo, kavwa mwa kwikala—kwikala kaa dijimija to. “Bònsò badi Taatu mumpe, kumpala kwa difuka dya dyulu ne buloba, nebalwe kûndi Mêmè.” Eyi! Ndi ndyumvwa anu mwa kwela mbila; s’ndi nnwambidilamu. “Bònsò badi Taatu mumpe nebalwe kûndi Mêmè, ne nansha umwe wa kudibo kaakujimina nansha, kadi Nèncijuule cyakabidi ku dibiika dya ku lufu.” NgâkaMuumvwa ubiikila, pângâakalwà kudiYe. Mmunyi mudibo mwa kundama mu lupwishi lwa buloba? Kakwena bûngi bukumbane bwa bajiki baa bitalu pa buloba ebu bwa kundandakaja mumpala ne cikasu, bafwanyineku kundama mu lupwishi lwa buloba to. Dîngà dituku nènjuukè ne nêngîmanè mufwanangane Nende, musukula mu Mashi Ende, mulela ku Nyuma Wende! Aleluuyah! Angata mangumba ônsò audi muswe kwangata awu; mêmè nêngàngatè Yesu. Amen!

<sup>277</sup> Mwena cyapu kampana cya assurance kulwaye kûndi. Wilmer Snyder, mulunda wanyi mwimpè. Yéyè ne: “Billy, ndi muswe bwa kukusumbisha kabeji kaa assurance [insurance—Muk.]”

<sup>278</sup> Mêmè ne: “Mêmè’s nkaadi nende.” (Mukajaanyi kungosha dîsù, byenze bu udi wamba ne: “Awu mafi aukaadi wamba ngaa cinyi, mulumyana?”)

Yéyè ne: “Wèwè udi ne assurance [insurance]?”

Mêmè ne: “Eyowa’s, mukalenge.”

Yéyè ne: “Ngwa cyapu kaayi nanku awu? Ngwa bishi awu?”

<sup>279</sup> Mêmè ne: “Ditwishiihwa [assurance—Muk.] dibeneshiihwe, Yesu ngwanyi mêmè, kaa, nkaadyosha kaayi aka kaa butumbi bwa Nzambi’s we! Mupyanyi wa lupandu, lumpetela kudi Nzambi, mulela ku Nyuma Wende, musukula mu Mashi Ende.”

<sup>280</sup> Yéyè ne: “Aci ncîmpè, Billy, kadi kacyakukubweja mu nkita to.”

<sup>281</sup> Mêmè kwamba ne: “Necimpatulemu.” Aleluuyah! Ncyèna ndubakaja meeji bwa ne mmwa dibwela bishi to; bwalu mbwa dimupatuka.

<sup>282</sup> Nenku, mêmè nkaadi ne ditwishiihwa [insurance] didi dingambila ne: “Mêmè nènjuulè. Bònsò badi Taatu mumpe

m’Baanyi.” Cyakenza papa wanyi nansha ciikale cinyi, nansha cyakenza maman, ne civwa cinyi. “Bònsò badi Taatu ùmpà Mémè, nebalwe kùndì Mémè, ne muntu nansha umwe kèna mwa kulwa to padi Taatu Wanyi kayi mumukoke.” Aleluuyah! CivwaYe ubakokela ncinyi? “Nkaavwa mudyanjile kubamanya kumpala kwa difuka dya dyulu ne buloba. Pàngààkashipà Mwânà wa mukooko, ngàkamushipa pamwe Nende.” Amen. “Mémè nkaavwa mudyanjile kulongolola Ekeleeziya.” Ncinyi cidi cipete didyanjila kulongolodiibwa? Ekeleeziya. Udi ubwela mu Ekeleeziya mushindu kaayi? “Ku Nyuma umwe tudi babatijiibwe bònsò mu Mubidi umwe.” Yèyè ukaavwa mumanye, kumpala kwa difuka dya dyulu ne buloba ne, twètù aba netwikaleku. “Nenku aba baakadyanjilaYe kumanya, Yèyè mmubabiikile. Aba badiYe mubiikile, m’Mubabingishe. Aba badiYe mubingishe, Ukaadi mumane kubatumbisha.”

<sup>283</sup> Mu Mikanda ya Nzambi, Ukaadi mumane kwamba ne Yèyè neapetangane naanyi anu kwaka. Kakwena démons yònsò idi mifume mu iferno idiku mwa kubalama mwaba mukwabo kana wònsò anyi kubapangisha bwa kufikabo kwaka to, bwalu Nzambi ukaadi mumane kwamba nanku, nenku abu bwalu mbumane kutuuka. Piikala. . . Kukaadi bidimu mìlìyò binunu lukama kumpala kwa dyulu ne buloba kufukiibwabi, kwakimba pamwe mitooto ya mu dinda ne kwakeela bânà baa Nzambi mbila ya disanka, kumpala kwa kwikalaku difuka dya dyulu ne buloba. Nwamonu anyi? Kumpala kwa kwikalaku difukiib-. . . Nenku Banjelo abu ne bikwabo bavwa ne disanka, beela mbila bwa biine abi, kumpala kwa kwikalaku difuka dya dyulu ne buloba. Dyabulu neandame mene mu lupwishi lwa buloba bishi’s? Kèna mwa kucyenzaku to. Nwênù nudi mu bulelela.

<sup>284</sup> Tumonaayi, mpindyewu. Edi ndyanyi dîbà dya cyena mungalaata dîndì mubambakaje, mwaba ewu. Kudi tusunsa makumi abidi kumpala kwa dîbà dikumi ne dimwe. Tudi anu tusunsa makumi abidi kumpala kwa dîbà dikumi. Mmwômò anyi, Mwaneetu Wood? Mmwômò, tusunsa makumi abidi kumpala kwa dîbà dikumi. Bantu bònsò badi ne disanka anyi?

Kaa, ndi ndyumvwa anu bu udi utungunuka ne  
lwendu,  
Ndi ndyumvwa anu bu udi utungunuka ne  
lwendu;  
Nzubu wanyi wa mu Dyulu udi ubalakana ne  
mwîmpè,  
Nenku ndi ndyumvwa anu bu udi utungunuka  
ne lwendu.

Kaa, ndi ndyumvwa anu bu udi utungunuka ne  
lwendu,  
Ndi ndyumvwa anu bu udi utungunuka ne  
lwendu;

Nzubu wanyi wa mu Dyulu udi ubalakana ne  
mwimpè,  
Nenku ndi ndyumvwa anu bu udi utungunuka  
ne lwendu.

<sup>285</sup> Nutu banange misambu ya kale ayi mushindu awu anyi? Kuvwa mukwabo wa kale utuvwa ne ciibidilu cya kwimba, cintu bu ne: “Ngàsà ne luse byakampeta. Ke Mutooto wa Dinda kukenkeshawu.” Ngwèpi awu, Mwaneetu wa bakaji Gertie? Tumonebi. Mmunyi. . . Ngwèpi awu, Mwaneetu Neville? Nwamonu’s, cintu bu ne: “Ngàsà ne luse byakampeta. Ke Mutooto wa Dinda kuleejawu Yawu. . . ? . . . minnyungulukile.” Uh-huh. Eyo. “Mu nkuruse.” Tupeeshe cyona tũng mwaba awu, mwaneetu wa bakaji, ne: *Pabwîpi Nè Nkùrusè*. Seemenena apa, Mwaneetu Neville. Kaa, mêmè ntu munange yôyi eyi. Mbanganyi batu banange misambu ya kale itu misonsola ayi? Udi mwa kwangata yebe yônsò yûdi muswe ya kutupika kuya muulu ya boogie-woogie ayi. Ûmpè mêmè ewu wa ne: “Mwaba ewu ke wakampetela ngàsà ne luse.” Ke wôwò awu. Eyo biteketebitekete mpindyewu:

Yesu, undame pabwîpi ne nkuruse,  
Mwaba awu mpokoló wa mushinga,  
Wa cyanaana bwa bônsò, musulu wa  
lwondapu,  
Upweka ufumina ku mukuna wa Kalvariyo.  
Mu nkuruse, mu nkuruse,  
Mwikale bwanyi butumbi kashidi;  
Too ne paapeta musuuka wanyi mwambwibwe  
Diikisha dyamwamwa dya musulu.

<sup>286</sup> [Mwaneetu Branham wabangi kwimbila mu matama *Pabwîpi Ne Nkùrusè*—Muf.] Kaa, mushindu mwine udiwu mulenga’s we! Anji elaaku meeji! Kadi amba tũng bu ne kakuvwa Musungidi? Anji amba tũng bu ne katuvwaku ne diine Diyì edi? Anji amba tũng bu ne Yèyè kî mmukubiikile? Anji amba tũng bu ne Yèyè kavwaku mudyanyile kukumanya, kadi wèwè mwikale usanganyibwa pambelu apa ne bakwabo baa pa buloba diloolo edi? Nudi baMunange anyi? Kaa, kekelelee! Kanupu mwoyi masangisha a mu dinda to, mpindyewu, pa dîbà citeema ne tusunsa makumi asatu.

Mu nkuruse, mu nkuruse,  
Mwikale bwanyi butumbi kashidi;  
Too ne paapeta musuuka wanyi mwambwibwe  
Diikisha dyamwamwa dya . . .

<sup>287</sup> Mpindyewu tupeeshaaku cyona cya *Mwaba Ku Mpokolo*. Musambu mwîmpè wa kale ewu wa ne: “Kudi mwaba ku Mpokolo.” Mbanganyi badi bawumanye? “Mwaba, mwaba, eyo, kudi mwaba, mwaba ku Mpokolo.” Panudi nuwimba mpindyewu apu, ne ditalala dyônsò olola anu cyanza, ku luseke lwebe

aku, labula mwaneetu awu ku cyanza. Nudi bamanye, kudi mwaba mpindyewu bwa ba-Méthodistes bônso. Kudi mwaba bwa ba-Baptistes. Kudi mwaba bwa beena Mpenta. Kudi mwaba bwetu bônso mpindyewu, ku Mpokolo. Mbanganyi badi bamanye musambu wa kale ewu? Kaa, ncy bushuwa ne nudi bawumanye. Bamwe ba kunudi nwênù baa bikondo bya kale mpindyewu, ewu musambu, mmusambu mulenga wa beena Kentucky baa kale mpindyewu.

Mwaba, mwaba, (labulanganaayi ku cyanza),  
 eyowa, kudi mwaba,  
 Kudi mwaba ku Mpokolo bwebe wêwè;  
 Mwaba, mwaba, eyowa, kudi mwaba,  
 Kudi mwaba ku Mpokolo bwebe wêwè.

Kaa, mwaba, mwaba, kudi mwaba bûngì  
 cyanaana,  
 Kudi mwaba ku Mpokolo bwebe wêwè;  
 Kaa, mwaba, mwaba, eyowa, kudi mwaba,  
 Kudi mwaba ku Mpokolo bwebe wêwè.

<sup>288</sup> Mpindyewu, ndi ne kantu kakese kaa dinupapula naaku. Mayiisha ônsò a matuku mashaale aa, ne mikanda, ne byônsò, nebabange kubisumbishila mundekeelu mwa luseke lukwabo lwa ekeleeziya mwamwa, lumingu lulwalwa, mu masangisha; mikaba ya mêtî ne bikwabo, ne byônsò abi, mu mushindu wa mfundilu mulenga wa dikema. Nekwikale meesa paanyima paapa lwa mundekeelu mwamwa, mu cimwe cya ku bibambalu. Nenku bidi bifunda abi, mayiisha a matuku mashaale aa, ne imwe ya ku mikanda mifunda itu mipatuke ku mbangilu ayi, mu mikanda mipyamipya, mfundilu mupyamupya, nebaadije byônsò abi, ne mu nde—ndekeelu wa nzubu mwamwa, mu diloolo dya diisâtù dilwalwa edi.

Nenku tudi batekemene ci—cikondo cilenga mu Mukalenge. Nulwayi, mu nyuma wa disambila, mpindyewu. Mpindyewu, nubiiikile babeedi beenu ne bantu badi ne ntatu, nubafundile mikanda. Nubabweje munda emu. Netwikale anu. . Nzambi neênzè maalu ne bukole. Ne tudi bamanye ne Yêyè neênzè cyôci aci mpindyewu.

<sup>289</sup> Nenku mpindyewu ndi muye kudi bantu bônso bâmrvwà mumanye ne, bavwa ne kaacintu kampana. Kwôkò kwikale cintu kampana cidi kacyi mu njila mpindyewu, vulukaayi ne, ndi munwâmbile kukaadi ntanta mule ne, netucilongolole. Ne ndi mumanye ne nudi anu bamanye ne kukaadi mwaba ewu nyuma mushiilangane ne ewu uvwaku awu. Nwamonu anyi? Nwamonu anyi? Nwamonu anyi? Ncy bushuwa. Bwa mpindyewu, kanumulekeledi uya kabidi to. Ndi nnwomekela bujitu kumpala kwa Yesu Kilisto ne, kanumulekeledi uya to. Shaalaayi anu nende mwaba ewu, nwamonu's, lamaayi bintu byônsò byolola biiklale batungunuke nuya anu kumpala. Nudi

bànà baa muntu. Kí mmwaneetu wa balume anyi wa bakaji udi wenza cintu cibi to; nyuma wa dyabulu awu ngudi ubwelamu. Nwamonu's, yêyè udi unyunguluka eku ne eku. Nenku ikala anu umvwila mwaneenu wa balume anyi wa bakaji awu luse, ne umanye ne n'Sataana udi munubwelele. Wêwê mwikale uumvwa kaacintu kampanda pa bwalu abu, uumushe kaacintu aku munda mwebe ne lukasa lwônso, nwamonu's, bwalu nekakudye bu kamunguji. Eyo, nekakudye. Pa nanku, shaala kule ne kaacintu aku. Ikala anu muvuluke.

Kudi mwaba, mwaba, mwaba bûngì cyanaana,

Kudi mwaba bwa ba-Méthodistes, mwaba bwa ba-Baptistes, mwaba bwa ba-Presbytériens. Kudi mwaba bwa bônso.

Mwaba, mwaba, eyowa, kudi mwaba,  
Kudi mwaba ku Mpokolo bwebe wêwê.

<sup>290</sup> Nanku, mbanganyi badi bavuluke musambu wetu wa kale wa ditangalajangana naawu awu?

Angata Dîna dya Yesu wëndè naadi,  
Wêwê mwânà wa kanyinganyinga ne dikenga;  
Nedikupe disanka ne busambi,  
Nda naaDi kwônso kûyaayà.

Ndi mufwanyine kujinga bwa washaalaku neetu, wêwê Mwaneetu Jeffreys, wêwê ne Mwaneetu wa bakaji Jeffreys, ne nsongalume ayi, ne bôbò bônso.

Nenku pashiishe twinamina Dîna dya Yesu,  
Tupona mikookwela ku makàsà Ende; (Kaa,  
ekelekele!)  
Mfumu wa bamfumu mu Dyulu netuMwase  
cifulu cya butumbi,  
Paajika lwendu lwetu.

Angata Dîna dya Yesu wëndè naadi,  
Ûdyängatè bu Ngabu leelu ewu;  
Kaa, paasemena diteeciibwa,  
Eyela Dîna dya Cijila adi mu disambila.

Kaa, mêmè ndi munange aci. Kadi nwênù? Dîna dilengele dya Yesu adi! Mpindyewu, tjuukilaayi kuulu mpindyewu mene, patudi munkaci mwa kwimba mpindyewu apa. Eyo.


Angata Dîna dya Yesu wëndè naadi,  
Wêwê mwânà wa kanyinganyinga ne dikenga;  
Nedikupe. . .  
[Mwaneetu Branham udi wakula ne Mwaneetu  
Neville—Muf.]

Eyi dya bupole be!  
Ditekemena dya buloba ne disanka dya Dyulu;  
Dîna dya mushinga (Eyi Dîna dya mushinga),  
Eyi dya bupole be!  
Ditekemena dya buloba ne disanka dya Dyulu.

<sup>291</sup> Eci ncishiilangane ndambu mpindyewu. Twinyikaayi mitu yetu mpindyewu, nenku, ne ditalala dyònsò, twèlàayi cianza cimwepele muulu. Twămbààyi ne:

Twinamina Dîna dya Yesu,  
 Tupona mikookwela ku makàsà Ende,  
 Mfumu wa bamfumu mu Dyulu netuMwase  
 cifulu cya butumbi,  
 Paajika lwendu lwetu.

Dîna dya mushinga, Eyi dya bupole be!  
 Ditekemena dya buloba ne disanka dya Dyulu;  
 Eyo, Dîna dya mushinga, Eyi dya bupole be!  
 Ditekemena dya buloba ne disanka dya Dyulu.

<sup>292</sup> Biikale anu batungunuke ne kwinyika mitu yetu, tudi twamba . . . [Mwaneetu Branham wabangi kwimbila mu matama *Angàtà Dîna Dya Yesu Wëndè Naadi*—Muf.] 

*TWÈTÙ KATWÈNA DÌNGUMBA BWÀ CINYÌ?* LUA58-0927

(Why Are We Not A Denomination?)

Diyiisha edi dya Mwaneetu William Marrion Branham, dyakayiishiibwa musangu wa kumpala mu Anglais mu diisambombo diloolo, dya 27 ngondo wa citeema, 1958, mu Branham Tabernacle mu Jeffersonville, Indiana, U.S.A., ndyumusha pa mukaba wa mēyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)